

obeikandi.com

**حدث بالفعل**

الكتاب: حدث بالفعل  
ترجمة وإعداد: محمد عصمت  
تصميم الغلاف: كريم آدم  
تدقيق لغوي: دينا نسرین  
رقم الإيداع: 2017 /13663  
الترقيم الدولي: 2- 115- 778- 977- 978  
الطبعة الأولى : 2017

20 عمارات منتصر – الهرم - الجيزة  
ت-011-27772007 02-35860372  
[Noon\\_publishing@yahoo.com](mailto:Noon_publishing@yahoo.com)  
جميع حقوق الطبع والتوزيع محفوظة للناشر

ن  
والتوزيع  
للتشر

# حدث بالفعل

قصة رعب حقيقية

ترجمة وإعداد/

محمد عصمت

للنشر  
والتوزيع

obeikandi.com

## إهداء

### لأحلى حاجتين في حياتي كلها

زوجتي الجميلة اللي مستحملاني وأنا قاعد في البيت بين الكتب أو أدام  
اللاب أو باصص في تليفوني أو بتفرج على التليفزيون ومش بقضي معاها  
وقت كفاية،

زوجتي الجميلة اللي بتستحمل عصيبي وضيق وقتي بين الشغل والكتابة  
والترجمة بدون ما تتكلم أو تقصر في حاجة برغم تقصيري اللي مش بيخلص؛  
زوجتي الجميلة اللي ربنا رزقني بيها فخلاني مش عاوز حاجة تانية في  
حياتي كلها ربنا كفاني بيكي من الدنيا وأنا مش عاوز حاجة تانية.

### وهادي الشقي الصغير

كملت سنة معانا يا حبيبي ...  
مش عارفين كُنا عايشين إزاي من قبلك  
حقيقي أنا مش بحس إن ليا أي لازمة غير لما بفرحك أو أضحكك،  
ضحكتك ورضاك يسوى عندي الدنيا..  
يمكن إنت لستَه مش هتفهم الإهداء ده دلوقت،  
بس عشان تعرف بابا بيحبك أد إيه.

obeikandi.com

## مقدمة

مبدئيًا كده لازم نتفق على حاجة مهمة جدًا، القصص اللي أنا حكيتها لكم في الكتاب ده كلها قصص حقيقية حسب كلام الناس اللي حكوها علي الإنترنت في مواقع ومدونات ومنتديات مُختلفة؛

يعني أنا والله مش بشتغلك خالص، هُما حصل لهم المواقف والقصص المُرعبة دي وقرروا يحكوها علي الإنترنت، أنا قررت أترجمها لكم وأنقلها لكم بلغة عامية بسيطة عشان نقدر نستمتع بيها سوا.

وزي ما إحنا عارفين إن ناقل الكُفر ليس بكافر، فأنا ماليش ذنب... لو عندك مُشكلة مع تصديق إن القصص دي حقيقية أنا معنديش مانع، تجاهل الحُتة دي تمامًا واقراها كأنها قصص متألّفة أو مترجمة أو أي حاجة. المهم عندي إنك تستمتع بس، فحاول تستمتع وتمتع نفسك بقراءة سعيدة ومُمتعة، تمام؟؟

صباح الفل

المترجم

obeikandi.com

(1)

## الأزير

فاكر كويس أوي اليوم اللي بدأت فيه أفقد حاسة السمع، فاكره كويس  
عشان حصل فيه حاجتين مهمين أوي  
أولاً عشان يومها أخذت حقنة تخدير عند واحد من دكاترة السنان وكانت  
مؤلمة جداً، وثانياً والأهم عشان بنتي يومها حد اغتصبها وسأها شبه ميتة في  
مقلب زبالة قريب من الحرم الجامعي بتاعها!

جالنا تليفون الساعة 4 بعد نُص الليل، لما بيجيلك تليفون في وقت زي ده،  
ده بيكون معناه حاجة واحدة بس، حاجة متمناش إن أي حد يجربها!  
قبل ما ترفع السماعه بتبقى عارف إن فيه حاجة غلط حصلت، حاجة  
هتغير حياتك كلها، حاجة هتهدم كل أحلامك بس برضه مفيش في إيدك غير  
حاجة واحدة بس... إنك ترفع سماعة التليفون... وترد!!  
الصوت جالي من الناحية الثانية مليون ألم وهو بيقولي: " دكتور  
باردستير... آسف إني بكلمك في وقت متأخر زي ده... بس الموضوع بخصوص...  
بنتك!"

عمري ما هنسى لما سمعت الكلام ده، مش هنسى البرد اللي ملى جسمي لدرجة إنه جمد الدم في عروقي وعصر قلبي، بنتي... حبيبتى، بصيت لمراتي بدون كلام، بصتلي ومن نظرة عينياً عرفت إن بنتنا حصلها حاجة، ولما صرخت دي كانت آخر مرة سمعتها فيها وهي بتصرخ .

في لحظات إبتدل حالنا من ناس نايمة مرتاحة لناس مجانين، الخوف والرعب بيغلوا جواهم وهما بيدوروا على رحلة طيران يروحوا بيها عشان يتطمنون على بنتهم، الموضوع بدأ تقريباً في التوقيت ده بس أنا مكنتش مهتم، عندي حاجات أهم أقلق عليها أكثر، لما الطائرة بقت في الهوا هيلين مراتي بدأت تصلي وتدعي ربنا وأنا بدأت أحس بوجع في ودي الشمال، بعدها بدأت أسمع صوت زي صوت صفارات الانتظار، مش عارف أوصفها لكم إزاي؛

حطيت صابعي في ودي، بدأت أحركه يمين وشمال كمحاولة لتخفيف الألم لكن مكانش فيه أي نتيجة، والصوت كان مزعج، حاد ومؤلّم !

أول ما الطائرة بتاعتنا وصلت نسيت كل حاجة عن موضوع ودي دا تماماً، جرينا من المطار للمستشفى بأقصى سرعة، إيميلي كانت نايمة على السرير في غيبوبة ومتوصلة بكمية كبيرة من الأجهزة، كنت حافظ الأجهزة دي بحكم شغلي وعارف كل جهاز بيعمل إيه وبتاع إيه، بس في اللحظة دي، كل حاجة كانت غريبة عليّا، الحاجة الوحيدة اللي أعرفها كانت بنتي !

قعدنا جنبها، مامتها بتسرحلها شعرها وأنا بقولها إحنا بنحيا أد إيه، افتكرت على طول المرة الثانية اللي كُنا معاها في المستشفى، كان عندها 6 أو 7 سنين تقريباً، كان ميعاد نومها جه وهي مش عاوزه تنام وعاوزه تسهرزي أخوها الكبير، كانت بتتنطط على السرير وبتضحك، لفيت وشي ثانية أبص على حاجة وسمعتها بتقع من فوق السرير، راسها إتخبطت في الأرض جامد ووشها إتملى دم وكانت بتصرخ جامد.

لما هديناها وبصيت على الجرح لقيته محتاج عُرز، هيلين لبستها هدموها  
وكتمت الجرح بحته فُماش قديمة، أنا هوديهما المستشفى اللي أنا بشتغل فيها  
وهيلين هتقعد مع الولد في البيت .

كانت قاعدة في الكرسي اللي ورا بتبصلي في مراية العربية وبتسألني وهي  
بتحاول تكتم الجرح بخوف: " بابا... أنا هتوجع؟ "  
حاولت أهدمها وأنا بقولها: " لا يا حبيبتى... بابا مش هيخليكي تتوجعي "  
بصتلي بفضول وهي بتسألني: " إزاي؟ "  
ضحكت وأنا بقولها: " مش إحنا قلنا قبل كده إن بابا بيشتغل دكتور  
تخدير... وبيخلي الناس تنام؟ "  
ضحكت وقالتلي: " آه "

قلت لها بهدوء وأنا مبتسم: " بابا كمان ساعات بيخلي أجزاء معينة في  
الجسم تنام عشان الدكاترة يشوفوا شغلهم وحبيبتى الصغيرة متحسش بأي  
وجع "

سألتي برجاء: " هتفضل معايا طول الوقت؟ "  
جاوبتها وأنا مبتسم: " طبعًا يا حبيبتى "

تقريبًا بعد 3 أيام بدأت تفوق، في التوقيت ده كان السمع في ودني الشمال  
بدأ يضعف جدًا، الحاجة الوحيدة اللي كنت سامعها كانت الصفارة أو الأزيز

### يبب... ييبب... ييبب

مكانش ده الوقت المناسب عشان أقلق على نفسي فيه، مينفعش أقلق  
وعائلي محتاجاني، عشان كده مقلتش على موضوع ودني ده لأي حد .

حالة إيميلي كانت بتتحسن ببطء، كانت بتقول إنها مش فاكرة أي حاجة عن الحادثة، مش فاكرة حاجة عن الشخص اللي هاجمها واغتصبها، كانت متكتمة تمامًا عن أي تفاصيل بخصوص الموضوع ده، حتى مع مامتها اللي هي أمينة أسرارها كلها، بنتي اللي الضحكة مكانتش بتفارق شفايفها أبدًا، بقت كائن محطم نفسيًا وكل مرة كانت بتبصلي في عينيا، قلبي كان بيوجعي وبيتحطم 1000 حته !

عمري ما حسيت إنني عاجزني ما أنا حاسس الفترة دي من حياتي .  
لما سمحوا لنا نمشي بيها من المستشفى، قررت هي إنها مش هتروح الجامعة تاني لفترة، وهتيجي تقعد معايا أنا ومامتها، تقريبًا معظم الوقت كانت بتقضيه قافلة على نفسها باب أوضتها وقاعدة لوحدها:  
وفي الوقت ده كان صوت الأزيز في ودني بيزيد ..

### يبب... ييبب... ييبب

كل تركيزي في الوقت ده كان على قضية إيميلي بنتي، كنت عاوز أساعدها على أد ما أقدر، مشكلتي لازم تستنى شوية، بدأنا نشوف هنساعدها إزاي، أدوية وعلاج... علاج طبيعي... علاج نفسي..  
جرينا كل حاجة، والموضوع أخذ شهور تقريبًا، لكن في النهاية نوبات الفزع بتاعة بالليل بدأت تختفي، وواحدة واحدة إيميلي رجعت تبتسم وتضحك تاني! كُنا بتحاول نناقشها عن الوقت اللي هترجع فيه الكلية عشان السنة متروحش عليها لما الموضوع بدأ يبقى مخيف ومش مُريح !

في يوم كانت إيميلي عندي في المستشفى اللي بشتغل فيها، كانت جاية تتغدي معايا، كُنا قاعدين في الكافيتريا، الأكل أدامنا وبتكلم سوا في الكورسات والمحاضرات اللي فاتتها وإزاي هتعوضها لما ترجع، فجأة في وسط

كلامها سكتت تمامًا وملامح وشها تبدلت، وشها بقي شاحب وملامحها إتملت ألم، سألتها بخوف: " حبيبتي، إنتي كويسة؟ "  
نظرها كان ثابت على حاجة ومش بيتحرك، بصيت على الحاجة اللي بتبص عليها وكان واقف 3 أشخاص بيتكلموا سوا، بصيتها تاني، فجأة وقفت وعينها إتملت دموع وهي بتقول: " أنا لازم أمشي، بحبك "  
وقفت وحرفيًا جرت برا المستشفى؛

بصيت تاني على الثلاثة اللي واقفين، إثنين منهم أعرفهم كويس وواحد ما أعرفوش، اللي أعرفهم رئيس قسم الأطباء والتاني طبيب أورام، اللي ما أعرفوش كان شاب صغير، تقريبًا من سن إيميلي ومن طريقته في الكلام مع الرئيس هقدر أقول إنهم قرايب ومن فرق السن هقول إن ده حفيده؛  
كل ما كنت بيبصه أكثر... كل ما الصوت اللي في ودني بيزيد أكثر...

### بييب... بييب... بييب

لما روح البيت الليلة دي، إيميلي كانت قاعدة في الجنيئة بتاعة البيت، دخلت بصمت وقعدت جنبها، سألتها بهدوء: " إنتي كويسة؟ "  
هزت راسها بدون كلام، حاولت أهدئها وقلت لها: " بخصوص النهاردة ..... "  
قاطعتني بهدوء وهي بتقول: " فيكتور "  
سكت تمامًا، خُفت أقاطعها تسكت تاني، كملت كلامها: " معايا في الجامعة، في محاضرات الأحياء تحديدًا، لما عرفنا إننا ساكنين قُرب من بعض بدأنا نتكلم، عرفت بعدها إن إنت وجدته بتشتغلوا في نفس المستشفى، بعدها الموضوع تطور وبدأت أبعثله صور وحاجات تانية "

" حاجات تانية ! "

كأب كنت عارف إني لازم مسألش لأن دي حاجة مينفعش الأب يعرف عنها فسكتت تمامًا؛

كملت: " الموضوع كان بدأ يمشي بخطوات سريعة، مكنتش حاسة بحاجة ناحيته فطلبت منه نرجع أصحاب تاني، بس هو مكانش عاوز كده، قالي إنه هينزل الصور والحاجات اللي معاه على النت، لما قتلته إنه لو عمل كده هرفع عليه قضية بدأت يغضب "

صوتها كان بيتلمي حزن ووجع وهي بتحكي: " فيكتور استناني برا مطعم كنت باكل فيه، لما خرجت حاول يقنعني نروح بيته سوا ولما رفضت، جرنى من شعري لشارع مهجور، وهاجمني، و.... و.... "

مقدرتش تكمل فحضنتها، بدأت تهدي بعد شوية وتكمل: " هددني بعدها إني لو قلت أي حاجة هيفضحني وينزل الصور والحاجات على الإنترنت، وهيوصل الموضوع لجده عشان يطردك من شغلك، قالي إنه هيعمل كده " طلبت منها كتير إننا نبلغ الشرطة... لكن كانت خايفة وبترفض .

تاني يوم لما رُحْتُ الشغل، دخلت مكتب الرئيس وأنا مستعد أكلمه وأحكيه كل حاجة، لما شافني ابتسم وسألني كنت فين، قالي إنه من الصُبْح بيدور عليًا، قالي إن الموضوع بخصوص حفيده اللي هيعمل عملية وهو محتاجني كطبيب تخدير في العملية دي، قالي كمان إنه ميقدرش يثق في طبيب تخدير غيري :

كنت عاوز أرفض، كنت عاوز أصرخ وأقوله إن حفيده وحش... شيطان كنت عاوز أقوله إني عاوز أموته لو لقيته، لكن مقدرتش أعمل كده، ابتسمت وأنا بقوله: " طبعًا، دا شرف ليًا "

ابتسم وربت على كتفي وهو بيقول: " كويس إنك وافقت، العملية الساعة

2:30 مع دكتور ليام "

لما كنت خارج من مكتبه، الصوت اللي في ودني كان بدأ يبقى أعلى ومزعج أكثر...

### يبب... ييبب... ييبب

الساعة 2:30 كنت في أوضة العمليات مع فيكتور، دكتور ليام لسه بيستعد وهيدخل بعد التخدير، فيكتور كان نايم أدامي على السرير، مكانش متوتر خالص وفهمت من ده إنه مش عارف أنا مين لحد دلوقت، مكنتش متفاجئ من ده، سألته بهدوء: " أول مرة تعمل عملية؟ "  
قالي بابتسامة لطيفة: " لا "  
قلتله من ورا القناع: " عارف طريقة التخدير بتشتغل إزاي؟ "  
ابتسم تاني وهو بيقول: " أعد من 10 ل 1 ببط، صح؟ "  
هزيت راسي بدون رد، حطيت القناع على وشه والمفروض إني أبدأ معاه محادثة صغيرة لحد ما ينام، هو كان بيعد وأنا كنت بسأله:

10

" على فكرة إنت تعرف بنتي "

9

سألني: " فعلاً؟ "

8

" آه... إيميلي "

7

قالي: " آه فعلاً... أعرفها "

6

" عمرها ما قالت لك أنا بشتغل إيه؟ "

5

كان بدأ يدوخ: " مش عارف "

4

" أنا بخدر الناس يا فيكتور "

3

كان دا يخ جدًا وبدأ ينام: " إيه؟؟ "

2

" ساعات بخدرهم ومبيفوقوش تاني... أبدًا "

1

الصوت اللي كان في ودني كان بيزيد، بيبقى أعلى ومزعج أكثر، صوت جهاز ضربات القلب بدأ يعمل نفس الصوت، في نفس التوقيت مع ودني، صوتهم كان واحد!

### يبب... ييبب... ييبب

بعد بداية العملية بتلت ساعة تقريبًا، ضغط الدم بتاع فيكتور نزل مرة واحدة وبطريقة حادة، الصدمة حطته في نوبة تشنجات، الجراح كان بيصرخ وبيدي أوامر للكل، بس أنا الوحيد اللي كنت عارف إن مفيش أي أمل.



(2)

## الكابينة 28

لما كان عندي 16 سنة عيلتي كانوا في رحلة لكاليفورنيا كأجازة لزيارة ناس قرايبنا، وبسرعة بقيت صديق مُقرب لواحد من الأولاد اللي ساكنين قريّب من قرايبنا، اسمه كان بریت وكان يدوب أكبر مني بسنتين بس.

في يوم من الأيام، بریت قرر إننا نروح في رحلة للريف، أهلي مكانش عندهم اعتراض خصوصًا لما عرفوا إن بریت حافظ المنطقة كلها، جهزنا الشُنط بتاعتنا، الخيمة الصغيرة وأكياس النوم، كُنا هنستكشف الغابة لحد ما نلاقي مكان نخيم فيه لحد الصُبح، أو على الأقل أنا كنت مفكر كده، بس لما بفتكر الموقف بلاقي إن بریت وأنا مكانش عندنا أي خطط خالص.

لما الليل جه علينا كُنا في مكان غريب شوية، مش عارف أوصفه إزاي، زي ما يكون مكان فيه كبابين خشب خاصة بالأجازات، الكبابين كانت ضعيفة وشكلها قديم، مش مكان تحب تقضي فيه أجازتك يعني..  
كان فيه كبابين فارغة، كان فيه كبابين مهدومة وكان فيه كبابين مليانة ناس وفيها حفلات صاحبة جدًا.

على أي حال، الدنيا فجأة بدأت تشتي، بريت اقترح علينا إننا نروح نشوف  
كابينة فارغة وندخلها في السرونقضي الليلة جواها أحسن ما ننام في المطر.

كان لازم ساعتها أدرك إن فيه حاجة مش صح، أنا وبريت مشينا لحد آخر  
كابنتين، وقف بريت أدامهم قبل ما يستقر على واحدة منهم، بصراحة... ساعتها  
كُنت متحمس  
كان شكلها مُختلف شوية عن الباقيين، كانت مدهونة بلون أصفر  
وخطوط بيضا، رقم الكابينة كان متعلق جنب الباب:

### ( كابينتا 28 )

بريت حاول يفتح الباب الأمامي لكنه كان مقفول كويس جدًا ورفض  
يستجيب لأي محاولة من محاولات بريت، الشبايك كلها كانت مقفولة كويس،  
عشان كده وبدون كلام توجهنا للباب الخلفي .  
عدينا على شباكين صغيرين قريبين من الأرض، دي كانت شبايك القبو،  
بريت تجاهلها، وتوجه للباب الخلفي، باب صغير وسلم مكسر صغير بيودينا له؛  
بريت حاول يفتح الباب ولدهشتنا الباب إتفتح بدون أي مقاومة، كنا  
واقفين في أوضة صغيرة وجنبا كان فيه مطبخ واسع؛  
بريت رمي شنطته على الأرض بتعب وهو بيقولي: " خرينا نسيب شُنطنا في  
المطبخ هنا ."

عملت زيه ورميت شنطتي على الأرض، كان مشي عشان يستكشف الكابينة  
وأنا مشيت وراه بدون تفكير.

المطبخ كان بعده غرفة معيشة، بعدها ممر صغير فيه بايين، واحد يمين  
وواحد شمال، وفي آخر الممر على الشمال باب الحمام، في آخر الممر بايين كمان  
مقفولين مش عارف دول بتوع إيه.

غرفة المعيشة كانت مليانة ورق حائط، عليه ورد صُغِيرَ أصفر وورد أزرق كبير، موديل الورق ده على الأقل من السبعينات، كان في كنبه في الأوضة دي كمان؛

الأوضة كان ريحتها غريبة، ريحة حمضية، زي ما تكون ريحة عفن قوية جداً، جسمي إترعش بشكل تلقائي لما ركزت في الريحة دي؛

قلت بسخرية: " الريحة دي مع البرد والمطر هيبقى حاجة كويسة أوي عشان أزمة الربو اللي عندي ".

بريت بصلي ومردش، سابني ومشيت ناحية باب من الإتين اللي قدام بعض، فتح الباب وكان وراه أوضة نوم، كانت فاضية تماماً وبسرعة ظهرت خيبة الأمل على وشه.

الباب اللي على اليمين كمان كان باب أوضة نوم، وبرضه كانت فاضية !

بصلي وقال: " هنتام هنا... في غرفة المعيشة "

بسخرية تاني رديت عليه: " كده هقضي طول الليل مع أزومات الربو "

شاورت على أوضة من الإتين وقتلته: " خرينا ننام في الأوضة دي، أنا حاسس إنها أدفي أوضة في الكابينة ".

بصلي بخيبة أمل وبدون كلام مسك كيس النوم بتاعه، وادالي كيس النوم بتاعي، وبدأنا نجهز الأوضة عشان ننام فيها، كان فيه دولاب كبير قديم في الأوضة دي، فتحته ودورت فيه كويس، دورت تحته وفوقه ووراه، بس ملقيتش أي حاجة

قعدنا نتكلم شوية وبعدها قررنا ناكل حاجة عشان بدأنا نحس بالجوع، وقبل ما أفهم أي حاجة عينيا كانت بتقفل، الساعة كانت 10 وأنا ماكنتش قادر أقاوم... نمت.

صحيت فجأة على صوت صرخة مكتومة، الصرخة دي كانت جاية من غرفة المعيشة، عينيما كانت مفتوحة على آخرها، قبل ما أتحرك فوجئت بإيد باردة صغيرة بتتحط على شفائفي عشان تمنعني من الكلام، اللمسة دي جمدتني مكاني، فجأة سمعت صوت خايف بهمس: "هشششششش، اعمل نفسك نايم، لوعرفوا إنك صاحي هيقتلوك"

عينيما كانت بتوسع أكثر من الخوف، برغم الظلام شفتها، بنت صغيرة قاعدة جنبي، سنهما مزيديش عن 10 سنوات، جسمها رفيع جداً، عينيها كان فيها نظرة غريبة، نظرة مخيفة وشاحبة، شالت إيدها يهدوء وببطء وهي بتبصلي؛ بصيت على برت اللي كان نايم وكأن مفيش حاجة بتحصل، كان فيه صرخة مكتومة تانية من غرفة المعيشة، صوت ست بتصرخ بوحشية، صوت ست بتصرخ بألم مالوش حدود، أصوات تانية بدأت تبقى أوضح، أصوات مراهقين بيتألما، الغريبة إن الصراخ كان بيقف للحظات وبعدين يكمل تاني، حسيت إن فيه محادثة بتدور برا بس أنا مش قادر أسمعها بشكل كويس، البنيت شاورتلي على شفائفيها عشان تفكرني أفضل ساكت؛

الصوت زي ما يكون حد بيتعذب في الجحيم برا، أصوات عذاب، صوت لحم بيتقطع، عضم بيتكسر، مش عارف المدة اللي استمر فيها العذاب ده !!

في اللحظة دي بالذات أدركت إني ماسك إيد البنيت الصغيرة، إيدها الباردة، زي ما أكون مخنفي في شجاعة بنت عندها 10 سنين، الدموع كانت مغرقة وشها، كانت بتهمسلي من وسط دموعها: "هَمَّا تقريباً خلصوا، أنا لازم أمشي من هنا، بس إنت... لازم تفضل هنا".

صوتها كان مليان حزن وقهر، اكتشفت إن أنا كمان كُنت بعيط .

سابتني وقامت، مشت لحد الباب، وخرجت، الصمت ملئ الكابينة كلها بعد كده، كُنت عاوز أصدق إن ده حلم مش حقيقة، بس أنا كُنت عارف إن ده

واقع مش خيال، حاولت أصحي بريت لكنه كان نايم باستسلام ورافض تمامًا إنه يصحى، كان بيتنفس بعمق دليل على إنه في مرحلة النوم العميق، فجأة حسيت بالإحساس اللي كنت خايف منه، كأن الرئة بتقفل وبترفض تستقبل أو تخرج أي هوا، بترفض تشتغل تاني وبتعلن إضرابها، ده كان بسبب إني كاتم نفسي طول ما كُنت سامع صوت القتل والتعذيب برا، الضغط والخوف سببوني واحدة من أسوأ الأزمان اللي ممكن تتخيلوها  
دوّرت حواليا على الأرض ثواني قبل ما أفنكر إن شنطتي كلها برا والبخاخة الطبية بتاعتي جواها!

حاولت أنتفس بهدوء وأنظم تنفسي بس الموضوع كان بيتحول للأسوأ، كنت عارف إن مفيش أي أمل، لو مخرجتشن عشان أجيب البخاخة... هموت  
حاولت أهدي نفسي شوية بيان الأصوات برا وقفت تمامًا، خرجت من كيس النوم ومشيت ناحية الباب بهدوء، فتحت الباب ومشيت ناحية المطبخ، الكابينة مظلمة وأنا مش عاوز أعمل أي صوت، من بعيد صوت حفلة لسه مستمرة في كابينة من الكباين.

طلعت البخاخة الطبية بتاعتي، استعملتها بسرعة، الرئة بدأت تشتغل تاني والهوا بدأ يملا صدري، الريحه هنا كانت سيئة جدًا، تقريبًا كده بدأت أتكيف إن مفيش حد في الكابينة خلاص، لأن لو فيه حد كان المفروض يسمعني من فترة.

خرجت الكشاف بتاعي من شنطتي، مشيت بخوف ناحية أوضة النوم الثانية، لما النور كشفلي إيه اللي كان جواها، الخوف شل كل عضلة في جسعي

صدقوني لما أقولكم إنني طول ما أنا حي مش هنسي اللي شفته ده... أبدًا!

قدامي في الأوضة كان فيه 3 جُثث، واحدة على الكنبة القديمة متغطية ببطانية مليانة دم، إثنين على الأرض، الإثنين شايبين في سن المراهقة، كان واضح بدون ما أقرب منهم إنهم متعذبين ومقتولين، الدم كان في كل مكان، الحيطان... الأرض... السقف، كل مكان:

بس مكانش فيه أي علامة على البنت الصغيرة!  
في اللحظة دي حسيت إنني إتجننت، جريت على أوضة النوم الثانية وبدأت أصرخ وأنا بهزبريت بجنون: "بريت... اصحي... لازم تصحي"  
صحي وبصلي بخوف وعدم فهم، صرخت فيه تاني: "كلهم... كلهم ميتين!"  
الخوف بان في عينيه وهو بيقولي: "يعني إيه؟، إنت شفت حاجة فعلاً زي ما بيقولوا!!".

مكانش عندي أي فكرة عن اللي هو بيقوله، وماكنتش مهتم بصراحة، جريته من يده بالعافية لحد باب الأوضة ومنها لأوضة النوم الثانية..  
وهناك... مكانش فيه أي حاجة!

الحيطان كانت متغطية بورق حائط عادي، مفيش أي دم، مفيش جُثث، مفيش كنبه... مفيش أي حاجة!

عيطت وأنا بقوله بخوف: "بريت، كان هنا جُثث، 3 جُثث... لازم تصدقني"  
بريت بصلي وعينيه مليانة خوف وهو بيسألني: "حد قالك عن الأسطورة بتاعة المكان ده.... صح؟"

صرخت فيه: "محدش قالني حاجة، أنا معرفش حد هنا غيرك يا غبي، كان فيه دم وكنبة هنا".

قالني همس مخيف: "لا مكانش فيه حاجة، الأوضة دي فاضية من أول ما جينا"

بصيت لبريت... بريت عارف حاجة أنا معرفهاش!  
خرجت للمطبخ وشلت شنطتي وأنا بصرخ فيه: "أنا هخرج من هنا... حالاً"

فتحت الباب وخرجت وسط البرد وظلام الليل، برت خرج ورايا بسرعة، مشينا لحد الكابينة اللي فيها الحفلة، خبطت على الباب جامد، خرجت بنت حلوة جدًا وسكرانة جدًا، سألتها إذا كان عندهم تليفون ممكن أستعمله، بصت على وشي وهي بتقول: " من الخوف والرعب اللي على وشكم... أقدر أقول إنكم كنتم في كابينة 28... صح؟ "

مردتش عليها، مشيت لحد التليفون واتصلت ببابا، في أقل من ساعة كان هنا بعربيته، كان حاسس بالغضب طبعًا، أنا وبريت متكلمناش طول الرحلة للبيت، قتلته بس إني ماكنتش قادر أصحيه أثناء حدوث الجريمة اللي سمعتها؛ قالي بصوت واطي: " كنت سامعك بس مش قادر اصحى، كنت بحلم بكابوس مرعب مش هقدر أحكمهولك... أنا خايف منه "

مشفتش برت تاني طول حياتي بعد الليلة دي، اليوم اللي بعد كده صحيت تعبان، لما تحسنت كان وقت رجوعنا من الأجازة جه؛ برت مجاتلوش الفرصة يقولي إيه اللي يعرفه أوليه كل الناس عرفت إننا كُنا في الكابينة 28.

دورت على قصة الكابينة 28 على الإنترنت من أسابيع، قريت عن حادثة القتل البشعة اللي حصلت لواحدة ست وأولادها الإنتين في الكابينة دي، وقضية اختفاء بنتها اللي عندها 12 سنة

اللي لقوا هيكلها العظمي في شلال مية مش بعيد عن مكان الكابينة بعد ما ماتت ومحدث لقي جثتها وتحللت، الأولاد كانوا نايمين في الأوضة اللي أنا وبريت نمنا فيها، أنا شفت مسرح الجريمة، شفت الجثث لما إتسحبت وإتحطت في الأوضة، أنا مش فاهم حاجة وخايف أوي.

\* \* \*

(3)

## بابا... إنت بتعمل إيه؟

"بابا... إنت بتعمل إيه؟"

كان بيلحن الجملة وهو بيقولها كأنه بيغني أغنية، مديت إيدي اللي بتترعش وخطيتها على أكرة الباب، حاولت أغمض عينيًا عشان أحس بوجوده، أحس بتواجهه ...

قلتله: "مش بعمل حاجة يا صغيري".

صوتي تهدج جدًا، الدموع قربت توصل، روجي مليانة غيوم حُزن، حاسس بالغضب والحزن مع بعض بيسيطروا عليًا، فيه مرارة في زوري، حطيت إيدي الثانية على وشي، بحاول أغطيه، الدموع المألحة وجعت الجرح المفتوح ؛ كان لازم أقعد، رجليًا بتترعش وضعيفة، قعدت على التواليت قبل ما أقع على الأرض، إيدي سابت الباب ووقعت جنبي باستسلام، خط طويل ماشي على إيدي ببطء مرعب...

"بابا... إنت بتعمل إيه؟"

رعشة ضعيفة بتجري في جسمي كله لما بسمَع صوته، كأن حد بيلف حبل  
مشنقة على قلبي، الطريقة اللي بيقول بيها الجُملة، الطريقة اللي بيلحن بيها  
الكلام كأنه بيغني، افتكرت شفايفه الصُغيرة وهو بيمص بيها صابعه لما كان  
رضيع لسه بيملى الدُنيا فرح...  
" بابا... إنت بتعمل إيه؟ "

بدأت أفكر ذكرياتي معاه...

" بابا... إنت بتعمل إيه؟ "

لما كُنت في الجراج تحت عربيتي بحاول أصلحها، كان واقف جنب رجلي،  
بيرقص وهو بينط على رجليه الصُغيرة، وماسك في إيدِه ( مستر بون بون )،  
اللعبة المُفضلة ليه، مستر بون بون كان أرنب لعبة، كان ماسكه من ودانه وهو  
بيرقُص، قالي إن مستر بون بون بيحب يصلح العربيات زيي ؛  
قالي إن مستر بون بون هيبقى أول أرنب بيصلح عربيات في العالم كله ...

" بابا... إنت بتعمل إيه؟ "

لما كُنت في المطبخ بشرب زجاجة البيرة السابعة بالنسبة ليًا، والدته كانت  
بتصرخ فيًا، المرة دي المُشكلة بيننا كانت بسبب الفواتير اللي مش عارف  
أدفعها، الفلوس القليلة اللي بتيجي من شُغلي، والفلوس الكثير اللي بصرفها  
على تصليح العربية بتاعتي، كان واقف مختئ ورا التلاجة، شعره الأشقر  
الطويل باين من جنب التلاجة، كان بيتظاهر إنه خفي، بصراحة بالنسبة لسُنُه  
كان بيختئ كويس؛

والدته قررت ترمي عليًا زجاجة بيّرة. طبعًا كانت فاضية، لو كانت مليانة  
كُنْتُ شربتها، ماكنتش مُهتم هي بتقول إيه، ماكنتش مُهتم هُو سمع إيه؛  
كُلّ اللي كُنْتُ مُهتم بيه إني أشرب زجاجة بيّرة كمان لما أخلّص اللي في إيدي  
دلوقت

همس من ورا التلاجة إن مستربون بون هيكون أفضل أرنب خفي في العالم  
بس أنا ماكنتش مُهتم ...

"بابا... إنت بتعمل إيه؟"

لما كُنّا في مكّتي، كُنْتُ شغال وردية تانية بعد الضُهر عشان عندي مواعيد  
تسليم شُغل متأخرة، مواعيد التسليم هي المشانق اللي بتشقق الكسالى اللي  
زي، كان بيشدني من إيدي؛  
مكانش فاهم أد إيه مواعيد التسليم مُهّمة، لما قتلته إني لو مسلمتَش  
الشُغل في ميعاده هكون في حُكم الميت؛  
سألني ليه هموت لو مخلصتَش شُغلي، حاولت أفهمه إن الموت هنا مش  
بمعناه الحرفي، كُنْتُ بكلمه من غير ما أبص لهُ؛  
قالي إن مستربون بون هيكون أحسن أرنب بيصلح ناس ميتين في العالم...

"بابا... إنت بتعمل إيه؟"

الصُبح... وأنا قاعد في عربيّتي...

نجحت أشغلها بس صوتها عالي ومُزعج، فيه حاجة مكسورة لسه فيها  
مخيلة العادم بتاع العربية كثيف جدًا، لعنت العربية والوقت والفلوس اللي

ضاعوا في تصليحها، ضربتها برجلي بغضب، كان واقف بيتفرج عليًا من ورا  
شباك الجراج، كان بيسألني من ورا الشباك أنا بضرب العربية ليه؟  
هل العربية مش بتسمع الكلام زي ما هوّ ساعات مش بيسمع الكلام فأنا  
بضربها زي ما ماما بتضربه وتشتمه، ماكنتش مُهتم إني أرد عليه؛  
ببساطة تجاهلته، تجاهلت سؤاله، تجاهلت كُل حاجة، فضل يبصلي ولمّا  
لاحظ إني بتجاهله، الدموع نزلت من عينيه بخُزن، استخدم مستر بون بون  
عشان يمسح الدموع اللي ملت وشه...

"بابا... إنت بتعمل إيه؟"

سمعت صوت العربية بتشتغل، البيرة كانت مخدراني والغضب مالييني،  
راسي كانت بتوجعني من ضربتها ليّنا، إيدي بتوجعني من ضربي ليها، صوت  
العربية كان جاي من الجراج المقفول عالي ومُزعج، سمعت صوت العربية  
بتتحرك فجأة عشان تخبط في الحيطه، جريت على الجراج، الدم مالي المكان،  
مستر بون بون واقع على الأرض وغرقان دم والعربية متكسرة تمامًا...

"بابا... إنت بتعمل إيه؟"

حطيت إيدي على ودني عشان ما أسمعوش...

"بابا... إنت بتعمل إيه؟"

الدم الأحمر بيملى الأرض تحتي، سامعه بيخبّط من برا الباب، أنا عارف إنه  
مش هوّ، مش حاسس بيه، الصوت حي أوي إنه يكون صوت ابني الميت، والدته

سابتني في البيت لوحدي ومشت لما مات، كان بيصرخ فيا إني أفتح الباب، كان بيعيط بحزن، قالي إنه سامحني على موته، الدم خرج من تحت الباب لبرا، ابني مات من شهر، أنا مش عارف مين اللي برا الباب؛

عارف إنه صوته بس مستحيل اللي برا يكون ابني، ابني مات، ابني مش بيعبط على الباب عشان يدخلي؛

ابني وحشني، أنا قررت أهرب من الكائن اللي برا ده...

أنا خايف عشان كده ههرب وأروح لابني الحقيقي يطمئي

أنا خايف من الكائن اللي برا.

صوت الخبط بيزيد، صوته بيتوحش، الدم بيقويه، الباب بيتكسر تحته، بصيت على شرايبي المقطوعة، الدنيا بتلف بيئا، ابني الحقيقي بيضحكلي، الباب بيتكسر وعينيا بتتقل للأبد.

ملحوظة:

الأب نجا من حادثة الانتحار دي لما حد من الجيران حس بحركة غريبة في البيت فطلب النجدة اللي وصلوا لقوا الباب مكسور بطريقة متوحشة بس الأب كان واقع في الأرض وشرايبيه مقطوعة، أنقذوه ولما فاق حكي الحكاية دي ولحد دلوقت مش عارفين إيه اللي كان برا الباب وكان عاوز منه إيه؟

\* \* \*

(4)

## عقدة ذنب الناجية

إزيكم... إسمي جوليان... أنا ناجية

أنا في مجموعة دعم لعلاج الشعور بالذنب الناتج عن النجاة، بنتقابل مرة في الأسبوع عشان نتكلم مع بعض ونهون على بعض شوية، لما بدأت آجي هنا كُنا لسه عددنا صغير، دلوقت العدد قريب من عشرين. قائد المجموعة راجل اسمه إرنست، راجل لطيف وداعمِ لينا لأقصى الحدود، صعب جداً تصدق إنه متدريش على قيادة مجموعة دعم نفسي.

الأسبوع ده إرنست طلب مننا نكتب جواب نوضح فيه ليه بنعاني من عقدة ذنب تجاه نجاتنا، قالنا إن مش لازم نقراهم أو نورهم لحد، بس الجواب ده مهم عشان هيورينا الألم بتاعنا سببه إيه، عشان كده كتبت الجواب اللي هتقروه ده!

أنا عندي عقدة ذنب تجاه نجاتي... لأنني ضحية الجلاد بتاعي!

لا، بصراحة الكلام ده غلط، وأنا مش المفروض أقول إني ضحية، إرنست بيقول إننا مش ضحايا، إحنا ناجين، ونجاتنا دي كانت لسبب، محدش يقدر

يقول علينا ضحايا، لكن ساعات... ساعات... مش بحس إني ناجية، كان المفروض أنا اللي أموت، يمكن أنا مستحشش إني أكون هنا وسطهم، دي الحقيقة..

أنا حاسة بالذنب عشان كارلا كانت تستاهل تعيش أكثر مني !

عرفت كارلا كويس بسبب الوقت اللي قضيناه مربوطين مع بعض، السلاسل اللي كانت رابطانا كانت مقفولة كلها بقفل واحد، إيدنا مربوطة كويس مع بعض، إحنا الإثنين مكناش لابسين أي هدوم، لما وصلت للعلية بتاعة السجن كنت لسه متعرضتش لأي اذى، كارلا كانت مأذية بشكل كبير، كان في كدمات في كل مكان في جسمها، فيه دم ناشف في كل مكان، حتة من شعرها مخلوعة من فروة راسها بالقوة، عندها سنة أو 2 مش موجودين، اليوم الأول ليا كنت خايضة ومرعوبة، كانت بتحاول تهديني، قالتلي على الحاجات اللي لازم أتوقعها هنا، قالتلي على السجن وعلى الطريقة اللي بيمشي بيها الأمور هنا، صوتها كان هادي بس مروع، بس كنت سامعاها كويس  
كمان كنت سامعة تنهدات الألم بتاعتها !

" هيطلب منك عملي حاجة... الموضوع هيبدا بسيط... بعد كده هيبقى مؤلم... يا إما هيوملك إنتي أو هيولمي أنا... لازم عملي اللي هيطلبه، لو عملتيه هياكلنا... لو مقدرتيش... هيسيبنا نجوع !"

حاولت أفهم الجملة اللي هي قالتها لي دي، كنت خايضة وتايهة ومش فاهمة حاجة، قالتلي بنبرة توضيحية: " دي المرة الوحيدة اللي هقولك فيها ده... أنا أسفة عشان اللي هعمله فيكي".

كانت عند وعدها، مكررتش اعتذارها ده تاني !

قالتلي إن عندها 3 أولاد. الكبير هيخلص المرحلة الإعدادية قريب جدًا، كان عندها أسرة وحياء، أنا مجرد بنت في الجامعة، أهلي ميتين وماليش حبيب ولا أصحاب، محدش هيقلق عليا لو اختفيت، بس لما جه وقت تنفيذ أوامره مفيش أي حاجة من دي فرقّت معاه.

دائمًا كان بيلبس قناع تزليج، لونه برتقالي فاتح، مكانش بيتكلم معنا إطلاقًا، كان بيمسك ورقة مكتوب عليها التعليمات اللي عاوزنا ننفذها، كان مريض نفسي، مريض نفسي بطريقة مُقززة. من شكله وحركاته أقدر أقول إنه في الأربعينات من عُمره، لون بشرته أبيض، غير كده مقدرتش أعرف عنه أي حاجة .

الأمر الأول اللي إداهولي كان إني أَرْجَع على كارلا، كنت هنا بقالي 24 ساعة بس، كُنت جعانة، تعبانة وخايفة، قلتله إني مش فاهمة هو عايزني أعمل كده ليه، هز الورقة بعصبية، كارلا أمرتني بصوت واطي إني أعمل اللي بيطلبه، لو عملت كده هياكلنا، كنت شايفة عيون كارلا كويس، كارلا عاشت أسوأ من كده... بكتير!

حاولت أَرْجَع عليها، من غير إيديا كان الموضوع صعب، كنت بعَيْط وبترجاه يسبيننا نمشي، بعد 10 دقائق رمى علينا الورقة بعصبية وهزراسه بخيبة أمل، كارلا في اللحظة دي هجمت عليا، مكنتش فاهمة إيه اللي هيحصل، عضتني في كتفي بعنف لدرجة إنها قربت تشيل اللحم من مكانه، صرخت وحاولت أبعد عنها، كانت ماسكة كتفي بأسنانها بشكل وحشي، شكل الدم على وشها خلى الدُنيا تلف بيًا... بعد ثواني أعني عليا !

صحيت بعد شوية، كارلا كانت قاعدة قصادي بهدوء، لما لمحتها بعدت عنها بشكل تلقائي، السلاسل كانت ضيقة على إيدي وبتوجعني كل ما يبعد، الألم والحزن كان باين على وشها وهي بتقولي: "كان لازم عملي اللي طلبه منك" سألتها بألم: "ليه عملي فيا كده؟"

بهدوء مليون حزن جاوبتني: "لأنك فشلتني... لو مكنتش أذيتك مكانش هياكلني... بس دلوقت أنا أكلت وشبعت وإنتي لسه جعانة" بصيت على كتفي عشان أشوف الجرح، حته من اللحم كانت طالعة من مكانها والدم ناشف حوالها، الألم كان بينتشر في جسسي كله، كارلا بصت للأرض بخجل:

السجّان فتح الباب ودخل، اكتشفت بعدين إننا في عليه بيت قديم بتاع راجل عجوز السجّان ده قتله، محدش بيفتقد كبار السن، البيت كان في مكان مهجور وأقرب جارليه كان على بُعد 3 كيلو؛

جسسي إترعش والسجّان بيصلي من ورا القناع، قعد على كرسي قريب منّا، كان ماسك ورقة لكارلا مكتوب عليها: "لازم تبلي البصاق بتاعها" بصتلي وهي بتحمستي عشان أعمل كده، هزيت راسي بعنف، مقدرش أعمل كده، خبطت إيدها في الأرض والسلاسل طلعت صوت عالي وهي بتقولي: "يلا!!"

حاولت أعمل كده بس ريتي كان ناشف، ما أكلتش ولا شربت أي حاجة بقالي يوم أو أكثر، حاولت بأقصى طريقة قديرت عليها، بصقت على وشها وحاولت أنشن على فمها، بلعت اللي بصقته كاني معملتش حاجة خالص:

السجّان شكله مكانش مبسوط أوي، طلع ورقة تانية من معاه مكتوب فيها: "إكسري إيدك".

كان موجهها ناحيتي أنا، بصيتله بصدمة وأنا بسأله بعدم تصديق: "إيه؟"

كارلا ردت مكانه بصوت مليون يأس: " إعملي كده... مش عاوزة أؤذيكي تاني!"

بصيت على إيدي وأنا مش عارفة المفروض أعمل إيه دلوقت، ببصلها دلوقت وأنا بكتب الجواب، لحد النهاردة الكسور ملتحمتش بشكل صحيح، إيدي زي ما تكون شوية عضم مكسر جوا حاجة جلد، مش بقدر أستعملها لحد دلوقت، بفتكر لما حطيتها تحت السلسلة وبدأت أكسرها وأضربها بعنف لحد ما إتكسرت تمامًا، صوت العضم وهو بيتكسر مش هيتمسح من ذاكرتي أبدًا، كارلا كانت بتبصلي بعينين بتقول إنها شافت أسوأ من كده؛

كنت بعيط، بعيط بسبب كسرة النفس وبسبب الوجع، السجّان كان بيتفرج باستمتاع، رمى الورقة على الأرض لأنني ببساطة عملت اللي هو طلبه مني، خرج من المكان لدقائق ورجع بطبقين فيهم أكل، كلنا كل اللي في الأطباق، نسيت وجعي من كتر الجوع اللي كنت حاسة بيه، كان بيتفرج علينا وإحنا بناكل، مكنتش شايفة تعبيرات وشه من ورا القناع.

بعد ما خلصنا أكل السجّان سابنا ومشني، كان في دماغي فكرة بتختمر، أحسن حاجة بخصوص اليد المكسورة إنك ممكن تخرجها من جوا القيد بتاعها فتبقى هي حرة، مكسورة مش بتتحرك، بس حرة، الحلوي الموضوع هو حرية اليد الثانية اللي مش مربوطة في حاجة دلوقت رغم السلسلة المربوطة عليها، كارلا كانت بتتفرج علينا وأنا بخرج إيدي المكسورة من السلسلة الحديد، عينها كانت بتنصحي أخذ بالي ومعملش صوت، بصيت ناحية إيدي وتجاهلتها تمامًا، الحاجة السيئة في الموضوع ده إن إيدي لما تُخرج مش هتدخل تاني ؛

استخدمت إيدي السليمة في إني أدور على الأرض براحتي، كنت بدور على أي حاجة ممكن أستخدمها، عاوزه أفك قيدي وأهرب، كارلا هزت دماغها وهي بتقول: " اللي بتعمله ده مالوش أي قيمة "

ساعات وساعات بدور على الأرض بإيدي السليمة، ملقتش حتى مسمار أو طوبة صغيرة، مفيش أي حاجة خالص، كنت بدور بصبر وجنون على أي حاجة، الليل جه وكارلا زهقت مني ونامت، وبعد شوية... لقيت حاجة !

لقيت فار لسه مولود، من غير ما أفكر مسكته، إتكسر في إيدي، هو كان لسه ضعيف وأنا مقدرتش كويس مدى قوتي، كان بيقاوم وعاوز يهرب رغم كسوره لكن أنا كُنت مساكاه كويس، مش عارفة إزاي ممكن أستخدم فار لسه مولود في إني أهرب من هنا، بصيقله فشفت عينيه، كانوا مليانين خوف، فجأة فهمت كل حاجة، فكرة مجنونة جاتلي، لو مش هقدر أفتح القفل الكبير بمسمار... فممكن ب.....

كارلا كانت نايمة، غمضت عينيا، الموضوع مكانش سهل ولا بسيط، لسه حاسة لحد اللحظة اللي بكتب فيها الجواب ده بطعم دمه وطعم الفرو في في، قطعت راسه وفتحته بسناني، كنت عاوزه حاجة معينة من جواه، كسرت رقبته الأول، مكنتش عاوزه أعذبه، دخلت إيدي جواه وبرفق بدأت أدور على اللي أنا عاوزه، وشي كان مليون دم، إيدي غرقانة دم، بس ده مكانش مهم، خلعت عموده الفقري بالراحة، هو ذا اللي مهمتي، وأخذته ورميت الباقي بعيد بدون تفكير ولا رحمة !

قضيت ساعة تقريبا بحاول أفتح القفل بالعمود الفقري بتاع الفار اللي لسه مولود، محتاجة أفك القفل الكبير ده وساعتها السلسلة كلها هتفك وهقدر أهرب من هنا، كنت حريصة أوي، مش عاوزه أكسر العضم اللي في

أيدي، الحرية كانت بتقرب مني، مش عارفة الموضوع خد وقت أد إيه، بس في النهاية سمعت صوت تكة القفل وهو بيتفتح، حسيت بالحماس فصرخت بنصروفرحة!

صرختي صحّت كارلا، مكنتش مُهتمة، فكيت السلسلة عن أيدي ورجليًا بسرعة، كارلا بصتلي بفرع وهي بتصرخ: "لا، لا... كفاية..."  
بس أنا تجاهلتها، أنا كنت بقيت حرة خلاص، مش قادرة أقف على رجليًا، الألم هيموتني، الجوع بينهش فيا بس عايشة وحرة. ومستعدة أخرج من هنا

صرختي مش بس صحّت كارلا، سمعت صوت السجنان بيفتح الباب، بصلي بهدوء للحظات، الخوف شل جسدي فيهم، كنت يستعد أقاتله أو أحاربه، كنت يستعد أموت، كنت عاوزة أموت وأنا بحاول بس معنديش استعداد أموت مستسلمة، السجنان بصلي من فوق لتحت من ورا القناع بتاعه، مشي ناحيتي ببطء وهدوء مخيف، مشي من جنبي وسابني ووطى على كارلا، كارلا اللي كانت بتعيط بهيستيريا، بصلي وهو موّطي عليها وشاورلي بإيده ناحية الباب .

سألته بصدمة وعدم تصديق: "إنت... إنت عاوزني أمشي؟"  
هزاسه بالموافقة، شاورلي بإيده، بإيده الثانية شاور على رقبة كارلا كأنه بيدبحها، فهمت معني إشارته، هيقتل كارلا، وقفت أفكر للحظات، الإنسانية قبل أي شيء، كارلا شخص لطيف وحاولت تساعدني أكثر من مرة، إزاي ههرب وأسيبها تموت

كارلا كانت مستسلمة، مدافعتش عن نفسها، كانت بس بتعيط وهي بتبصلي، لما عيني جت في عينيها عرفت أنا لازم أتصرف إزاي...

هربت، جريت من البيت الفظيع ده بدون تردد، مبصيتش ورايا ولوللحظة واحدة، كُنت عريانة، خايفة وبتألم، كنت بصرخ عشان حد يساعدي، جريت مسافة كبيرة، ممكن تكون أكثر من كيلو، في النهاية لقيت بيت ولما شافوا

حالي ساعدوني وطلبوا النجدة، الإسعاف تحرك بيًا بسرعة على المستشفى  
عشان يعالجوني الأول...

وعِشت، مش ده اللي ربنا خلقنا عشانه، إننا نعيش، مهما كانت  
الصعوبات، لحد دلوقت كارلا بتطارديني في أحلامي، في صُحَياني وفي كل لحظة  
في حياتي، كان لازم هيّ اللي تهرب وتعيش، هيّ كانت الأقوى، هيّ اللي كان لها  
حياة، إرنست قالي إن مش أنا اللي قتلت كارلا، السجّان ده هو اللي قتلها، في  
الحقيقة هروبي هو اللي قتل كارلا.

محتاجة أخلص الجواب ده دلوقت، هقراه أدام المجموعة بكرة، إرنست  
بيقول دايماً إن العودة لمكان الحادثة حتى لو في الذاكرة، هتساعدنا كتير، بس  
أنا مش مقتنعة بده؛

مش عارفة ليه إرنست صمم إني أكتب ده، يمكن عاوز يشوف الموضوع  
من زاويتي ومن وجهة نظري، ميسألش على طريقه في علاج الأمر، أنا بس عاوزة  
أرتاح، عاوزة بس أحس إني تصرفت صح، يا ريت السجّان كان قتلتني أنا،  
للأسف السجّان متمسكش لحد دلوقت، لقوا جثة كارلا مذبوحة في العلية  
بس.

عقدة الذنب تجاه النجاة... هل ممكن هتخلص منها في يوم من الأيام ؟

إرنست قالي لا، لأنها لو راحت وتخلصت منها، يبقى إيه الدافع اللي خلى  
السجّان يسيبني أمشي ؟  
السجّان قتل كارلا جسديًا، بس قتلتني أنا معنويًا وهفضل طول عمري  
عايشة بعقدة الذنب.

\*\*\*

( 5 )

## لوسبي

كنت قاعدة في عربيتي في انتظاره يوصل البيت، عربية ميني فان صغيرة،  
عمري ما شربت سجاير بس في أوقات الانتظار المملة دي ساعات بحس إني  
عاوزة أشرب سجاير، الحاجة الصح اللي ممكن تتعمل دلوقت هي إني هقعد  
هنا... أراقب البيت... وأسبب إحساس الغضب يكبر جوايا كمان وكمان ..

كُنا تقريبًا في نص الليل، الشارع فاضي تمامًا، ضهري بيوجعني من القعدة  
في كرسي السوافة وقت طويل، بهزرجلي اليمين بعصبية وزهق، كل شوية أخذ  
بالي وأوقف رجلي عشان أوفرطاقتي للي جاي ؛  
ساعات عربيات بتعدي من جنبي وبيبصولي باستغراب، أنا واقفة أدام  
بيته بقالي ساعتين تقريبًا ومش بتحرك، الانتظار في شغلتي هو تقريبًا أصعب  
جزء، دايمًا ببقى عاوزة أخلص شغل عشان أروح البيت وأشوف الكلاب  
بتوعي، توني تأخر وأنا بدأت أزهدق، كان لازم أراقبه شوية عشان أعرف  
مواعيده، قلة صبري دايمًا بتقف في طريقي !

أخيرًا توني وصل بيته الصغير، معدتي بدأت تطلع أصوات من كتر الحماس، كان سكران وبيتطوح وهو بيدور على مفاتيحه في جيبه، بدأت أستعد وأجهز نفسي ؛

للأسف توني ساكن في منطقة سكنية زحمة، جيرانه على بُعد 20 خطوة منه، وطبعًا أنا مش عاوزة ألفت نظر أي حد أو أعمل أي ضجة تلفت النظر ليًا، لازم أكون حريصة أوي، تنفست بعمق، أنا عندي مسؤوليات كتير وعشان كده لازم ميتمش القبض عليًا، للأسف اللي أنا بعمله... غير قانوني .  
أخلاقي؟؟

من وجهة نظري أخلاقي جدًا بس مش عارفة بقية الناس هتشوفه إزاي.

مسكت شنطتي وقلت عربيتي كويس، مش عربية حلوة بصراحة بس عملية وبتؤدي الغرض، بصيت جوا شنطتي، بتأكد إن كل حاجة مكانها، القفازات... الأكياس... الحبل وغيرها من الحاجات اللي هحتاجها، لازم أكون حريصة إن كل حاجة تمشي صح، عشان كده مينفعش أهمل حاجة مهما باننت صغيرة، مهمتي تتمثل في الخلاص!

مشيت لحد بيت توني، دخلت الحديقة بتاعة البيت، بصيت من الشباك الأمامي بحاول أحدد مكانه في البيت عشان أتصرف بناءً على ده، كان مُغفى عليه على الكنبة اللي قدام الباب، تراييزة القهوة الصغيرة علمًا مُخدرات، كنت عاوزة أمشي لحد الباب الخلفي وأدخل منه، بس الكلبة المسكينة بتاعته نائمة ورا وأنا مش عاوزة أصحهما :

دخلت من الشباك بتاع القبو، دي حاجة مزعجة جدًا بالنسبة ليًا، أنا بخاف من القبو وبخاف من الظلام، تخيلوا كنت حاسة بيايه لما لقيت نفسي في قبو مُظلم، تحركت ببطء وأنا مش شايفة حاجة عشان معملش أي صوت،

طلعت على السلم بتاع القبو ببطء، فتحت الباب مهدوء وبصيت على توني  
عشان أتأكد إنه لسه متحركش من مكانه، كان بيشرح، كنت بكرهه بطريقة لا  
يمكن تتخيلوها، مشيت ببطء ومهدوء لحد ما وقفت وراه، غطيت فمه وكتمت  
صراخه وأنا بحقنه بحقنة مهدئة قوية جدًا، هو أنا قتلتم إنني طبيببة بيطرية ؟  
عندي مركز طبي بتاعي، بحب شغلي جدًا، الحيوانات وفيه أوي، اوفي من  
البشر!

على أي حال لو أنا كنت محظوظة بشكل كافي فتوني أدامه ساعتين تقريبًا  
لحد ما يفوق، عشان كده لازم أتحرك بسرعة، ربطته كويس بالحبل، حطيت  
حاجة جوا فمه عشان ميصرخش لو فاق، حطيت سدادات في ودانه عشان  
تمنع عنه اي صوت ممكن يفوقه، جريته لحد الجراج بتاعه وسبته على  
الأرض، فتحت باب الجراج وأنا متوترة، جريت على عربيتي وفتحتها وركبتها  
لحد باب الجراج، فتحت الباب الخلفي وشيلته بصعوبة لحد ما حطيته جوا  
العربية :

سبته جوا العربية ومشيت لحد الجنيئة الخلفية بتاعته، الكلبة بتاعته  
كانت نائمة، لأول مرة في حياتها حد هنا مش هيؤذيها، بصيت على الطوق  
بتاعها وكان اسمها مكتوب عليه، اسمها لوسي، ندهت عليها فبصتلي بكسل،  
مسكتها من الطوق وأنا بحسس عليها ويقولها: " كلبة لطيفة "  
مستعدة أراهن إنها أول مرة تسمع الكلام ده !

جريتها مهدوء لحد العربية، ودنها الشمال مقطوعة بشكل وحشي، الجرح  
متعفن بشكل قدر جدًا، جسمها مليان جروح وندوب، بتعاني من حالة جرب  
متقدمة، رقبته مجروحة من الطوق الضيق اللي توني حاطه عليها، بصتلي

بعيون مليانة حزن وخوف، دمعت وأنا بوعدھا بصوت هادي إني هوديھا مكان  
ألطف، مشت معايا وهي بتعرج وباین علما التعب؛

فتحت الباب اللي ورا ودخلتها لبيت صغير كنت عاملاه ومجهزاه لھا،  
حاطالھا مية وأكل يكفيھا لحد ما نروح المكان بتاعي، توني كان لسه نايم في  
شنطة العربية بدون حركة

تمهدت وأنا سايقة العربية ناحية البيت، هي دي ضريبة الشغل، افكرت  
كُل اللي في انتظاري في البيت لحد ما أروّح، عشان أضيع وقت بدأت أفكر  
هعمل إيه في توني لما أروّح .

أخيراً وبعد فترة قيادة طويلة جداً وصلت البيت، هي دي ميزة إنك تكون  
عايش في مكان مهجور لوحدهك ومعندكش أي جيران، مكان هادي ولطيف  
وتقدر تسترجع فيه عافيتك ككلب وتتعذب فيه بمزاج لو إنت إنسان قاسي،  
أولاً نزلت لوسي من العربية مهدوء ودخلتها قفص صغير مريح، بدأت أخرج توني  
من العربية وأجره لحد القفص بتاعه؛  
وأنا بجره لقفصه عديت على الحمقى التانيين اللي قاعدين في أقفاصهم  
بيبصولي بانكسار

القفص الأول كان فيه راجل شرير وقاسي اسمه جو، كان عنده حلبة  
بيستخدمها في مصارعة الكلاب، الفلوس اللي بتجيله كان بيصرفها على  
المخدرات، مُدمن حقير، مش عارفة كام كلب مات على إيديه وبسيبه...  
الإشاعات بتقول منات الكلاب !

لما جبته هنا لقيت في الحلبة بتاعته 3 كلاب بس، الأول كان جرو صغير خايف، رجليه مكسورة وسنانه مخلوعة من جذورها، ديله مقطوع بشكل غلط والعظم باين منه والجرح متعفن، والثانية كانت كلبة حامل جسمها مليون جروح وقيح وصيد، والأخير كان كلب شاب بعين واحدة وجسمه مليون حروق، عرفت بعد كده إن جو كان بيطفي في جسمه السجاير!

عاوزين تعرفوا إيه اللي حصل لجو؟

بداية... كسرته رجليه الإثنين في أماكن متعددة، استعملت شاكوش حديد ثقيل، خلعت كل أسنانه بكماشة، جوعته وعطشته، كنت بأكله فتافيت كل فترة، مش عاوزه يموت، خرمته واحدة من عينيه بسبخ حديد سخن زي ما كان عامل في الكلب، ببساطة كنت بولع السجاير وأطفيها في جسمه من غير ما أشرها، ومؤخرًا بقيت بخلية يتصارع مع لويس على الأكل.

مين لويس؟

لويس راجل شرير شعره طويل كيرلي، برضه كان عنده حلبة مصارعة للكلاب، مبيتكلمش كثير، ملبساه كمامة زي اللي كان بيلبسها للكلاب بالظبط، كمامة مليانة مسامير وإبر من جوا، إتصدمت لما شفها عنده وعرفت إنه بيعاقب بيها الكلب اللي بيخسر، عملته واحدة مخصوص على مقاس وشه عشان تليق بيه، كنت بستمتع وأنا بشوف الإبر بتغرز فيه وهو بيحاول يتكلم أو يصرخ.

أما لي أن فكانت في قفص جنهم، مُدمنة كانت مربية كلب وبتربطه في الجنيئة الخلفية في بيتها في الشمس كل يوم، كانت بتكسر على جسمه زجاجات البيرة الفاضية وبترمي عليه الإبر اللي فيها المخدرات بتاعتها عشان لما يتحرك

تدخل في جسمه، الكلب بتاعها كان اسمه مارتي، مارتي دلوقت إتعالج واتقوّم  
نفسياً، حالياً عايش مع أسرة لطيفة أوي؛  
لي أن بقى مربوطة من رقبتهما بسلسلة قصيرة عشان متقدرش تقف،  
مكسرة زجاج كبير وإبركتير ورامياهم في القفص بتاعها ومكسرة إيديها ورجليها  
عشان تزحف على الزجاج والإبر في ميعاد الأكل، وإلا مش هتاكل، شكلها  
مضحك أوي

ليه بعمل كده؟

عشان أفكر البشر دول إن أذية الحيوانات مش حاجة مضحكة ولا حاجة  
بسيطة  
عندي 15 قفص مليانين دلوقت، 16 لوحسبنا توني طبعاً، بس أنا زعلانة.  
فيه منهم ناس قربت تموت... متعتي هتبقى أقل!

الساعة دلوقت حالاً 10 صباحاً، منمتش طول الليل، توني احتاج شوية  
شغل، حاول يقاوم في الأول لكن لما قطعت ودنه بوحشية، الألم خلى كل حاجة  
أسهل كتير، خلعت الطوق الضيق من رقبة لوسي وحطيته حوالين رقبته،  
قطعتله جسمه بسكينة قديمة عندي عشان يحس بألم زي ألم الجرب،  
كسرتله عضم رجليه وكفوف إيديه بالشاكوش الثقيل، سبته بيصرخ من  
الوجع والألم، سبته زي ما ساب لوسي  
أنا تعبانة وهنام دلوقت... تصبحوا على خير .

\*\*\*

(6)

## سُكَّانُ الشَّوَارِعِ

أنا بحب اللافتات بتاعتهم

اللافتات اللي بتعرفني سواء أنا أو غيري من الناس اللي بتُمر بيهم طول  
اليوم معلومات عنهم؛

لافتات صُغيرة مصنوعة من الكرتون المقوى أو مكتوبة بخط رديء على ورق  
مش نضيف بتقول للناس الباقية ببساطة إن صاحب اللافتة محتاج يأكل أو  
محتاج مُساعدة

اللافتات دي مؤثرة جدًّا.

أکید حد فيكم بيشوفهم زي، بقايا بشر شايلين لافتات مش نضيفة  
قاعدین بيترعشوا جنب عواميد نور .

خليني بس أقولكم حاجة ..

محدث بيصدقهم، كثير منهم محتاج يبذل جهد أكبر عشان الناس تصدقه  
وتتعاطف معاه، وكثير منهم محتاج لافتات أحسن ومكتوبة أحسن من كده؛

لافتة كبيرة، كبيرة بشكل يخليك متقدرش تتجاهلها، تجبرك إنك تنتبه لها وتقرأها غصب عنك، ورقة نظيفة وخط كويس جدًا وحجم مُمتاز يشد عين أي حد معدي، الجُملة اللي مكتوبة على الورقة تجبر أي حد على التعاطف مع الشخص اللي قاعد وراها..

"كُنت بخدم بلدي... بخدمكم... ساعدوني أو اخدموني"

شُفت لافتة قبل كده خلت ناس كتير تتعاطف مع الست اللي حاطاها، اللافتة كانت بتقول:

" أم وحيدة مش عارفة تأكل أولادها "

مش مُهم حجم اللوحة ولا الخط في بعض الأحيان، كتير من الأحيان بيكون الأكثر أهمية هي الرسالة المكتوبة ؛  
فعمومًا أنا مش بدي فلوس إلا للشخص اللي بحس إنه بيتعب أكثر بغض النظر عن هو محتاج ولا لا .

عُمري ما كُنت زي بقية الناس اللي بتبص للناس المُشردين أو الشحاتين دول وتنصحهم نصايح زي: " شوف شُغل " أو " قوم من نص الطريق "

أنا شخص عندي قيم ومبادئ وأهداف أكثر من أي حد فيكم، عُمري ما افترضت في حد منهم إنه مش محتاج أو إنه غني أو أي حاجة من دول ،  
عُمري ما تخيلت واحد من الشحاتين دول لابس بدلة أرمانى وبييون وحذاء ماركة بيلمع، شكله هيكون مُضحك جدًا ؛

عمومًا أي حد يبصرُ فيهم إنهم يقوموا من الطريق ويشوفوا شغل، 90% منهم محتاج يشوف شغل أو يتعلم إزاي يتكلم مع غيره بدل ما هوّ بينشر بؤسه على الغلابة دول .

اكتشفت مؤخرًا إن فيه محلات وأماكن بتمنعهم من إنهم يمشوا حتى أدامها، تخيلوا!، مش بس ممنوع عليهم يدخلوها أو يقعدوا أدامها ..  
دا ممنوع عليهم يمشوا من أدامها !!

كُل واحد بيعدي من أدامهم ويوصلهم بقرف هيسهر مع واحد صاحبه بالليل في مطعم عشان يشتكوا لبعض عن صعوبة الحياة، عن ضرورة تدخل الحكومة عشان تسهل عليهم الحياة شوية. عن صعوبة كُل حاجة متجاهلين الناس الشحاتين النايمين في الشوارع في البرد ده ؛  
لكن لو طلبت منه سنت واحد هيبصلك باشمئزازومش هيفكر يساعذك، العالم للأسف مليان بناس ميعرفوش معنى الإنسانية .

بس لحسن الحظ أنا مش واحد منهم، كُل اللي بطلبه من الناس دول هو لافطة حلوة، لافطة تقنعي إنه محتاج مُساعدتي، لافطة تجبرني إني أدي لصاحبها الفلوس اللي في جيبي.

عارف طبعاَ إن منهم كثير مُدعين وميستحقوش سنت واحد، عارف إن الشخص الأسود اللي قاعد في شارع 5 بيسهر كُل يوم في بار كبير، عارف إن الست اللي بتقعد في شارع موريسون مش أم ومالهش ولاد جعائين أصلاً، وأقدر أقولك كمان إنها مدمنة هيرويين، دراعها الشمال مليان جروح مكان الإبر.

دول ناس أنا مش ببص لهم أصلاً..

بس الناس اللي زي جيسون، اللي بيقعد في آخر شارع 12، مُمكن أديله أي حاجة ؛

عزمته في يوم على كوباية قهوة، وقعدت أسمع قصته، كان جُندي خدم في العراق، شاف زمايله بيموتوا أدام عينيه، قالي بصوت مليون وجع: " المُشكلة في الأحلام... الأحلام مبتتنسش "

عينين الناس اللي زي جيسون مش بتكذب، الألم والوجع اللي في عينيه حقيقي، شكله وهو بيحكي وبيتألم كان صعب، بس لما حكي ارتاح وابتسم بألم أخيراً، كنت فخور إني قدرت أهون عليه وأسمعه؛

شكرني وصممت إنه يبجي معايا البيت عشان يتعشى معايا وأشكره أنا على ثقته إنه حكالي، كان جعان ومُتحمس فوافق على طول .

بيقولوا إنك لما بتقطع جلد بشري بتحس بشعور مُختلف، بس أنا هقول لكم الحقيقة، قطع الجلد البشري مش بيديك شعور مُختلف، بتحس كأنك بتقطع جلد حيوان أو حتى ورقة، صحيح الجلد البشري أرق من جلود الحيوانات بكثير، بس صوته وهو بيتقطع من على اللحم صوت مُمتع، مش زي ما بيحببوه في الأفلام، الحاجة الوحيدة اللي بتضايقي هي الجروح القديمة أو جروح الجرب لأنها بتعطلي وبتشوه جمال وكمال الجلد

العضلات نفس الموضوع، في البداية لازم تمر خلال الدهون، لازم يكون معاك سكين حاد، ساعات بتحتاج تقطع حاجة صلبة فلازم سكينك يكون مشحوذ كويس، اللي مُمكِن يضايقك في المرحلة دي هو صراخ الإنسان نفسه.

جيسون أو جاي زي ما بناديّه، بيصرخ كتير أوي، دي أكثر حاجة بيعملوها في المرحلة دي، بس في النهاية الموضوع كان ماشي تمام .  
أنا بريجهم، محدش بيتمنى يعيش شحات أو جعان. أنا بريجهم من العذاب الدنيوي، وخلينا صرحاء مع بعض، ممكن قاتل يقتلهم وهمّا نايمين في البرد كُل يوم بالليل، أو بنقدهم من إن البرد يجمدهم لحد ما يموتوا؛  
أنا ملاك أورشول بخلصهم من عذابهم.

مرحلة الأوتار هيّ اللي بتبقى مزعجة، يعني الوتر اللي قابلته في جسم جيسون كان أكثر وتر مُزعج وصلب قابلته في حياتي، جيسون بيعيط، مش قادر يبقى راجل ويتقبل قدره، جيسون بقى مُزعج أوي.

أنا بقدم لكم إنتم كمان خدمة، بخلصكم من الشحاتين المُزعجين اللي ملوا كُل الشوارع. جسمهم اللي مش نضيف، شعرهم المنكوش، عينهم المليانة حقد، أنا بريجكم من الشحاتين المُزعجين؛  
أنا ملاك أورشول بنضيف لكم الأرض.

عين جاي اليمين، خرجتها من مكانها وخليتها تنام على خده من غير ما أقطع أوتارها، جسمه كُلّه بيترعش زي ما يكون هيدخل في صدمة، بتمنى متكونش صدمة، لأنه لو دخل في صدمة وهوّ بالحالة دي هيموت..

وأنا مش عاوزه يموت .

إترجيته يخليه هنا، يفضل معايا، يعيش!

بس هو قرر يموت، قرر يضيع مجهودي كله، بيبي وبينكم الراجل ده بطل،  
تقريبًا هو أكثر حد تحمل، الباقيين ماتوا قبله، كُنت لسه هخلع سنانه، أنا مش  
شيطان عشان أعذب جُثة!  
الموت له احترامه .  
عمومًا بُكرة ضحية جديدة ويوم جديد .

ملحوظة:

الشخص ده تم القبض عليه واعترف بكُل جرائمه وحاليًا بيتعالج في  
مستشفى الأمراض العقلية وأول ما حالته تتحسن هيدخل السجن مدى  
الحياة.

\* \* \*

(7)

## الراديو

36,400,000

بيقولوا إن ده عدد الحضارات العاقلة اللي عايشة في الكون بتاعنا، الكلام ده وفقاً لمعادلة درايك الشهيرة .

خلال آخر 78 سنة كُنا بنبُث للفضاء الخارجي كُل حاجة عننا، برامج الراديو بتاعتنا، برامج التليفزيون، تاريخنا وأعظم اختراعاتنا، كُنا بنبُث كُل حاجة للفضاء الخارجي بانتظام ؛

بالضبط زي ما يكون الكوكب بتاعنا واقف في الفضاء ببصرخ بكل قوته وبيقول كُل معلوماته مستي أي حد بس يسمعه .

التساؤل الأهم اللي كان مسيطر علينا هو... هل إحنا في الكون لوحدنا ؟؟

معادلة درايك بتقول 36 مليون حضارة !

بس برغم إن بقالنا قرن تقريبًا بنبُث كُل حاجة عننا، مسمعنش أي رد من

أي حد

إحنا في الكون لوحدنا.

الكلام ده كان حقيقي لحد من 5 دقائق بس ..!

جالي إشارة من شوية، إشارة متناسقة ومتسقة بشكل ميخليش فيه أي شك، في البداية كُنت شاكك إنه نوع من الانتقال الثنائي، قست 1679 نبضة تقريبًا في دقيقة واحدة بس اللي كان ناقل الحركة شغال فيها ، بعد كده استمر الصمت تاني .

الأرقام مكانش لهما أي معنى في البداية، مُجرد خليط عشوائي من الدوشة والضوضاء، بس النبضات كانت موحدة تمامًا ، والتردد ده من بعد البث ده وهو صامت تمامًا؛ البث ده لازم يكون من مصدر صناعي، بدأت أدور على البث مرة ثانية، وفورًا لاحظت حاجة خلت قلبي يقف ثواني من الرُعب !

1679... دا نفس طول رسالة أريسيو اللي وصلت لينا من 40 سنة عبر الفضاء الخارجي برضه.

بكل حماس بدأت أحط الأرقام في المستطيل الشهير المكون من 73 خانة بالطول و73 خانة بالعرض، وقبل ما أوصل لنص المستطيل تأكدت من حاجة مُهمّة؛

الأرقام اللي وصلت هي الأرقام الزوجية اللي بين 0 و10 ؛  
الأرقام الذرية للعناصر المسؤولة عن الحياة البشرية .

خد كان بيسمعنا طول الوقت ده !!!  
خد كان بيسمعنا طول الوقت ده وعاوزنا نعرف إنه سامعنا وموجود !

بعدها جالي فكرة، الرسالة الأصلية اللي وصلت كوكب الأرض من 40 سنة، دا معناه إن في حياة بتتواصل معنا من على بُعد 20 سنة ضوئية تقريبًا، وجود

حضارة على بُعد زي ده كان طفرة علمية هتهز الكوكب كله، دا هيعمل ثورة في كل حاجة على الأرض خصوصًا علم الأحياء الفلكية.

الرسالة بتتكرر تاني ..!

المرة دي بتوصلني ببُطء، بطء متعمد، استمرت حوالي 5 دقائق، بالطبع خلّيت جهاز الكمبيوتر يسجلها المرة دي، لما خلّصت الرسالة والصمت بدأ مرة تانية،

بدأت أكتب الرسالة تاني بالراحة :

0.0.1.1.0.1.0

فورًا عرفت إن دي مش نفس الرسالة اللي وصلتني قبل كده، عقلي كان هينفجر، عارفين ده معناه إيه ؟

في حضارتين مُختلفتين بيحاولوا يتواصلوا معنا في وقت قليل جدًا، البث المرة دي كان 248 نبضة بس، 248 رقم !

المرة دي كُنت مُتأكد إنها رسالة ولأزم أترجمها وأعرف معناها، الموضوع كان غريب، إيه هي الرسالة القصيرة بالشكل ده وجاية لينا من حضارة تانية بتواصل معنا ؟

على الكمبيوتر الرسائل الصُغيرة بالشكل ده بتكون عادة نص... نص كتابي .!

معقول ...؟

بيبعثوا لينا رسالة بلغة من لغاتنا !!

الموضوع مكانش هيبقى مُفاجئ لوفعلأ حد بيسمع البث بتاعنا، إحنا بنبث  
لُغتنا بقالنا أكثر من 70 سنة، طب لو حد بيسمعنا طول المُدة دي ليه محاولش  
يتواصل معنا غير دلوقت ؟

بدأت أحاول أترجم الرسالة بلغة الترميز الاولى اللي بتعتمد على ال0 وال1  
خلصت ترجمة النبضات وتحويلها لحروف بعد وقت قُصير، الرسالة اللي  
ظهرت أدامي كانت أكثر حاجة مُخيفة شُفتها في حياتي كُلها، الرسالة كانت  
بتقول :

( اسكتوا... والاهيحددوا مكانكم )

ملحوظة: الموضوع ده كتبه واحد بيقول إنه كان شغال في مشروع مُهم في  
ناسا للبحث والتواصل مع الحضارات الثانية اللي مُمكن تكون موجودة في  
المجرة .

\* \* \*

( 8 )

## تحدي أم حقيقتا؟

جارت متعود ينسى كُل حاجة لما بيبقى سكران...

فاكر مرة لما سكر ونسي إنه بيكره التشيز كيك وأكل تشيز كيك كاملة لوحده، رفض يدي لأي حد ولو قطعة واحدة منها، الصُبْح لما حكينا له اللي هو عمله وإحنا بنضحك، بطنه وجعته ورجع كُل اللي أكله، فضل قرفان إنه أكل التشيز كيك فترة كبيرة جدًا وكُل ما يفتكر يرجع .

جارت كمان متعود يقبل أي تحدي لما بيبقى سكران :  
ده كان مخليه خليط غريب بين الخطورة والضحك.

آخر يوم دراسة لينا قبل امتحانات آخر السنة، عملنا حفلة تخميم كبيرة وعزمتنا كُل أصحابنا، كُنَّا جنب البحيرة الكبيرة، الفكرة كانت إن الحفلة تكون مُقتصرة بس علينا وعلى شوية من أصحابنا لكن قبل ما نفهم إيه اللي حصل، المُخيم بتاعنا كان مليون ناس بتحتفل !

برغم كُل الناس دي إلا إنك كان مُمكن تحدد جارت من وسطهم بكُل سهولة، جارت مُدمن حفلات ؛

كان ماشي يتطوح وسط الناس وفي إيده زجاجة تيكيللا شبه فارغة، أول مرة كُنت أشوفه سكران بالشكل ده، بس هوّ دا جاريت، دايمًا بيفاعثني بحاجات مش متوقعة، جاريت كان أكثر حد سكران في الحفلة وكان حريص إن كل الناس اللي في الحفلة تعرف إنه سكران بالشكل ده :

كان ماشي وسط الناس بيتحدى أي حد يتحداه بأي حاجة يعملها عشان يثبتلنا إنه مش بيخاف وأجرأ من أي حد فينا !

الساعة 3 بعد نُص الليل بدأت الحفلة تهدي تمامًا، على حدود الساعة 4 كان فاضل بس 7 أشخاص، كُنا قاعدين حوالين النار وبنتكلم، ناس مننا كان مُغى عليهم أونايمين من التعب، جاريت كان فايق جدًا !

على حدود الساعة 4:30 صباحًا، كل الناس اللي في المكان كانوا ناموا إلا جاريت وبنت شقرا جميلة كانت قاعدة جنبه وأنا بس.

كُنت ساند ضهري على جذع شجرة وساكت بتفرج على السما، لحظة سكون مريحة بعد دوشة الحفلة اللي انتهت .

جاريت بص للبنيت وطلب منها تتحداه، تُطلب منه أي حاجة مجنونة يعملها، البنيت فكرت ثواني وبعدها طلبت منه ينط من فوق الشجرة للبحيرة العميقة، لو هوّ مش سكران كان هيعرف إن دي فكرة مش حلوة، بس البنيت كانت حلوة وهوّ كان سكران فالأمور كانت عادية، البنيت تحدته رسميًا:

كُنت بتفرج عليهم بصمت..

جاريت مببعرفش يعوم :

جري لحد الشجرة... طلع فوقها... أنا كُنت قاعد بصمت وبتفرج

أنا الوحيد فهم اللي عارف إن جاريت مبيعرفش يعوم ،

أنا الوحيد فهم اللي عارف إنه سكران لدرجة إنه نسي ده

كُنت بتفرج وأنا مستمتع؛

أدام عينيا كان جاريت بيغرق ويحاول يستنجد بحد

البنيت هربت في فزع وأنا غمضت عينيا باستمتاع

أخيرًا هخلص من جاريت وهكون الأكثر شعبية في المدرسة.

\* \* \*

(9)

## أكل الخنزير

فتحت عينيًا ببطء شديد، الدنيا كانت بتلف بيًا وحاسس بألم رهيب في رقبتي، كُنت عطشان، ودي كانت أول حاجة ألاحظها، مشيت بلساني على شفائي وبدأت أحاول أركز في الحاجات الموجودة حواليا، جسي كان بيوجعني ولمّا ركزت شوية اكتشفت إن السبب كان إني مربوط في كرسي حديد في نُص أوضة فارغة تمامًا، حيطان الأوضة متسخة وقذرة، الأرض تحت رجليًا كانت باردة ومبلولة شوية:

لمبة واحدة صُغِيرَة محطوطة في نُص الأوضة، متعلقة من السقف بسلك صُغِير، مش منورة الأوضة كويس فمسببة خيالات كتير وسايبة أركان الأوضة مظلمة، أدام عينيًا كان فيه باب مفتوح في نص الحيطه، ومش شايف حاجة من الباب غير إنه في وسط ممر.

حاولت أركز شوية وأصفي ذهني، حاولت أفكر أنا جيت هنا إزاي وليه، غمضت عينيا وحاولت أركز بأقصى قوتي، تنفست ببطء وأنا بحاول أفكر، كنت هتجنن، عاوز أفكر سبب وجودي في المكان ده!

مكنتش فإكرأي حاجة.

فتحت عينيا وتنفست تاني بشكل طبيعي، رقبتي لسه بتوجعني، بدأت أسمع أصوات من آخر الممر بعيد، صوت صرخ... صوت عويل... صوت زئير، الأصوات كلها جاية من بعيد وبرغم كده كنت متوتر جدا:

صرخت بنبرة صوت أشبه بالبكاء: "ساعدوني !!"

حسيت إن صدري كان هينفجر لما إتكلمت لكن تحاملت على نفسي، أخذت نفس عميق وندت تاني: "فيه حد هنا؟!، ساعدوني!؟"

محدث رد عليا برغم إن الأصوات مُستمرة، عرفت إن الصراخ مش هيجيب نتيجة فقررت أسكت وأحاول أحرر نفسي، بس أنا كُنت مربوط كويس أوي في الكرسي، كُنت بحارب خوفي وهلعي، كُنت بحارب عقلي اللي بدأ يفكر في مئات السيناريوهات المُربعة للحاجات اللي في انتظاري، لو بس أقدر أفكر!

فجأة... سمعت صوت خطوات بتقرّب من الباب المفتوح، خطوات سريعة وواضح إنها لحد صُغِير، بدأت أركز، كل حواسي منتبهة ناحية الباب، كُنت بصلي وبدعي ربنا إن دي تكون النجدة:

ولد صُغَيْرٌ دخل الأوضة، لابس أحمر، مغطي وشه بقناع بلاستيك على شكل شيطان، كان واقف أدامي ببصلي وعينه الزرقاء مليانة فضول، حاولت أكلمه لكن حسيت إن فيه حاجة مش طبيعية، عينيه... عينيه اللي باينين من ورا القناع أكبر من عينين الناس الطبيعية، جسي كُله قشعرماً اكتشفت ده وخُفت، لكن حاولت أتغلب على خوفي وصدمتي لأن الولد ده مُمكن يكون السبيل الوحيد لنجاتي ؛

همست له: "هاي، مُمكن تفكني؟"

قربت مني خطوة، هز راسه بس من غير ما ينطق ولا كلمة ،  
حركت إيديا عشان أوريه إني مربوط في الكرسي وأنا بقوله: " فكني من فضلك، أنا مش المفروض أكون هنا، أنا هنا عن طريق الخطأ "

بصلي من ورا الماسك اللي هو لابس، وقف أدامي مُباشرةً، قرب مني وهمس ليًا بصوت واطي: " إنت عملت حاجة وحشة... "  
كُنت حيران ومش فاهم حاجة، هزيت راسي وقلتلته: " لا!، لا دي غلطة، أنا معملتش حاجة "

فجأة عينيه الزرقاء الضخمة إتملت حزن غير طبيعي وهو بيقول: " إنت عملت حاجة وحشة جدًا جدًا "

هزيت راسي تاني وأنا بقوله بخوف: " لا!، أنا أسف بس أنا مش فاكر حاجة، مُمكن تفكني بس؟! "

فجأة وقبل ما حد فينا يتحرك مرة تانية أو نقول أي حاجة راجل ضخم دخل الأوضة، كان وزنه زايد، وشه مليون غضب مُرعب، كان ماسك بندقية في إيدته ؛

بدأت أدافع عن نفسي وصوتي مليون خوف: " أنا معملتش حاجة، أنا مش المفروض أكون هنا "

الراجل الضخم تجاهلني تمامًا ولف وشه ناحية الولد، مسكه ورماه بقوة ناحية الحيطه، الولد سند بظهره على الحيطه وهو يبص للراجل بخوف ، بدون أي كلام الراجل رفع البندقية بتاعته وحطها على جبين الولد، وفجر راسه تمامًا!، قطع من راسه وجمجمته ومخه تناثرت في كل مكان حواليا، كُنت خايف بطريقة مش طبيعية وأنا بتفرج على جُثة الولد وهي بتهمار على الأرض، كُنت بتنفس بسرعة وجسمي كله بيترعش، صرخت بأعلى صوت: " اللعنة، إيه ده!! "

الراجل تجاهل صراخي تمامًا ووطى على جُثة الولد شالها وحطها على كتفه وخرج من الأوضة بدون ولا كلمة .

فجأة الممر تردد فيه صوت ضحكة شريرة جدًا، أصوات كتير كانت بتزأر بفرحة، غمضت عينيا من كُتر الخوف، الصوت كان مُخيف وعالي، كل مللي في جسمي كان بيترعش من الخوف؛ بعد دقيقة تقريبًا صوت الضحكة اختفى، استجمعت قواي وفتحت عينيا، كُنت بحاول انسى اللي شُفته من شوية .

" هاي "

جسمي كله إتفض بخوف لما اكتشفت إن فيه شخص واقف جنبي، لبسه كان بسيط، تيشيرت عادي وبنطلون جينز، شعره بني، تقريبًا في أوائل الثلاثينات من عمره، عينيه مطفي منها نور الحياة وعلى وشه نظرة غريبة : كُنت بعيط من الخوف وأنا بسأله: " إيه اللي بيحصل ؟، أنا فين؟ " حط إيديه في وسطه وهو يبصلي وبهز راسه ويقول: " إنت بقى الجديد؟، إنت واللي زيك بتقرفوني جدًا "

أسئلة كتير كانت بتتنصارع عشان تخرج من بقي بس قبل ما أتكلم أو أنطق أي كلمة حط إيده على بُقه وأمرني بالسكوت، بصلي وهو بيكمل كلامه: " من

شكلك أقدر أقول إنك شُفت فعلاً شوية حاجات مُرعبة من الموجودة بالمكان، نظرة عينيك مليانة خوف ورعب، إنت شُفت حاجة... صح؟، صدقني مهما كُنت شُفت مش هتكون مُرعبة أد اللي جاي، بس إنت بقالك هنا خمس دقائق بس وحاسس بالرعب بالشكل ده!"

مقدرتش أسكُت أكثر من كده، سألته بلهفة: " أنا فين؟، إنتم عاوزين متي إيه؟ "

حط إيديه ورا ظهره وهو بيقول: " أراهن إنك عاوز تُخرج من هنا... صح؟، عاوز ترجع بيتك... ترجع لعيلتك... ترجع لحياتك " قاطعته: " أرجوك، مهما كان اللي عملته، أنا آسف جدًّا، أنا آسف فعلاً، بس أنا فعلاً مش فاكِر حاجة ! "

ابتسم وهو بيقولي: " إنت معمלתش أي حاجة، إنت أذيت نفسك، إنت بجد مش فاكِر حاجة؟ "

هزيت راسي وأنا بعِيْط، قلبي كان بيدق بقوة وهو مليان خوف ورعب؛ بصلي باشمزاز وهو بيقول: " إنت إستنيت لِمَا مراتك راحت الشُغل وشنقت نفسك... إنت ميت "

فجأة الذكرى ظهرت من وسط الضباب، عينيًا وسعت بقوة وعلى أد ما كُنت عاوز أنكر كلامه على أد ما كُنت عارف إنه عنده حق، أنا فعلاً قتلت نفسي، أنا انتحرت، الذكرى ظهرت فجأة في دماغي من العدم .

الراجل تجاهل نظرة الخوف والصدمة اللي مرسومة على ملامحي وهو بيقول: " أنا داني بالمُناسبة، أنا الراجل الثاني هنا، أنا المسؤول عن عمليات

التوجيه، أنا بس عاوز أخلص معاك بسرعة لأنني زهقت من كُتْر ما بكرر الكلام على المُنتحرين المُقرفين اللي زيك، مسموح ليك بسؤال واحد قبل ما نبدأ "

كان بيُبص عليا وأنا بحاول أركز عشان أقدر أشوف سؤال أسأله، الوضع كان مُرعب، أنا ليه انتحرت؟، كُنت بحاول أفكر أي حاجة، بدأت أركّز، أنا إترفدت من شُغلي، دي كانت البداية. غمضت عينيًا وبدأت أحاول أركّز شوية بشوية عشان أفكر باقي الذكريات، إترفدت من شُغلي ومش هقدر أدفع الرهن العقاري بتاع البيت وهخسر البيت، مراتي... تيس... اكتشفت وكانت هتسيبني وتمشي، مكانش عندي حلول، مفيش أدامي أي خيارات تانية، إترفدت من شُغلي ومعنديش مُدخرات، مفلس وقريب أوي مُشرد، ومراتي بتكرهني، بس دا مش كل حاجة، فيه حاجة كمان، أيوه، افكرت، مراتي كمان كانت بتخونني، أنا شُفت رسائلهم على تليفونها وهي نايمة، حياتي كلها تدمرت تمامًا، ساعتها قررت إن الانتحار هو الاختيار الوحيد المنطقي

داني كان متضايق، خبطني على وشي وهو بيقولي: " هتسأل قبل ما نبدأ ولا لا يا وغد؟ "

سألته أول سؤال جه في بالي: " إحنا في النار (الجحيم)؟ " ضحك وهو بيقول: " كُلّكم بتسألوا نفس السؤال، لا دي مش النار، دا مكان اسمه المزرعة السوداء، ولا مش أنا اللي سميت المكان ده كده، هنا بتجيلنا أرواح المُنتحرين، بصراحة في البداية مكناش عارفين المفروض نعمل إيه بأرواحكم البائسة، وبصراحة كان بيجيلنا ناس كويسة اضطرت تقتل نفسها لسبب أو لآخر، أنا شايف إن مينفعش تتعذب طول عُمرِك عشان انتحرت في لحظة ضعف... صح؟، مرحبًا بيك في المزرعة السوداء "

سألته بخوف: " إنت قلتلي إنك الراجل الثاني هنا، مين المسؤول هنا؟ "

ضحك وهو يقول: " مع إن ليك الحق في سؤال واحد بس إلا إني هجاوبك،  
المسؤول عن المزرعة السوداء هو الخنزير "

كُنت خايف ومش فاهم حاجة وأنا بسأله: " خنزير؟ "

داني إتضايق وهو يقول بنفاد صبر: " ممكن تسيبني أكمل ؟، الخنزير هو  
المسؤول عن المكان ده، وبيستخدم قدراته عشان يقدر يمسي المكان، كل  
الفوضى اللي موجودة حواليك أو هتشوفها عبارة عن نتائج لتجاربه المجنونة.  
المزرعة السوداء في البداية كانت مكان لطيف، بس الخنزير كانت عاوز المكان  
يبقى مُختلف، كان عاوز يخلق وجهة نظره الخاصة وينفذها، الناس اللي  
هتشوفهم، الوحوش اللي هتشوفهم، دي نتائج لتجارب الخنزير، صنع كائنات  
مليانة كره وشروحد، المكان مليان فوضى، باختصار المزرعة السوداء عبارة  
عن سيرك للمسوخ والوحوش، وللأسف إنت هتكمل حياتك للأبد هنا "

كُنت حاسس بخوف أول مرة أحس بيه، لا، مش معقول هي دي نهايتي، دا  
مش حقيقي، أنا هصحي قريب وهكتشف إن ده حلم، لا... لا... دا كابوس، دا  
أكيد كابوس!

داني خبطني على وشي تاني وهو يقول: " لا معلش بلاش تدخل في حالة  
هيستيريا، أنا لسه مخلصتش كلامي "

رفعت عينيا المليانة دموع وبصيت له بخوف، ابتسم بلطف وهو يقول: "  
دايمًا فيه خيار... أكل الخنزير "

بصيت له بخوف وأنا بسأله: " يعني إيه؟ "

ابتسم أكثر وهو يقول: " الموضوع بسيط، أكل الخنزير، لو قدرت تعمل ده  
هيكون ليك فرصة إنك ترجع حياتك مرة ثانية "  
سألته بصوت بترعش: " ولو مقدرتش؟ "

رد ببساطة: " هتروح النار، احسم اختيارك، يا تفضل معانا، يا تأكل الخنزير، لو اخترت تفضل هنا هسمحك تروح، بس خليني أحذرك، اللي مستنيك في آخر الممر حاجة مُخيفة وسيئة "

بدأت أفكر بس تفكيري كان مُنحصر في حاجة واحدة، يعني إيه أوكل الخنزير، بس مهما كان معناها لو الموضوع فيه ولو نسبة ضئيلة من الأمل إني أرجع حياتي تاني هنفذه. مش هعيش أنا هنا في المزرعة السوداء دي، الاختيارات إما إني أروح النار... أو... أوكل الخنزير؟، بس لو أكلت الخنزير هيبقي ليّا فُرصة إني أرجع حياتي تاني، قبل ما أتكلم داني شاوري وِقالي: " هسيبك تفكر شوية، هرجع لك بعدين "

صرخت وأنا بعيط: " أنا عاوز أوكل الخنزير "

مكانش عندي استعداد أقضي ولو ثانية زيادة في المكان ده، كُنت سامع صوت ست بتصرُخ من مكان قُريب، كانت بتصرخ كأنها بتشوف أسوأ ألوان التعذيب، حُفت أكثر من صوتها، داني لاحظ ده فابتسم بشدة.

صوت الست كان ميان رُعب وألم، داني ابتسم وهوّ بيَسألني: " صوتها بتتعذب جامد... صح؟ "

بدأت أسمع صوت ضرب شديد وصوت صرِيخ الست بيزيد وبيعلى، كُنت مش قادر أنتفض من الخوف وأنا بقوله: " أرجوك... خليني بس... خليني أوكل الخنزير، مش عاوز أقعد هنا أكثر من كده "

داني بصلي وِقالي: " هرجعلك تاني، استمتع بوقتك هنا وإنت لوحذك، فكر كويس في موقفك، اختار كويس وافتكر دايمًا، إنت السبب في إنك هنا! "

خلص كلامه وخرج من باب الأوضة :

الدموع كانت مالحة وبشي وأنا بعَيْط بخوف..

الست مبطلتش صرخ لساعات طويلة !

بعد شوية وقت حسيت كأني بنام، عينيًا ثقيلة وراسي ثقيلة ومش قادر

أتحمل فتمت، جسمي كان واجعني وكنت حاسس بحرق حوالين رقبتي مكان

الجبيل، صُداع مش طبيعى كان بههد راسي، كُنت مُرهق وخايف وتعبان

حسيت وأنا نايم بحاجة بتدخل الأوضة، بعدها بشوية حسيت بألم رهيب

في صابع رجلي، فتحت عينيًا وطردت النوم وأنا بتنفض، صرخت وأنا بحاول

أتحرك لكن القيود كانت رابطاني في الكرسي كويس

لمحت دم كتير تحت رجلي، بصيت على مصدر الدم، كان من صوابع رجلي

ولما بصيت كويس صرخت برعب.

على الأرض تحت رجليًا كان فيه راجل بدون إيدين، ييزحف على الأرض كأنه

دودة، جسمه كان مُترهل ومفهوش شعر خالص، رجليه مربوطة بسلك شائك

بيجبره يزحف على الأرض وهو بيتألم، عينيه مليانة جنون وحمرا بشكل مش

طبيعى، أسنانه فيها دم مكان ما عضني في رجلي، حوالين رقبتة فيه سلسلة أو

طوق، طويل وماشي لحد برا الأوضة، وعلى باب الأوضة راجل طويل واقف

بيتفرج علينا، كان بيؤمر الراجل اللي تحت رجلي إنه يهجم علينا تاني؛

عضني تاني والمرة دي كانت مؤلمة أكثر، عيطت وصرخت بقوة والراجل

الطويل بيتفرج علينا وهو مستمتع بألمي، صرخت في الراجل الدودة: " ابعد

عني، كفاية "

حاولت أضربه برجلي في وشه، حاولت أتجنب سنانه، أخيرًا قدرت أضربه

برجلي في وشه بقوة، راسه خبطت في الأرض من قوة الضربة، الراجل الطويل

كان مُستمع أوي بس فجأة فيه دُخان أسود بدأ يدخل الأوضة ويملاها،

سمعت صوت السلسلة والسلك وهوّ بيتجر على الأرض، الراجل الطويل والراجل الدودة خرجوا من الأوضة، بدأت أصرخ بجنون: " خرجوني من هنا، أنا مش لازم أكون هنا "

سمعت صوت السلاسل بتبعد عن باب الأوضة، صرخت تاني بس كُنت عارف من جوايا إن محدش هيساعدني، حاولت اهدى شوية، الغضب والصريخ مش بيجيبوا نتيجة، الموضوع مش سهل ولا بسيط .  
بعد شوية، سمعت حد يقرب من الأوضة، كُنت في حالة مُزربة، عقلي مليان أفكار سوداوية، صوت الصريخ والتعذيب اللي جاين من برا دول أسوأ موسيقى تصويرية مُمكن حد يتخيلها، أيديا بتوجعني جداً، كُنت بحاول أحضر نفسي للأسوأ، صوت الخطوات قرب أكثر من الباب، دخلت واحدة ست ووقفت أدامي وهيّ بتبصلي، عين من عينها كانت مش موجودة، شعرها مُجعد ومليان تراب وقذارة، بشرتها شاحبة، لبسها قديم ومقطّع، مش قادر أحدد سنّها بصراحة، بصتلي باهتمام وهيّ بتسألني: " لسه بتفكّر؟ "  
سألتها: " إيه؟ "

قربت مني شوية وهيّ بتقول: " لسه بتفكّر هتأكل الخنزير ولا لا؟ "  
بصيت لها بفضول وأنا بقولها: " أه... إنتي مين وعاوزة إيه؟ "  
قالتلي: " في يوم من الأيام كُنت في مكانك ده، بحاول أقرر مصيري، مكنتش مصدقة إن ده بيحصللي، مكنتش مصدقة إن فيه حياة بعد الموت، مهمّا تخيلت ومعهمّا قُلتلك مش هتخيل مدى بشاعة المكان ده "  
سألتها بسرعة: " إنتي كمان انتحرتي؟، إنتي بني آدم زبي، إنتي مش واحدة من المخلوقات المُرعبة دي؟ "

ضحكت وهي تقول: " حاجة مُحزنة إنك تسأل سؤال زي ده، بس أنا متفهمة ده، أه أنا كُنت مُنتحرة زيك. وأنا هنا من وقت طويل، طويل جدًا، بس دا باختياري، أنا اللي قررت أفضل هنا "

شاورت براسي ناحية الباب وأنا بسألها: " إيه اللي برا؟، إيه اللي بيحصل؟" سندات ظهرها على الحيطه وهي بتتنفس بعمق وتقول: " مش هقدر أوصفك المكان، بس هو مش شبه أي حاجة مُمكن تتخيلها، إنت هتخرج من الأوضة وهتشوف ال... المكان ده... و..."

سكتت شوية وهي بتكمل باللم: " لازم تشوف بنفسك عشان تفهم "

سألها بخوف: " لأي درجة المكان ده سيء، يعني الناس المتحورين دول بيؤذوا ويموتوا بعض؟ "

هزت راسها وهي تقول: " الموضوع مش بالبساطة دي، إنت محتاج سنين طويلة عشان تفهم المكان ده كويس، سنين إنت متملكهاش، دلوقت لازم تاخذ قرار، تفضل أو تأكل الخنزير، أنا سمعت إن النار أسوأ من هنا، المتحورين والمُنتحرين هنا في المزرعة السوداء بيقتلوا ويغتصبوا ويذبحوا بعض، السؤال الحقيقي هيكون إنت هتقدر تنجوا أو إيه قبل ما حد أو حاجة تموتك؟ "

سألها بتردد: " أفهم من كده إنك اخترتي تفضلي هنا؟، طب ليه محاولتيش تأكلي الخنزير؟، أنا أصلًا مش فاهم معنى الكلمة، بس لو الموضوع فيه فرصة ولوضئيلة إننا نرجع تاني وناخد فرصة تانية، مش هختار أبدًا إني أفضل هنا!"

ابتسمت بحزن شديد وهي تقول: " ليه؟، ليه اخترت أفضل هنا؟، الموضوع بسيط في الحقيقة، أنا جبانة، أنا كُنت جبانة وأنا عايشة وبقيت أجبن لما مُت، لما عرضوا عليًا الاختيارات اخترت إني أفضل هنا، مش عارفة لو رجعت مش عارفة إيه بيستناني، أنا اخترت اختياري بدافع الخوف "

سألتهما: "يعني إيه الخنزير؟، ولو اخترت أوكله هيعمل فيا إيه؟" بصتلي والحزن بيملى ملامحها: "أنا أسفة بس إنت لازم تكتشف ده لوحدهك، بس خليني أحذرك، فكَر كويس أوي قبل ما تاخذ قرارك، ساعات مواجهة خوفك بتبقى أحسن من الاستسلام للخوف وساعات العكس، من فضلك كُن شجاع"

خرجت من الباب، كُنت بصرخ فيها بخوف: "أعمل إيه؟" وقفت مكانها وبصتلي ثواني من غير ما تلف وشها وهي بتهمس: "أكل الخنزير" واختفت.

الصمت ساد المكان مرة ثانية، عقلي كان جواه ألف سؤال، حاولت بيأس أوصل لقرار، فيه حاجات كتير في الموقف مش قادر أفهمها بشكل كامل، الموضوع كان غريب عليا ومش مفهوم، الموت المفروض ميبقاش بالشكل ده، مش عارف إيه اللي أنا فيه، بس مهما كُنت مُتخيل مكنتش هتخيل الكابوس ده، مش عارف إزاي المفروض أخذ قرار في موقف زي ده؟!

المكان ده، المزرعة السوداء، أنا مقدرش أفضل هنا، بس لو اخترت أروح النار؟، طب لو قررت أوكل الخنزير ومنجحتش؟، قلقي كان مسيطر عليا بشكل مؤسف، هنا... هنا المكان اللي بيتجمع فيه الناس اللي زيي، المُنتحرين، المكان مش بس فيه المنتحورين والوحوش، مُمكن ألاقي مجموعة من المُنتحرين وأعيش وسطهم بأمان؟، أعتقد ده هيبقي اختيار لطيف ومريح.

لا، بس أنا مش هقضي حياتي هنا بعد الموت، أنا مش هستسلم لخوفي، حتي لو فيه شعاع أمل ضعيف فأنا مُتمسك بيه، أنا مش هسلم نفسي

للمشكوك لورفضت أوكل الخنزير، أنا هاؤكل الخنزيرواللي يحصل يحصل، أنا  
خلاص قررت تمامًا  
أنا هاأكل الخنزير!

صرخت بصوت عالي: "داني، داني، أنا أخذت قراري خلاص "  
بعد ثواني سمعت صوت خطوات بيقرب من الباب، داني دخل من باب  
الأوضة ونظرة غضب على وشه، قتلته: " أنا أخذت قراري، أنا اخترت أوكل  
الخنزير "

بسخرية رد عليًا: " أتمنى تكون فكرت كويس من ساعة ما أنا سبتك "  
رديت عليه بقلق: " أعتقد إنك كُنت هتعمل كده برضه لو إنت مكاني "  
داني مش ووقف ورايا وهو يقول: " أنا كُنت في مكانك في يوم من الأيام،  
بس اخترت اختيارمُختلف شوية "  
عينيًا وسعت بخوف قبل ما داني يحط كيس قماش أسود على راسي،  
مُكُنْتش شايف حاجة، حاولت أتُنفس لكن الموضوع كان صعب جدًا:

داني حررني من القيود، جسسي ارتاح لما حسيت بالحرية تاني، حركت  
كتفي وإيديا شوية عشان الدم يجري فيهم تاني، داني قالي بنبرة أمر: " سيب  
الكيس على راسك وامشي ورايا "

مشيت بخطوات خايضة، حطيت إيدي على كتف داني عشان مش عارف  
الطريق ومشيت وراه بهدوء، وخرجنا من الأوضة :

لما خرجنا بدأت أسمع أصوات مُكُنْتش سامعها قبل كده، صوت حديد  
بيخبط في حديد، صوت حد بيتعذب، صوت حد بيتقيء، الأصوات دي كلها  
حاصررتني، وخيالي للأسف بدأ يصور ليًا مشاهد وصور مرعبة اعتمادًا على

الأصوات اللي أنا سامعها دي، مسكت كتف داني بقوة وأنا بترعش، مشيت وراه وقلبي بيدق بخوف؛

سمعت صوت قوي جاي من ورانا، داني واضح إنه مش مُهتم بالأصوات دي، حسيت بخطوات ورانا وفجأة حسيت بنفس سُخن على رقبتى من ورا، حسيت كأن حد لحس رقبتى بلسانه الخشن، الخوف خلاني دمعت وجسمي كله بيترعش؛

حد همس ليًا من ورايا: " رايح تأكل الخنزير مش كده؟ " حسيت بحاجة رطبة بتمسك راسي من ورا وبتحاول تبعدني عن داني لكن أنا كُنت ماسك فيه كويس، الصوت القذر كَمَل من ورايا: " دا خنزير جعان يا صديقي، حاول تتأكد إنك هتأكله وجبة مُمتازة "

الصوت كان مليان شر وحقد بطريقة مكنتش مُتخيلها، ولحُسن حظي الشيء ده تراجع لورا وسابني ماشي ورا داني، داني كان ماشي وهو ساكت، الجو كان دافئ بس الريحه مكانتش لطيفة، كُل ما كُنا بنمشي أكثر الجو كان يببرد أكثر والرياح بتبقى باردة وجسمي بدأ يترعش، مش عارف إحنا فين بس زي ما نكون في مكان مفتوح، أنا مش شايف طبعًا بس مُتخيل ومُستنتج إننا في مكان مليان طبيعة.

فجأة درجة الحرارة ارتفعت تاني، زي ما نكون دخلنا فرن، جسمي إنتفض من التغيير المفاجئ ده، الأصوات هنا عالية زي ما يكون صوت ماكينات أو أدوات عملاقة زي الموجودة في مصانع الحديد، كُنت شامم ريحة رماد وحاسس بتراب بيظير عشان يملئ وشي برغم الغطا، جسمي كان بيترعش من الخوف؛

داني وقف فجأة فللأسف خبطت فيه، رجعت خطوة لورا وبدأت أعتذر له، سامع صوت حركة جاي من أدامنا، صوت حديد بيخبط في أرض معدنية، وصوت حاجة زي القباع (صوت الخنزير)

فجأة صوت خنزير تردد في المكان، كان عالي ومزعج لدرجة إني رفعت أيديا، عشان أسد وداني، الصوت كان قوي وعالي، بدأت أحس بخوف مش طبيعي، لوده صوت خنزير فالخنزير ده عملاق !

داني قال بصوت عالي: " جبتلك واحد تاني عاوز يوكل الخنزير " كُنت مستني أسمع إجابة، الكيس اللي فوق راسي كان مخلي العالم كُلّه أسود، ركي كانت بتترعش من الخوف وجسمي مليان عرق.. فجأة داني قال: " زي ما تحب "

حسيت إن فيه حاجة فاتتني زي رد الطرف التاني مثلاً، داني مسكني من ايدي ورماني لأدام بقوة وهو بيقول بلهجة أمة: " أكل الخنزير " لفيت حوالين نفسي بخوف، مش شايف حاجة، كُنت حاسس إني هتقيء من كُتر الخوف، مش قادر أسيطر على نفسي ، أنا مش عارف أنا فين ومش عارف إيه الرعب اللي مستنيني في اللحظة دي، كُنت بعيط وأنا بقول لداني: " أرجوك، خليني أشوف إيه اللي بيحصل ! "

فجأة حسيت بداني ورايا، كان بيذقني لأدام ناحية حاجة أنا مش شايفها، وبرغم الغطا اللي على راسي حسيت إن فيه كيان ضخم أدامي، مشينا خطوة لأدام وشميت ريحة مُرعبة، ريحة مخيفة ومش طبيعية، داني ذقني تاني عشان يجبرني أكمل، كُنت حاسس بحاجة كبيرة أدامي بس مش عارف إيه هي، الريحة كانت قدرة ومقرفة جداً، الهوا السُخن كان مخليني عرقان، تقيأت جوا الكيس

الأسود على هدومي كُلِّها، عيظت وأنا بحاول أشيل الكيس، داني خبطني على  
إيدي بقوة، حاولت أهدى شوية عشان أتمالك أعصابي، كُنت بعَيْط...  
خايف... بأُس !

ريحة القيء كانت مُقرفة، مع الريحة القذرة الموجودة في المكان أصلاً،  
معدتي كانت بتُعاني، جسيمي كُلِّه كان بيترعش، فجأة حسيت بحاجة بتتحرك  
أدامي بالظبط  
أنا كُنت واقف أدام الخنزير؛

وبرغم الكيس الأسود اللي مغطي وشي بس كُنت بدأت أكون مُدرك لحجم  
الخنزير، الهواء السُخن دا مكانش رباح، دا كان تنفسه  
داني مسك إيدي وحطها على جسم الخنزير، بدأت أتحمس جسمه،  
رجعت لورا بخوف لكن داني كان ماسكني بقوة وأجبرني أكْمِل، إيدي كانت  
بتترعش من الخوف، حجم الخنزير بدأ يتضح بالنسبة ليًا ؛

كان عملاق ووزنه تقريبًا قريب من الطن، وصلت لوشه وحسيت بيه بيفتح  
بقه بالراحة. أسنانه كانت في حجم سكين المطبخ تقريبًا، كُنت ماشي بإيدي  
علمهم بالراحة

الخنزير قبع مرة تانية بصوت عالي، صوته كان مُرعب، قلت لداني بنبرة  
حزينة: " شيل الكيس ده أرجوك "

داني قرب مني وهمس في ودني بصوت واطي: " صدقني إنت مش هتتبسط  
لوشلت الكيس "

الخنزير خبطني بمناخيره فنطيت بخوف وحاولت أرجع لورا، رفعت إيديا  
أدام وشي وأنا بعيط بخوف، داني أمرني تاني: " أكل الخنزير "  
صوته كان قاسي وهو بيكمل: " إنت اللي اخترت، دلوقت لازم تتعامل مع  
اختيارك، دي فرصتك الوحيدة إنك ترجع، أو يمكن طعمك ميعجبش الخنزير  
فيقرر إنك تروح النار، أدامك طريقة واحدة عشان تكتشف ده "  
عينيا وسعت بخوف وأنا بترعش وبسأل بخوف: " ميعجبوش... طعم...  
طعمي؟! "

" أدخل فم الخنزير "

زقني لأدام، حسيت بدفا الخنزير فصرخت فيه: " لا، إنت أكيد متقصدش  
اللي أنا فهمته .... "  
داني صرخ فيا بغضب: " أدخل فم الخنزير، وشق طريقك لجوا لحد ما  
الموضوع ينتهي "  
بصيت ناحية صوت داني وأنا بقول: " أرجوك، أكيد فيه طريقة تاني، أنا  
مش هقدر أعمل كده "  
كُنت بقول الكلام بصوت مهزوز من الخوف ومن وسط دموعي، داني زقني  
لأدام تاني ناحية الخنزير وهو بيصرخ بغضب: " يلا، إنت اللي اخترت، الموضوع  
قرب ينتهي ودي فرصتك الأخيرة "

كُنت حاسس بنفس الخنزير قريب مني، ريحته ونفسه السخن خلوني عاوز  
أتقيأ تاني بس منعت نفسي، أنا حاسس إنني إتجننت، أكيد اللي أنا فيه دلوقت  
مش بيحصل، أكيد فيه طريقة تانية غير كده، أنا مش هعمل كده، مش هقدر  
أعمل كده !

فجأة افكرت كلمات الست في الأوضة: " ساعات مواجهة خوفك بتبقى  
أحسن من الاستسلام للخوف وساعات العكس، من فضلك كُن شجاع "

دي فرصتي الوحيدة إني أرجع لديني تاني، أنا غلطت غلطة كبيرة لما قررت أقتل نفسي وأنتحر، عاوز أرجع عشان أقدر أغير حياتي مرة ثانية، لازم ألاقي طريقة، أنا ممكن أوكل الخنزير وميعجبوش طعمي وأروح النار بعد كل ده، لازم أركز وأخذ قرار!

همست وأنا ببص لـفوق: "يا رب، ساعدني وسامحني يا رب"  
مديت إيدي لأدام وبدأت ألمس الخنزير تاني، مشيت بإيدي مهدوء لحد ما وصلت لفمه، كان فاتح فمه ومستيني، خلاص، أخذت القرار ومفيش تراجع؛ مسكت سنانه ونطيت جوا فمه، وقعت على بطني جوا بقه، لسانه كان تحتي، كُنت بترعش من شدة الخوف، بتنفس بصعوبة، بدأت أشق طريقي لجوا زي ما داني قالي، كُنت بزحف على ركبتي، الخنزير رفع راسه وقفل بقه وفجأة لقيت نفسي جوا فمه ملفوف في لسانه القدر  
درجة الحرارة عالية واللُعب مالي فمه، كُنت خايف جدًا وبعيَّط وبحاول أشق طريقي وسط اللُعب اللزج ودرجة الحرارة العالية، بدأت أحس بأسنانه الضخمة الحادة

وفي اللحظة دي تحديدًا بدأ الخنزير يمضغ  
صرخت بألم رهيب وأنا حاسس بكل عضمة في جسمي بتتكسر، سنانه الضخمة كانت بتكسر في جسمي بدون رحمة، العضم كان بيتكسر وبيخترق اللحم والجلد ويخرج برا جسمي، الم مش مُمكن تتخيلوه مها حاولت أوصفه ليكم، جسمي كان بيتشنج بعنف وأنا بدخل في حالة صدمة ...

كان بيمضغ بقوة وجسمي بيتكسر تحت سنانه ولسانه اللزج بيلعب بيا وبينقلني من اليمين للشمال، مش قادر أتحمل الألم، مش قادر أسيطر على نفسي، الألم فوق احتمالي!

مفيش أدامي اختيارتاني غير إني أستمر في الزحف ؛  
صرخت، عينيًا كانت بتوجعني من كُتر الدم والعرق واللعب اللي دخلوا  
فيها، إيدي الشمال كانت لسه سليمة، كُنت بدور على أي حاجة تنقذني بيأس،  
الدم بينفجر من في بقوة، الخنزير لف لسانه بقوة على جسبي، الألم قوي  
والظلام بيحاول يسيطر عليًا، كُنت بصرخ بقوة وأنا بحاول أحافظ على عينيًا  
مفتوحين وما أستسلمش للظلام  
صرخت: " يا رب، خليه يتوقف "  
وبكُل الألم اللي فيًا انفجرت: " أرجوك يا رب خليه يتوقف "

فجأة فيه حاجة بدأت تتغير، أنا تقريبًا عديت مرحلة الأسنان ووصلت  
للنهاية، أنا قربت خلاص، صرخت وأنا بحاول أشجع نفسي: " يلا يا وغد...  
يلا!"

شهقت بقوة وأنا بزق جسبي لأدام بقوة، الدم لسه بينفجر من في بقوة،  
الظلام بيحاول بقوة يحكم سيطرته عليًا، جسبي في حالة صدمة وبدأت  
أضعف وأستسلم لدرجة إني حتي مش قادر أصرخ ؛  
بأخر قوة فاضلة في جسبي وقبل ما الظلام يبلعني تمامًا زقيت نفسي بقوة  
لأدام ..

ظلام... سقوط... صراخ  
كُنت بصرخ بقوة، حرارة، درجة حرارة عالية جدًا، حاسس إن جسبي  
بيدوب، حاسس إني بنصهر، صور عشوائية وألوان غريبة بتدور حواليا  
بسرعة شديدة ؛  
جسبي بيقع في هوة مالهاش آخر، حاسس إني هفضل أقع فيها لأخر حياتي.

فجأة فتحت عينيأ وأنا بقع، نفسي رجع فجأة فشبهت بعنف، وشي خبط  
في أرض خشبية بقوة وقسوة، مناخيري إتكسرت تمامًا ؛

أنا مش بقع خلاص ؛

فيه ألم رهيب على شكل دايرة حوالين رقبتي، كأنه حرق رهيب بيؤلني  
كُنت نايم على الأرض.

فتحت عينيًا ببطء، حسيت بالظلام بيتراجع والنور بيحكم ويسيطر مرة  
تانية

كُنت في الأوضة اللي انتحرت فيها ؛

حطيت إيدي على رقبتي وأنا بتحسسها بألم، الحبل اللي كُنت هشنق نفسي  
بيه انفصل من الحلقة اللي في السقف، أنا مُمتش .

جسمي كان بيتعرش بارتياح، الحمد لله، زحفت على الأرض وأنا بعيط،  
جسمي كله بيتعرش بقوة ؛

أنا نجحت، أنا أخذت فرصة تانية .

بصيت للسما بضعف وأنا بهمس بكل الامتنان اللي في الدُنيا: " الحمد لله،  
الحمد لله "

وعدت نفسي ووعدت ربنا إني مش هعمل كده تاني، مش هنتحر وأفرط في  
نعمة الحياة تاني، أنا هحاول أصلح الأمور كلها تاني، هصلح كل حاجة.

مش عارف قعدت أد إيه في التجربة دي، حاسس إن التجربة دي استمرت  
للأبد ، كُنت مُنهار نفسيًا ؛

بس أنا عارف إني مش هفرط في حياتي تاني، هعيش كل لحظة في عمري زي  
ما ينبغي، هساعد الناس اليأسَة والمُحبطة، هوصل لناس بيفكروا في الانتحار  
وهساعدهم في إنقاذ حياتهم ؛

مش عاوز حد فيكم يعيش التجربة اللي أنا عشتها...  
مش عاوز حد فيكم يضطر يوكل الخنزير.

ملحوظة: اتضح بعد كده إن كل ده نتيجة لنقص الأوكسجين في الجسم

فسبيله هلاوس بصرية وسمعية ولأنه منتجروهو عارف إنه بيعمل حاجة غلط  
فالتجربة دي جت بالشكل ده، إنه هياخد فرصة تانية بس لازم يعاني شوية  
عشان يعرف قيمة الحياة .

\* \* \*

(10)

## استحواذ شيطاني

(1)

سنة 2005 تم تعميدي رسمياً كقس، بس أنا كان عندي مُشكلة في إلقاء الخطابات ووعظ الناس، كُنت بتوتر جداً أدام الناس ومش بعرف أتكلم، عشان كده كان لازم ألقى شُغل تاني غير الوعظ في الكنيسة. معظمكم هيتفاحي بالي أنا هقوله ده وهيسمعه لأول مرة لأن الموضوع سري جداً، لكن الكنيسة الكاثوليكية عندها قسم خاص بالاستحواذ، والمسؤول عن التحقيق في القضايا الخاصة بالماورائيات والغرائب، ومن ضمن الماورائيات دي طبعا الاستحواذ الشيطاني :

الاستحواذ الشيطاني مش موضوع شائع جداً. في الحقيقة نسبة إصابتك باستحواذ شيطاني لا تتعدى الـ 1% .

أغلب الناس من جميع الديانات حول العالم مبيؤمنوش بموضوع الاستحواذ الشيطاني وبيفسروا الموضوع على إنه مرض عقلي لكن الحقيقة غير كده تماماً، إحنا في حرب عنيفة ضد الشياطين، وعلى عكس المعتاد الاستحواذ الشيطاني مش بيحصل بس للأشخاص المهتمين بعقد صفقات مع الشيطان، بيحصل كمان للي بيقروا في السحر، لعبدة

الشیطان، لى ببقروا تعاونذ بهدف التسلية، لى ببلعبوا وبجا، لى ببحاولوا ببحضروا أرواح الأموات، لى ببحاولوا بتمعقوا فى علوم التنجيم، لى ببلعبوا بأوراق التاروت، لى ببسلموا نفسمهم للذجالين والمشعوذین والحاجات اللى زى دى.

عشان يُصاب شخص بالاستحواذ لازم بكون إيمانه بالله ضعيف وبكون ببحاول بكون علاقة ما مع الشيطان، بس مع الأسف مش ببدرکوا فداحة الأمر غير وهماً وصلوا لمرحلة ببقدروش بتراجعوا فىها ؛  
لما ببوصلوا للمرحلة دى محدش ببقدر يساعدهم غير حاجتين، بجدید الإيمان بالله وقس متخصص فى عمليات طرد الشياطين ومعالجة الاستحواذ من الكنيسة الكاثولیکية ؛

إحنا لینا طقوس خاصة بیرجع أصلها لسنة 1614 لطرده الشياطين، الكنيسة الكاثولیکية هی الكنيسة الوحيدة اللى لديها العلم والقوة اللى يكفوا لمحاربة الشياطين دول .  
لما حصلت الأحداث اللى أنا على وشك أحکمها لكم كنت تابع للأب فرانك، الأب فرانك هو رئیس قسم طرد الارواح الشريرة فى بسمارك، داكوتا الشمالية.

قالى مرة إنه خلال الأربعین سنة اللى اشتغل فىهم فى القسم، واجه حالتین بس من الاستحواذ الشیطانى.  
أول حالة كان شیطان مستحوذ على جسم ست عجوزة فى قرية صُغيرة، لسخرية القدر القرية دى كان اسمها بحيرة الشيطان، الست دى قدرت تغرق زوجها و3 قطط فى البحيرة لوحدها .

الحالة الثانية كانت لمراهق هدد صاحبتة إنها هتموت في عيد ميلادها السادس عشر، في البداية الأب فرانك كان مُعتقد إنها حالة كُره نابع من المراهقة اللي بيمربها الولد والبنيت، لكن يوم عيد ميلادها لقوا جُثتها في حمام السباحة اللي المياها بتاعته تحولت للون الأحمر بسبب دمها، جنب حمام السباحة كان مكتوب كلام بلغة مش مفهومة بدم الضحية، الأب فرانك عرف فورًا إن الكتابة دي باللغة اللاتينية وكانت الرسالة بتقول: " إت إيداو إكزالتيبتور باركينز "

أولو ترجمناها هتكون: " إنه يُبعث "

القصّة دي بترعبي لحد دلوقت كُل مرة بسمعها فيها .

مع مرور الوقت وشُعلي في القسم اكتشفت فعلاً إن 90 % من حالات الاستحواذ الشيطاني اللي بيتم تبليغ القسم بيم بيكونوا حالات اختلال عقلي أو مرض نفسي ومالهومش أي علاقة بالاستحواذ أو بالشياطين؛ بعد فترة قصيرة ولأني محظوظ بشكل كافي سُفت فعلاً أول حالة استحواذ شيطاني حقيقية، كانت تجربة مش هنسأها أبداً.

كُنا في مكان القسم اللي مش هقوله طبعاً لما جالنا بلاغ من أسرة بيشتكوا فيه إنهم شاكين إن البيت بتاعهم مسكون بكيان شرير وخطير وإن الأسرة دي كانوا جربوا كُل حاجة فعلاً قبل ما يلجؤوا لينا :

البيت كان في منطقة اسمها ماندان، بلدة صُغَيِّرة جنب نهر ميزوري ببسمارك، البيت كان عادي جدًا، زيه زي اي بيت طبيعي، شكله مش مُرعب ولا مُخيف ولا أي حاجة، بصيت للأب فرانك وقلتلته بلا مبالاة: " شكله مش بيت مسكون خالص ! "

بصلي بهدوء وقال: " شكلهم ميبقاش زي البيوت المسكونة ".

قابلنا الأسرة وبدأنا نتكلم معاهم، كل فرد لوحده، كُنَّا حريصين جدًا على ده، وهُمَّا كمان كانوا عاوزين كل واحد فيهم يكلمنا على انفراد، أنا إتكلت مع رب الأسرة، الأب، اللي قالي الكلام المُرعب ده :

" من يوم ما سكننا في البيت وأنا بعاني من اكتئاب شديد ورغبة قوية في الانتحار، مُعظم الوقت بفكر أرمي نفسي من شباك الدور الثاني أو اشنق نفسي في القبو، وفي يوم من الأيام كنت قاعد في البيت لوحدي، كنت نايم وصحيت على صوت دوشة، لما صحيت فوجئت بشماعات الهدوم طيارة أدام الدولاب، ولما فُقت كويس شُفت باب الدولاب بيتقفل ببطء شديد، قعدت في السرير وجسمي بيترعش من الخوف، كنت فاكر إنها أضغاث أحلام أو حاجة زي كده، بس الموضوع كان حقيقي تمامًا، بدأت أصلي لربنا وأنا بجري عشان أنزل أقعد في غرفة المعيشة، غرفة المعيشة فيها نور اقوى وأنا كُنت مرعوب جدًا، فجأة حسيت بحاجة قوية جدًا، اقوى من إني أقاومها بتضغط على صدري، مكنتش قادر أتنفس إطلاقًا، بدأت أدوخ وأحس إني مش قادر أخد نفسي، آخر حاجة فاكرها قبل ما يُغى عليًا كانت إني بقع من على الكنبه، أثناء الإغماءة فاكر إني كُنت بحلم إني بقتل أسرتي كلها، بكسر جماجمهم بعصاية بيسبول معدنية، بقتلهم بدون رحمة، لما كُنت بقتلهم فاكر كويس أوي إني كُنت لابس بدلة أرنب ...

الحلم كان حقيقي جدًا، كُنت قادر أشوف حتت من مُخهم وجماجمهم ودمهم على حيطان البيت، الدم كان مغرق الفرو بتاع بدلة الأرنب، لما صحيت وفُقت من إغمائتي كُنت مشلول مش قادر أتحرك، كنت حاسس بوجود كيان مُخيف معايا في المكان وسامع صوت همس مُرعب جاي من القبو بيقولي: اقتل نفسك، اقتل عيلتك كلها ؛

حاولت أتكلم مع مراتي أو مع أي حد غيركم بس كُنت خايف... كُنت خايف

" جدًا "

الأب فرانك كان يتكلم مع الأولاد. ولد وبنّت وعن اللي تعرضوله في البيت أو شافوه وحسوا بيه، الأطفال كانوا خجولين، بس مع لُطف الأب فرانك تكلموا في النهاية .

الولد قال للأب فرانك عن كسارة بندق عندهم في البيت كان بيشفوها طائرة وهي بتتفتح وتتقفل، كأن حد خفي ماسكها وبيلاعب بيها، لما حاول يفتح بقة عشان يصرخ حس بايد ثقيلة خفية كتمت نفسه ومنعته من الحركة تمامًا، كان حاسس بمخالب الشيطان على حد تعبيره على صدره، كأن الشيطان بيجره يتفرج على الكسّارة الطائرة وهي بتتفتح وتتقفل في الهواء. أخيرًا حس إنه تحرر، قام يجري بسرعة تجاه غرفة المعيشة، أهله كانوا لسه سهرانين، قاعدين على الكنبية والنور كان مقفول، غرفة المعيشة كانت مظلمة تمامًا، الولد حاول يتكلم معاهم لكنهم مكانوش بيتحركوا ولا يبردوا عليه، لما قرب منهم لاحظ إن ملامحهم جامدة ولونهم شاحب، عيونهم كانت بيضا تمامًا ومفهاش ني، فجأة بقمهم إتفتح مع بعض وطوفان من الصراصير بدأ يخرج من بقمهم بسرعة !

آخر حاجة الولد فاكرها هيّ إن كان فيه صوت شيطاني مُخيف جاي من القبو، كان حاسس إن وزنه خفيف وإنه فقد السيطرة على جسمه وحس كأن الصوت بيجره يرجع أوضته تاني.

فرانك سأله لو يعرف هُما جابوا الكسّارة دي منين ؟، الولد قاله إنه مش فاكِر، فرانك قال إن ساعات السحرة بيلعنوا الأشياء الغريبة زي كسّارة البندق.

البنّت قالت لفرانك إنها ساعات بتشوف ولد صُغِير اسمه كودي وبتكلم معاه، بتشوف وشه محفور في الحيطان أو واقف وراها لما بتبص في مرآة من مرايات البيت، بس أكثر مكان كانت بتشوفه فيه: هو قبو البيت ؛

كودي كان يقولها إن فيه راجل شرير قتله ودفنه في أرض مهجورة، قالها كمان إن الراجل الشرير ده بيلبس بدلة أرنب لونها أبيض، وإن كودي ببشوفه في القبو وبدلته عليها دم وماسك مضرب بيسبول معدني، هي مرة شافت الأرنب ده وسألها لو عاوزه تلمس المضرب بتاعه، جرت وهي خائفة وبتصرخ ؛ في نفس الليلة وش كودي ظهر لها على حيطه أوضة النوم بتاعتها وأمرها تفضل بعيدة عن الراجل اللي لابس بدلة أرنب، عشان الراجل ده راجل شرير، وإنه عاوز منها حاجة مش حلوة.

الأب فرانك سألها: "تعرفي الراجل الأرنب ده كان عاوز منك إيه؟"  
البننت ردت على طول: "كُل حاجة، كودي بيقول إنه عاوز تضحية وعاوز دم عشان يُبعث"  
"يُبعث؟"

"يُبعث من المكان المُظلم"  
فرانك سألها: "تفتكري إن كودي والراجل الأرنب دول أشباح؟"  
البننت ردت بتلقائية: "أنا مش مؤمنة بوجود حاجة اسمها أشباح، دول شياطين وبيتظاهروا إنهم أشباح عشان يخدعونا"

خلصنا كلام معاهم وكنت متخيل إننا بس هنرُش مياه مُقدسة ونتلو كام صلاة ونعلمهم صلوات تحمهم من الشياطين، لكن اتفاجئت لما فرانك قالي: "أنا محتاج أراقب البيت من جوا بكاميرات مُراقبة، عاوز أعرف إيه اللي بيحصل تحديداً بالليل، عاوز أعرف إحنا بنتعامل مع إيه بالطبط؟"  
الأسرة كانوا يائسين وخايفين عشان كده وافقوا على طول ؛  
بعد كام ساعة كُنَّا ركبنا كاميرات مُراقبة في المطبخ، أوض النوم وغرفة المعيشة، لكن الحاجة الغريبة هي إن فرانك مطلبش كاميرا مُراقبة في القبو.  
للأسف عرفت ليه فرانك عمل كده !!

( 2 )

محطيناش كاميرات مُراقبة في القبول لأن ده المكان اللي استقرينا إننا هنقعد فيه وهنركب فيه الشاشات عشان نراقب البيت والأسرة:  
سألت فرانك إذا كانت المُراقبة بالفيديو حاجة شائعة أو متداولة في عمليات الاستحواذ، قالي لا بس هوّ بيحب يعمل كده عشان يقطع الشك باليقين .

من كلام فرانك وتصرفاته هوّ مش مصدق الأسرة دي، هوّ معتقد إنهم مجموعة من الجُبناء ومن كُتر جُبْنهم وخوفهم بدأوا يشوفوا حاجات مش موجودة، بصراحة كُنت حاسس إنه آخذ موقف شخصي منهم مش عارف ليه؟

من كُل الأماكن اللي مُمكن نستقر فيها، فرانك اختار إننا نقعد في القبو، المكان اللي بيطلع منه الصوت الشيطاني والمكان اللي البنّت شافت فيه الأرنب وبدلته اللي مليانة دم، أدامنا كان فيه 3 شاشات كُبار متابعين بهم كاميرات المُراقبة ،

الأب فرانك قالي إنه اشترى الكاميرات والشاشات دي من فلوس تبرعات الكنيسة وطلب مني ما أقولش لحد لكن أنا قررت إني هبلغ الكنيسة أول ما نرجع، مش صح إنه يسرق من فلوس التبرعات ومش صح أبدًا إني أتستر عليه.

أحاسيس مُتناقضة كانت بتتصارع جوايا، شعور إني بعمل حاجة غلط وأنا براقب الأسرة أثناء حياتهم اليومية وإحساس إني خايف لأنني قاعد في الظلام في القبو المُرعّب ده، اللي زاد الطين بلة هوّ إصرار فرانك إننا ننقل كُل

الأنوار ونقعد في الظلام لوحدها، كُنت متطمئن إنني مش لوحدي لكن كل شوية  
ببص حواليا عشان الأزنب ميفاجئنيش بمضربه المعدني؛  
فرانك بصلي بغضب وهو بيقول: " إنت كده هتوترني، أنا مُتأكد إن مفيش  
حاجة في البيت، دلوقت تشوف "

كُنت متضايق من طريقة كلامه، الأب فرانك قس كبير ولازم يكون أهدي  
من كده لكن مُمكن هو شاف حاجات أكثر مني عشان كده مُتأكد إن مفيش  
حاجة في البيت، كُنا بنراقب الأسرة وهُمّا بيمارسوا حياتهم الطبيعية في البيت  
عادي، الأب كان ماسك الإنجيل وبقرا منه بصوت عالي؛  
بعد شوية بدأت أحس بحاجة غريبة، حسيت بوجود كيان تقيل بيضغط  
عليّ، بدأت أسمع همس خافت جاي من بعيد، كان بهمس ليّيا بأكاذيب  
ويحاول يززع ثقتي في كل حاجة، قاومته وأنا بسأل فرانك بعصبية: " هو  
الشیطان مؤمن بالله؟، أو مُمكن يززع إيماني بالله؟ "  
فران بصلي بهدوء وهو بيقول: " هو الشيطان بيحاول طول الوقت، بيدور  
على الجزء الضعيف في نفسك ويحاول يدخلك منه، أتمنى إن يكون إيمانك  
قوي، لأن إيمانك لومش قوي، هتكون دي نهايتك "  
بلعت ريق بصعوبة، أنا عارف إنني مؤمن وإيماني قوي، بس هل إيماني  
قوي كفاية عشان أقدر أقاوم الشيطان!؟

كُنت خايف، متوترو جسمي بيترعش من الخوف، حاسس بحجر تقيل على  
صدري، فرانك بصلي ببرود وقال: " بيتغذوا على الخوف "  
فرانك معملش أي حاجة أكثر من إنه زود خوفاً ووترني أكثر!  
كُنت خايف وعاوز أبص ورايا عشان أتأكد إن مفيش حاجة لكن قررت  
إنني متلفتش حواليا وأركزي في مراقبة الشاشات بس.

الأسرة كلها راحوا أوضهم وقرروا يناموا، البيت كان هادي تمامًا، مفيش أي صوت، مفيش أي حركة :

فرانك كان جايب قهوة ودوناتس، حاول يقدملي منهم لكن أنا رفضت . بعد شوية لمحت حركة من تحت الغطا بتاع سرير الأولاد، مكنتش مصدق عينيًا وفكرت إن حد من الأولاد بيتحرك وهو نايم، الحركة تكررت تاني، كُنت على وشك أحذر فرانك لأنه مكانش باصص على الشاشة لكن قبل ما أقول أي حاجة الغطا طارفي الأوضة أدام عينيًا .

فرانك لسه مش آخذ باله، بدأت أبلع رقي ببطء وبصعوبة، بحاول أتكلم لكن حاجة مانعاني، كُنت خايف، بحاول أطمئن نفسي إن ده بيحصل في دور وأنا قاعد في دور تاني، بس بعد كده لمحت حاجة مخيفة جدًا، لمحت وجه جوا الغطا ؛

الغطا نزل زي ما يكون على جسم شخص، جسم طفل تحديدًا، كان لسه طابير في الهوا لوحده، بعد شوية فرانك آخذ باله لوحده، شفايف الوجه اللي تجسد جوا الغطا كانت بدأت تتحرك، فرانك مد يده بسرعة عشان يعلي الصوت؛

الصوت كان بيقول بهمس: " تعالوا العبوا معايا... أنا مدفون برا...  
خرجوني والعبوا معايا "

البننت قعدت على السرير، كُنت حاسس إن عينها منورة في الظلام، فرانك قالي إن دي خدعة من الكاميرات وأنا مكنتش مصدقه:

البننت بدأت ترتل حاجة باللغة اللاتينية

(إت إيداو إكزالتبيتور باركينز، إت إيداو إكزالتبيتور باركينز، إت إيداو إكزالتبيتور باركينز)

" إنه يُبعث... إنه يُبعث... إنه يُبعث "

قامت من السرير ومشت لحد الحديقة وبدأت تخبط رأسها في الحديقة بكل قوتها

وقفت وأنا بصرخ في فرانك: " لازم نمنعها حالاً "

بصلي بغضب وصرخ فيا بوحشية: " اقعد مكانك "

حاولت أعترض: " لكن .... "

المرة دي فهمني: " إحنا بنراقب لوقتي، منقدرش نتدخل إلا ما نحدد إحنا بنتعامل مع إيه "

قعدت مكاني تاني، خايف وبترعش،

اللي بيحصل ده فوق قدرتي على الاحتمال.

بدأت أعيّط وأنا بقوله: " كده هيؤذيهم ! "

فرانك بصلي وببرود قالي: " مش هيقدر يقتلهم "

فجأة البنات بعدت عن الحيط ومشت لحد السرير، الدم مالي وشها وبينقط على الأرض، رجعت تنام تاني وكان مفيش حاجة حصلت:

الغطا وقع فوقها وكان مفيش أي حاجة حصلت، الوضع هدي تاني وأخوها مصحاش كأن محصلش حاجة، فرانك كان لسه مُصمم إننا مندخلش ولا نتحرك، بدأنا نراقب الشاشات تاني بهدوء.

الوضع استمر لساعات ما بين شُرب القهوة والتأؤب ومراقبة فرانك ،

لحد ما بدأت أسمع الأصوات!

سألت فراك بقلق: " إيه ده؟ "

بصلي كأني مغفل وقالي ببساطة: " أصوات "

على الصوت شوية، كانت محادثة هامسة بين إثنين رجالة بيتفقوا يقتلوا

الولد ويغتصبوا جُنته:

خُفت أكثر وبدأت أترعش وأصلي،  
فرانك سألني وهوّ مش مُهتم: " إنت كويس؟ "  
رديت بعصبية: " مش قادر أقعد هنا وأشوف وأسمع كل ده بيحصل! "  
بصلي وهدوء قال: " منقدرش نعمل حاجة، إحنا هنا عشان نراقب الوضع  
بس! "  
وزي ما يكون الشيطان مستني كلامه عشان يحول الوضع لجحيم :

فجأة كسارة البندق طارت في الأوضة وبدأت تفتح وتتقل بسرعة، باب  
أوضة النوم كان مقفول، وعلى الحيطه ظهر ضل، ضل شخص لابس زي  
الأرنب، الأولاد كانوا يبصرخوا وبيعيطوا من الخوف، صوتهم كان يوجع القلب،  
مش صوت الطفلين اللي في الأوضة، صوت مئات الأطفال اللي بيعيطوا  
وببصرخوا بخوف وهلع  
باب الأوضة إتفتح وإتقل بصوت عالي كأن حد خبطه بقوة، ضل الأرنب  
اختفى، كسارة البندق وقعت على الأرض، صوت الأطفال توقف تمامًا والولد  
والبنت صحوا قلقانين ببصوا حوالهم:  
مش هقدر أتحمل أكثر من كده، وقفت واستعديت ل.....

ورايا كان واقف الأرنب، زي ما وصفوه بالظبط، فروه مليون دم والمضرب  
المعدني عليه دم بينقط على الأرض:

بصوت مُخيف سألني: " تحب تلعب معايا يا وغد؟؟ "  
رجعت لورا بخوف، وقعت على ضهري وحاولت أقف مقدرتش، قعدت  
على ركبتي، بيعط من الخوف، غمضت عينيًا، حاولت أصلي أو أقول أي حاجة  
لكن حسيت إني بتخنق، إيدين بتتلف حوالين رقبتي تخنقني وتكتم نفسي،

بدأت أسمع أصوات شيطانية بترتل حاجة مخيفة بلغة مش معروفة وصوت  
مرعب؛

كُنت بحارب وبقاوم عشان أقدر آخذ نفسي، حاولت أتكلم وأنا بعيط  
وبشهب بعنف: " أنا بنفيك أيها الروح النجسة، جنبًا إلى جنب مع كل روح  
شيطانية، باسم الله بنفيك "

الأزنب اختفى وبدأت أتنفس كويس، وقعت على الأرض وأنا بشهب بعنف ؛  
بصيت ناحية فرانك اللي لسه قاعد على كرسيه بهدوء وأنا بصرخ فيه  
بغضب: " فرانك ! "

فرانك كان مرمي على كرسيه، بقه مفتوح وعيونه مغمهاش حياة، صراصير  
مالهاش عدد بتخرج من بقه، ومن وسط الصراصير دي صوت شيطاني جاي  
منه بيقول: " أنا عارف عنك كل حاجة يا وغد، عارف أسرار طفولتك، عارف  
إنك شكاك ومش مؤمن "

كان لازم أقاومه وما أستسلمش له، سيبتته وجريت ناحية السلم، لازم  
أتطمئن على الأولاد الأول؛  
وساعتها شُفته..

دولاب كبير نازل على السلم، حاولت أزقه بكل قوتي عشان يطلع على  
السلم، قدرت أزقه لحد ما وصلت للممر اللي فيه أوضة الأولاد :

في الممر كان واقف ولد صُغِير لابس زي بيسبول وكاب مكتوب عليه اسمه  
(كودي)

رمى كورة بيسبول عليها دم وفضلت متابعتها بعينيا لحد ما وقفت تحت  
رجليا ولما بصيت عليه بعدها كان اختفى:

سبت الكورة وجريت ناحية أوضة الولد والبننت بسرعة، حاولت أفتح الباب لكن كان فيه قوة قافلاه، مهما حاولت بكل قوتي كان الناحية الثانية أقوى مني والباب فضل مقفول، أخيرًا قدرت أفتح الباب وجوا الأوضة كان الولد والبننت حاضنين بعض وبيعيطوا من الخوف، حضنتهم وقلت لهم يهدوا وإن كل حاجة هتبقى تمام.

بعد شوية فرانك والأب دخلوا الأوضة يجروا، الأب سأل بخوف: " إيه اللي بيحصل؟ "

فرانك سأله بغضب: " إنت مسمعتش بنتك وهي بتخبط راسها في الحيطه " كنت لسه خايف وأنا ببص لفرانك رغم اني عارف ان اللي شفته كان مجرد هلاوس سببها الشيطان ولعب بيّا وصور ليّا حاجات مش حقيقية، برغم كده كنت حاسس بعدم الأمان تجاه فرانك؛

قلت للأب إننا لازم نمشي ونسيب البيت حالًا، رفض وصمم إنه يفضل في البيت، قتلته إننا حتى لو عملنا جلسة طرد للأرواح الشريرة هيفضل البيت مكان خطير ومش آمن،

بصلي بغضب وهوّ بيقولي: " لو عاوزين تمشوا إنتم امشوا، إحنا مش هنسيب بيتنا، هنفضل هنا ونصلي طول الليل لحد ما نتغلب على الشيطان " حاولت أقنعه: " أنا عارف إن حضرتك راجل مُتديّن، أنا كمان زيك، بس بيتك مليان شرور، مش هتقدر "

بصلي بغضب وهوّ بيقول: " أنا هفضل وهحمي أسرتي، لو أنا مقدرتش أحمي أسرتي محدش هيقدر "

مغرور جدًا وبصراحة مش عارف إذا كانت دي طبيعته ولا دا بسبب الشيطان لكن حاولت معاه مرة ثانية: " أظن إنك محتاج تشوف تسجيلات كاميرات المراقبة "

بغضب شديد: " أنا مش محتاج أشوف حاجة "

حاولت أفهمه: " الشيطان هاجم أولادك و.... " قاطعني: " أخرجوا من بيتي يا أعوان الشيطان، إنتم اللي جبتوا الشياطين وإنتم جايين " كُنت على وشك أرد عليه لكن فرانك بص له ببرود وهو بيقولي: " خليه براحته وبللا نُخرج من هنا "

على أد ما كُنت مصدوم من فرانك على أد ما كُنت عاوز أخرج من البيت المشؤوم ده، قبل ما نخرج أخذت كسارة البندق معايا، مش عارف إيه اللي خلاني أعمل كده بس يمكن حسيت إنني محتاج حاجة من البيت معايا عشان أدرسها عن قرب، مُمكن عشان احبي الولد منها، فكرت إنها مُمكن تكون ملعونة والروح الشريرة متعلقة فيها، فرانك فك الكاميرات والمُعدات وجهاز كل حاجة عشان نمشي من هنا:

الساعة كانت 4 بعد نُص الليل، فرانك قالي إنه يعرف مطعم بيفتح طول الليل ورُحنا عشان نتعشى أونفطرأوناكل عموماً:

طلب الأكل وبصلي وقالي: " دول مجانيين، مش عارفين هُما بيعملوا إيه " مرديتش عليه، فرانك للأسف كان قس مش كويس، وبالتأكيد لا يصلح للمُهمة دي، قبل المُهمة دي كُنت مؤمن لكن للأسف بعد اللي شُفته الشكوك ملت قلبي، مُمكن ده يكون تأثير الشياطين عليًا ؛

قلتلته بغضب: " هوّ ميقدرش يعمل غير إنه يصلي، هوّ مش طارد أرواح شريرة وبالتأكيد مش مُدرب على الحروب الروحانية والمعارك الشيطانية زينا " فرانك ضحك على كلامي بسخرية، سكتت شوية وبعدين قال بهدوء: " عاوز رأيي، البيت ده لازم يتحرق بكُل ما فيه "

سألته بدهشة: " إنت بتتكلم بجد؟ "

ببساطة رد: " أنا عُمري ما شُفت بيت مليون شرور بالطريقة دي "

سكت ثواني وبعدها كَمِل: " أنا مُتأكد إن ده بيت الشيطان "

قبل ما نخرج من المطعم رميت كسارة البندق في سلة القمامة، رجعنا مقر القسم عشان نسيب شرائط التسجيلات ونكتب التقارير عن اللي حصل، بعد كذا يوم جالنا تقرير مُهم وكان لازم نقراه...

عنوان التقرير كان: " انتحار وجريمة قتل بمندان "

الأب ضرب مراته وهي نايمة وقتلها باستخدام مضرب بيسبول معدني

كتب بدمها على الحيطه: " إت إيدوا إكزالتيبتور باركينز "

أوضة الأولاد كانت مليانة دم لكن للأسف الجُثث بتاعتهم مكانتش موجودة اتصلت بقسم شُرطة مندان وعرفتهم بنفسي وطلبت منهم يحفروا في

الحديقة الخلفية بتاعة البيت

ولما حفروا لقوا مقبرة جماعية للأطفال، 64 جُثة لـ 64 طفل صُغِير

66 لو حسبنا جُثث الولد والبنت، ضمن الجُثث لقوا جُثة كودي، لابس زي

البيسبول وجُثته مُغتصبة

قسم الشُرطة وجهلي شُكر رسمي، أنا مش عاوز أكمل في الشُغل ده

فرانك بيقولي إني مع الوقت هتعود لكن أنا مش مُقتنع بده؛

أنا هسيب الشُغل ده وهعتزله تمامًا.

\* \* \*

( 11 )

## صغير في البئر

لما كان عندي 15 سنة كُنَّا ساكنين في بيت في منطقة ريفية، ورا بيتي كانت غابة، وفي الغابة كان في واحد من أهم اكتشافاتي كمُراهق، البئر السري اللي محدش يعرف عنه حاجة، ساكنين في البيت دا بقالنا سنين طويلة، البئر كان في نص الغابة، واضح لدرجة إني اندهشت أنا إزاي مشوفتوش قبل كده؟ البئر كان مصنوع من الحجر الرمادي، بارز من الأرض بحوالي 3 أقدام، الجزء العلوي بتاعه كان متغطي بقطعة خشب قديمة، ورق الشجر الميت كان مغطي الخشب، حفظت مكان البئر كويس في راسي عشان أقدر أرجع له تاني بعدين، محتاج أرجع له عشان أقدر أرسمه، شكله لطيف ومُلفت للنظر، وبما إن محدش يعرف مكان البئر ده فده مُمكن يكون مكاني السري المُفضل اللي هستمتع فيه بوحدتي...

بس لما مشيت من جنب البئر ملقيتوش تاني!

سنة بحالها كل يوم باجي نفس المكان وهو مش موجود لحد ما لقيته بعدها بسنة كاملة!

مُستعد أقسم لكم إنني عارف المكان وحافظه كويس أوي ومش مُمكن  
أغلط فيه أبدًا، ومع ذلك قضيت سنة بحالها بدوّر عليه، الموضوع بعد فترة  
تحوّل لتحدي، كُنت عاوز أثبت لنفسي إنني مش مجنون، سألت والدي إذا كان  
شاف البئر ده قبل كده في أي وقت وهو بيتمشى في الغابة، هزراسه وبصلي  
باستغراب وهو بيقولي إنه ميعرفش إن فيه بئر في الغابة أصلًا؛  
كُنت بدأت أياس، بدأت أشك إنه كان بيتهيألي فعلاً، فقدت الأمل وبدأت  
أمل من الفكرة، سنة بحالها عدت، عدت سنة في الدراسة، تعلمت أسوق  
العربية، بقى ليا صديقة وحبيبة، وبدأت أنسى الموضوع تمامًا.

الصيف اللي بعد كده كُنت في يوم زهقان وقررت اتمشى شوية في الغابة،  
كُنت في الفترة دي كمان بدأت أدخن من ورا أهلي، عشان كده كُنت بمشي في  
الغابة عشان أشرب سيجارة أو إثنين من غير ما والدي يعرف .

بعد 45 دقيقة من المشي... لقيته !!

لقيت البئر...

موجود في نفس المكان، نفس المكان اللي جيته 100 مرة وملقيتش أي حاجة  
فيه، نفس الهيئة، الحجر الرمادي، الفوهة المقفولة بخشب وورق الشجر اللي  
مغطي الخشب، بدأت أتساءل أنا إزاي طول الفترة اللي فاتت كُنت باجي هنا  
ومش بلاقيه، شيلت الخشب اللي مغطي الفوهة بتاعته وانحنيت عشان أبص  
جواه، كان مُظلم وزي ما يكون مالوش نهاية، ولعت السيجارة وبدأت أشربها  
وأنا بتفرج على البئرومحتار:

وساعتها سمعت الصفير لأول مرة !

صفير بصوت واطي وناعم، زي ما يكون اللي بيصفر مش عاوز حد يسمعه، بدأت أتلقت حواليا عشان أشوف لو حد تاني بيتمشى في الغابة قُريب مني، مفيش حد حواليا غير شوية أشجار، بدأت أتتبع الصوت بودني عشان أعرف جاي منين، الصوت بدأ يعلى شوية بشوية زي ما يكون الشخص اللي بيصفر عاوز يعرفني مكانه، وبسرعة أدركت الصوت جاي منين:

الصفير جاي من جَوّ البئر!

انحنيت تاني عشان أبص جوا البئر، المرة دي ريحة مش حلوة كانت موجودة، قربت من البئر عشان أتأكد من مصدر الصوت وفعلاً زي ما توقعت، الصوت جاي من البئر وبيتردد جواه بصدى صوت خفيف، ندهت بصوت عالي: "هاي، فيه حد تحت؟؟"

الصفير توقف تماماً بدون أي مقدمات، بدأت أحس بالقلق وعدم الارتياح، إستنيت شوية وأنا قلقان قبل ما أنهه تاني: "فيه حد تحت؟" للمرة الثانية بسأل ومفيش أي إجابة غير الصمت التام بس، كُنت خايف على نفسي، حاسس إنني بدأت أتجنن، قربت وشي من البئر بعصبية وأنا بصرخ بغضب: "مين اللي تحت؟"

فجأة ريحة العفن بدأت تبقي أقوى وتزيد، كانت بتضرب وشي كأن فيه رياح جاية من آخر البئر، كُل نفس كُنت باخده كُنت بحس إنني هتخنق، فجأة صوت رد عليّ، صوت زي صوت أمي بالظبط، كانت بتقولني: "حبيبي، ساعدني، أنا رجلي إتكسرت"

أنا مودع ماما الصُّبح وهي رايحة الشُّغل بعريبتها، مُستحيل يكون اللي تحت دي أمي، أنا مُتأكد من ده كويس أوي، كُنت لسه مُنحني على البيروبتأمل في الظلام بعينين مليانة خوف لما سمعت صوت بيرد عليًا لتاني مرة، المرة دي كان صوت بابا بيقولي بغضب: "أنا ربيتك على كده... تتجاهل أمك وهي محتاجاك... طول عمرك ابن فاسد وعاق... يا ريتي كُنت خنقتك وإنت صُغِير وخلصت منك"

حسيت بالخوف، مهما كان الشيء اللي تحت ده فهو بيحاول يلعب في دماغي ويخلي تفكيري كله فوضي، أو إن أنا إتجننت تمامًا، ومع ذلك سماع الكلمات دي بصوت بابا خلي جسمي كله يترعش وعينيًا تدمع، بعدت من جنب البئر:

قبل ما أبعد سمعت صوت ماما تاني، المرة دي كانت بتصرخ بألم وفزع: "الحقني، الحقني أرجوك، الفئران... الفئران بتاكلني"  
كانت بتصرخ بألم، الآهات بتاعتها كانت بتقطع قلبي، مقدرتش أتحمل أكثر من كده، لفيت وشي وجريت بسرعة، كُنت بعيط وأنا بجري، وأنا بجري كُنت سامع صوت ضحك شرير وساخر جاي من البئر:  
كُل ما كُنت ببعد عن البئر كُنت بسمع صوت الضحك بيتردد بسخرية وصوت الصفير بيعلى أكثر وأكثر، لما وصلت لحدود الغابة الصفير تغير، بقى لحن جنائزي حزين ومُرعِب.

جريت لباب البيت، دخلت وقفلت الباب ورايا، كُنت بترعش، كُنت خايف جدًا، جريت على أوضتي في الدور التاني، قفلت الستارة اللي أدام الشباك، الشباك كان بيطل على الغابة وأنا كُنت خايف منها، كُنت بفكر أقول لأهلي على التجربة دي لكن محدش هيصدقني، هيقلوا عليًا مجنون، فكرت كثير لكن في النهاية قررت أحتفظ بالسرنلنسي.

قررت مقربش من الغابة دي تاني أبدأ مهما حصل، وكل ما كنت بعرف إن حد من أهلي رايح يمشي في الغابة كنت بنصحہ ياخذ باله من نفسه ويكون حذر، كانوا بيصولي باستغراب بس أنا مكنتش قادر أقولهم على اللي حصل، هيقولوا عليا مجنون وهيشكوا في قواي العقلية .

بعد كده ولمدة شهر طويله بدأت كل يوم أسمع اللحن الجنائزي المخيف من تحت الشباك بتاعي، وفي المرات اللي كنت بستجمع فيها قوتي وشجاعتي وأبص من الشباك كان الصفير بيتوقف وطبعًا مكنتش بلاقي حاجة، مكنتش بعرف أنا ومكنتش بعرف أرتاح، كنت هتجنن.

أخيرًا خلصت دراسة وسبت بيت أهلي، لقيت شغل في شركة تكنولوجيا كبيرة في ولاية كاليفورنيا، اشترت بيت قريب من شغلي واتجوزت حبيبتي، بدأت حياة جديدة سعيدة بعيد عن البئر وبعيد عن كل حاجة، من أسبوعين مراتي اقترحت نروح رحلة لمنطقة ريفية مشهورة عشان نغير جو، وافقتها، كنا ماشيين في غابة مشهورة وإحنا ماسكين إيد بعض وحاضنين بعض، كنا مستمتعين جدًا لما فجأة لقيته في وشي، نفس البئر، نفس المواصفات، مصنع من الحجر الرمادي، بارز من الأرض بحوالي 3 أقدام، الجزء العلوي بتاعه كان متغطي بقطعة خشب قديمة، ورق الشجر الميت كان مغطي الخشب، وقفت مكاني والخوف شالني، جسي كان بيتعرش وعينيا دمعت من الخوف، مراتي بصتلي بخوف وهي بتسألني: "مالك؟، فيه إيه؟"

بايد بتعرش من كتر الخوف شاورت على البئر وأنا بسألها: "إنتي شايفاه؟؟"

بصت على البئر باستغراب وهي بتسألني: "البئر؟، شايفاه، ماله؟"

كنت عاوز أقولها إني عارف البئر دا كويس، حافظه، كنت عاوز أقولها إني شفت البئر اللعين ده من 10 سنين في ولاية تانية مختلفة تمامًا، كنت عاوز أحكيها على تجربتي المُرعبة مع البئر ده، لكن قررت أسكت، شديتها من إيدها

بقوة وأنا بمشي بخطوات سريعة ويقول بعصبية: "إحنا لازم نمشي من هنا، لازم"

حضنتني بهدوء وهي بتقولي: "اهدى بس، هنمشي من هنا بس اهدى"

بدأت اهدى وإحنا ماشيين عشان نُخرج من الغابة، في نُص الطريق تقريباً سمعت اللحن الغريب تاني، نفس اللحن ونفس صوت الصفير. مراتي كانت بتبصلي وفي عينها نظرة غريبة وهي مبتسمة ابتسامة مُرعبة ؛  
مراتي هي اللي كانت بتصفر اللحن المُرعب ده المرة دي !!

\* \* \*

( 12 )

## أسوأ هديّة عيد ميلاد

عيد ميلادي الـ 25

أمي كانت دائماً تقول إن أنا أحسن هدية ربنا رزقها بها طول حياتها، أنا من مواليد 25 ديسمبر عشان كده أهلي بيعتبروني هدية الكريسماس لهم، عيد ميلادي محدش بيفتكره في التوقيت ده لأن كل الناس بتبقى مشغولة بفترة الأعياد .

ممكن تقولوا عليّا حساس شوية في النقطة دي بس فكرة إنك تعيش عمرك كله بدون حفلة عيد ميلاد لأن الناس بتقرر إن حفلة واحدة كفاية والأفضل طبعا تبقى حفلة الكريسماس، الموضوع مُزعج شوية :

أنا فاكر صور حفلات عيد ميلادي اللي فاتت كلها لازم يكون فيها بابا نويل، ومع الجوالبرد ونغمات الكريسماس وبابا نويل وحقيقة إن سني بيزيد كل سنة، فالوقت ده مكانش أبداً هو وقتي المُفضل من السنة :

ماما دائماً بتفتكر تقولي كل سنة وإنّ طيب عشان عيد ميلادي قبل ما تهنييني بالكريسماس، وبتبقى حريصة إنها تيجي تقضي معايا الوقت هيّ وأختي وبصراحة دي حاجة لطيفة منهم، لحد سنة 2014 تقريبا لما حبيبتي سببت مشكلة بين والدتي وبينها والإثنين بطلوا يجولي في عيد ميلادي فمؤخراً بقيت

باحتفل بعيد ميلادي لوحدي وأنا بشتري هدايا الكريسماس للناس اللي أعرفهم.

## عيد ميلادي الـ 26

قررت أعمل حاجة جديدة ومُختلفة السنة دي، قررت أعمل حفلة، عزمت 30 شخص فعلاً للبيت عندي، شوية من الأصدقاء الثُريين، شوية من زميل الشغل اللطاف وواحد بس من جيراني .

15 شخص وافقوا على الحضور، 8 بس اللي ظهروا في النهاية ؛

عمومًا الموضوع كده كان أفضل لأن شقتي ضيقة جدًا ويدوب تكفي 10 أشخاص بس وبصعوبة، بصراحة كُنت مبسوط إن جاري كان واحد من الـ 8 اللي حضروا وأنا استغلّيت ده وطلبت منه يجيب كراسي للحفلة وهو جاي، كُل اللي عندي في البيت كنبّة صُغَيّرة وكُرسي الكومبيوتر وكُرسيين صُغَيّرين .

كانت حفلة لطيفة وكُل الحاضرين كانوا مبسوطين، كُنا بنشرب... بناكل سوا... بنلعب ألعاب لطيفة... بناكل شوكلاتة... وبنكَمَل شُرب وأكل كُل ما نخلص، جالي مجموعة هدايا وبدأت أفتحهم عشان أفرَح نفسي:

الهدايا كانت عبارة عن بيرة، خمرة، ويسكي، ويسكي، ويسكي، وأنا مش سَكِير للدرجة دي !

لاحظت إن بو وديف أعز أصدقائي من الطفولة مجابوش ليّا هدايا والموضوع فعلاً كان مضايقي منهم، بو لاحظ نظراتي لهم بضيق فبدأ يدافع عن نفسه: " جنبالك هدية، أقسملك بده، هيّ بس هتتاخر شوية، الراجل المفروض ي.... "

ديف خبطه على راسه وهو بيقوله بغضب: " اسكت يا غبي، هتبوظ المفاجأة "

ضحكت وأنا بقولهم: " ماشي يا غريبين الأطوار "

وبصراحة أنا مكنتش بشتهم، هُما فعلاً غريبين الأطوار على عكسي تماماً، أنا مُستقر في حياتي، بحب شغلي، بحب أقرأ، بحب ألعب فيديو جيم، ديف وبو على عكسي تماماً، بيسوقوا دراجات بخارية، بيتعاطوا مُخدرات من أنواع مُختلفة، عندهم أوشام وبيحبوا يجمعوا أشكال سكاكين مُختلفة، مش عارف أنا صاحبهم امتي وإزاي برغم اختلافنا لكن في الحقيقة هُما أعز وأقرب أصدقائي، أنا بثق فيهم ومُستعد أضحي بحياتي عشانهم وهما كذلك كده:

بس هديتهم تأخرت، عدى 4 ساعات على كلامي معاهم، الناس كُلهم مشوا ما عدا إحنا ال 3 بس، ديف كان ماسك تليفونه بتوتر وهو يبئص فيه كُل 10 ثواني، بوكان بيشرب على جنب لوحده، بدأت أتثائب لأنني فعلاً كنت مُرهق:

قلت لهم بضيق: "أنا فعلاً مش هزعل لو مجبتوش هدية"

ديف تجاهلني وهو يبئص لتليفونه: "الراجل قال إنه هيبجي هنا الساعة

10 بالظبط"

سألته: "مين بتاع ديليفري هيجيلك في موسم أجازات زي دي، اتصل بيه

ولو كان بعيد الغي الطلب"

ديف قالي بسرعة: "مش هعمل كده لأن ببساطة أنا دفعت تمن الهدية

خلاص"

بو قام فجأة وهو بيقول: "أنا سجايري خلصت، هنزل أشترى علبة، عاوز يا

ديف؟"

ديف بصله وهو بيقوله: "لا أنا لسه معايا العلبة بتاعتي"

تليفون ديف رن بعد ما خلص كلامه بالظبط، تهتد بارتياح وهو بيقول: "

أخيراً"

سألهم بسرعة: "إنتم مش طالبين تاجر مُخدرات عشان يجيب لكم

هيروين هنا، صح؟"

هزراسه وهوّ بيرد على تليفونه: " تأخرت أوي يا ليستر، تمام، خليك تحت  
أنا هنزلك، سلام "

خرج وقفل الباب وراه، بصيت لبو بفضول وأنا بسأله: " مش هتقولي  
حاجة؟ "

ضحك وهوّ يقول: " كل اللي أقدر أقولهولك إنك هتتبسط أوي "

" بس مش هيروين؟ "

" لا "

" ومش مُخدرات من أي نوع؟ "

" ومش مخدرات "

" ولا .... "

" يعني إنت مش قادر تصبُر 30 ثانية وتكتشف لوحدك؟ "

كان عنده حق، أنا مستني من ساعات، ضحكت وقعدت أستني، ديف فتح  
الباب ودخل ومعاها راجل عجوز مُشَرَّد عنده حوالي 70 سنة، دقنه طويلة  
وقذرة، وشه مش نضيف وضوافره طويلة وحادة زي مخالب الحيوانات، أول  
ما دخل البيت خد نفس طويل وكتمه في صدره ثواني، كان شكله حيران أوتايه،  
عينيه بترمش بسرعة وكثير، شفايفه بتتحرك كأنه بيتكلم بدون صوت، كان  
بيبتسم وبعدها يكشّر وبعدين يضحك لوحده في ثانية واحدة، ديف بصلي  
بفخروقال: " ده... ليستر "

ليستر بصلي وقال: " هاي "

مد إيده عشان يسلم عليًا فسلمت عليه، كُنت فاكر إني ملمسش وشي أو  
ألمس أي أكل قبل ما أغسل إيدي كويس الأول، ليستر بدأ يتأمل المكان ثواني  
وهوّ يقول: " دا بيتك، بيت للال لطيف "

ابتسمت بمجاملة وأنا بقوله: " شُكْرًا يا ليستر "

ديف وقف ورا ليستر بفخر وهو بيحط إيدته على كتفه ويقول بسعادة: " ليسترهنا عشان يخلي الأرواح تسكن بيتك " بصيتله وأنا بقوله بيأس: " الأرواح... تسكن بيتي؟ " هزراسه وهو بيأكد كلامي، بوكتم ضحكة كانت هتنتلق بقوة وهو بيتظاهر إن مفيش حاجة، سألتهم بضيق: " ده عبارة عن إيه؟، يعني تحديداً ده إيه؟، ليسترناوي يعيش هنا؟؟ " ديف ضحك بسخرية وهو يقول لليستر: " إيه رأيك تشرح له إنت الموضوع؟ "

ليستر كان بيترعش بعصبية وهو يقول: " تحت أمرك يا فندم " بصلي في عينيا وهو بيتكلم بفخر كأنه يقول خطاب: " إسمي ليستر آرنولد، أنا وسيط روحاني وده معناه إن الأرواح لها قدرة على التواصل مع الناس من خ خ خلالي، اعتبرني بوابة مفتوحة من الناحيتين للأرواح، أنا النهاردة هنا عشان أأ أقدم لك خدمة وأسمح للأرواح اللطيفة تسكن في بيتك وتساعدك، مقابل فلوس طبعاً هنتفق عليها " خلص كلامه وبص لديف المبتسم بفخر، بصلي تاني وهو يقول: " أصحابك قالوا لي إنك مؤمن بالخوارق وهتتيسط من ده " بصيت لهم وأنا بكرر كلامه: " قالوا لك إني مؤمن بالخوارق؟ " في الحقيقة أنا آخر واحد في الكون مُمكن يكون مؤمن بالخوارق، بصيت لليستر وقتلته: " الحقيقة أنا مش عارف أشكرك إزاي على عرضك الجميل ده، بس الحقيقة أنا مش محتاجه " ديف اعترض بصوت عالي: " بجد؟؟، هتخليه يمشي؟ " بوكشّر وهو يقول: " مش هينفع يمشي، ليستر أخذ 80 دولار عشان بيعي "

ديف كامل كلامه بسُخرية: "ليستر المسكين هيمشي بعد ما جالك في مكانك وفي موسم الأجازات، إنت كده بتبينه"  
بو قالي مؤكداً على كلام ديف: "دا جاي من على بُعد ساعتين!"

بصيت لليستر وبدأت أتضايق وأنا بقوله: "ليستر أنا فعلاً آسف بس أنا مش مؤمن ومش بصدق في الخوارق وأصدقائي جابوك عشان يهزروا، أنا آسف"

أخدتُه ناحية الباب عشان أخرجُه وسمعت ديف من ورايا وهو بيعترض على تصرفي، لليستر وقف هو بيقول: "طالما جيت إسمجلي مش هأخذ من قتك كثير، إديني د د د د دقيقة بس وهمشي من هنا خالص، أنا أخذت منهم فلوس مُقابل إني آجي وأشتغل"

ديف ارتاح لكلامه فقام وقف ورايا وهو بيقول: "هو عنده حق"  
ليستر ابتسم وهو بيقول: "إنت كده كده مش مؤمن بالأرواح والخوارق، هتخسر! إيه؟"

بوضحك وقال: "خلينا نستمتع"

قلت لهم بغير اقتناع: "ماشي، إتفضلوا"

ليستر سأل بخُبت: "إنت م م م موافق؟"

وقلتله إني موافق ودي كانت أكبر غلطة في حياتي كلها!

ليستر بدأ يتحرك بسرعة، مسك شمعة من المطبخ وأشعلها، مشفتش أشعلها بإيه بصراحة. مُمكن معاه ولاعة في جيب من جيوبه، نام على ظهره على أرض المطبخ، كان بيتتم حاجات مش سامعها بلُغة مش فاهمها، قام وقف، طفى الشمعة، سلم علينا وخرج من الباب بدون ولا كلمة.

الموضوع كله استمر حوالي 30 ثانية بس، سألت ديف بغضب: "إيه ده؟"

محدث منهم رد عليًا، قتلهم تاني بغضب: " دي أسوأ حاجة عملتهاي، فعلاً  
أسوأ حاجة "

خرجت من الباب وأنا بقولهم: " هجيلكم تاني "

نزلت السلم بسرعة، ليستر كان على أول الشارع ماشي ناحية موقف  
الأوتوبيس، ندهت عليه: " ليستر! "

وقف وبصلي باستغراب هوّيقول: " إنت عاوز إيه؟ "  
قتلته: " أنا آسف، إحنا عاملناك بقلة ذوق، أنا عايز أعتذر لك، أنا آسف "  
مردش عليًا، سابني ومشيت ناحية موقف الأوتوبيس، مشيت راه وأنا بقله: "  
ممكن تبات عندي في الشقة النهاردة لو عاوز، الوقت تأخر ومش هتلاقي  
مواصلات "

ليستر بصلي وقال بغموض: " أنا مش ببقى كويس في الأماكن المغلقة "  
قتلته: " أنا خايف عليك من البرد "

ابتسم وهوّيقول: " إنت شاب مؤدب، مش زي زميلك "  
قتلته بسرعة: " هُما كمان مؤدبين والله "

بصلي عينيه بتتملي دموع وهوّيقول: " أنا آسف... أنا آسف... متباتش في  
بيتك النهاردة... إوعدني متدخلش البيت النهاردة خالص "

بصيلته باستغراب وأنا بقوله: " ليستر، بدل ما تبات في الشارع، جرب  
تروح مأوى مُشردين، هناك ه.... "

قاطعني بغضب: " أنا مش مجنون، أنا مش مجنون أبداً، أنا بني آدم  
طبيعي، عجوز قدر عايش في الشارع "

سكت شوية عشان يهدى وكَمَل كلامه: " أنا مش بعمل خدمة عامة، إنت لازم تفهم ده، أنا فعلاً ممر أو بوابة للأرواح زي ما قُلتك، الموضوع ده اكتشفته تقريباً لما كان عندي 7 سنين. بس لما أقولك إني هجيبلك أرواح لطيفة تأكد إني أقصد العكس تماماً، الأرواح اللي أنا عديتها لشقتك أرواح غاضبة شريرة وجاية من الجحيم، معظم الناس اللي بتضايق منهم بديهم روح بسيطة عشان بس أعاقبهم، أرواح ضعيفة تقدر بس توقع كتاب أو تحرك طبق إنما متقدرش تعمل غير كده، بس إنتم، إنتم ضحكتوا علياً وسخرتوا مني وكلمتوني باستهزاء، عشان كده جيبت أرواح شريرة جداً وغاضبة جداً، كُنت مُعتقد إنكم تستحقوا ده "

كُنت حاسس بالغباء فسألته: " حضرتك تُقصد إيه؟ " بصلي شوية وهوّ بيقول يهدوء: " أقصد إنك لازم مترجعش بيتك " خبط نفسه على وشه وهوّ بيقول: " أنا غي، مكانش لازم أعمل كده، مترجعش شقتك تاني "

مسكت إيده وأنا بقوله: " بُص هو أنا مش مصدقك بس إيه رأيك لو تطلع معايا البيت وتمشي الروح الشريرة دي أو تطردها أو تشوف إيه التصرف الصح معاها "

بصلي والخوف بيبان على ملامحه وهوّ بيقول: " أنا مش هرجع تاني، الصراحة أنا مش هاجي الحي ده كله تاني أبداً " سابني ومشي.

تليفوني رن في اللحظة دي، رديت: " ألو " ديف هوّ اللي كان بيتصل، كان بيقولي: " إنت مش هتيجي؟ "

صرخت فيه بغضب: " إنت شخص غبي وفكرتك كانت أغبي، إنت جبتلي شخص مجنون في شقتي "

بخجل رد عليًا: " إحنا آسفين فعلاً "

سكت شوية وبعدين قالي: " اطلع طيب عشان نتكلم "

بو خبطي على ضهري ولمّا لفيت لقيتهم واقفين ورايا وبيبصولي باستغراب، ديف مكانش بيتكلم في التليفون، سألته بدهشة وخوف: " ديف، تليفونك فين؟ "

قالي: " نسيته في شقتك فوق. تيجي معايا نجيبه؟ "

سألته بغضب وأنا خايف: " إيه اللي بيحصل بالظبط؟ "

بصيت على تليفوني لكن الخط كان إتقفل، المكالمة انتهت، كُنت بدأت أخاف وابقى مش فاهم إيه اللي بيحصل، حكيت لهم كل حاجة حصلت لحد مكالمة التليفون، قتلهم: " هنعمل إيه دلوقت؟ "

بو قال بهدوء: " هنروح ناكل لأنّي جعان جدًا "

قتلته بغضب: " أقصد هنعمل إيه دلوقت مع شقتي؟ "

بصوا لبعض وهمّا بيقولوا: " مش هنرجع الشقة تاني أكيد "

سألت ديف: " وتليفونك؟ "

قال بسرعة: " مش عاوزه "

كُنت شاكك إن دي خدعة عملوها فيًا بالاتفاق مع ليستر الوغد، قتلهم: "

أنا هطلع أجيّب التليفون من فوق "

طلعت السلم ولمّا وصلت الدور بتاعي حسيت إن الممر فيه حاجة مش طبيعية، مسكت أكرة الباب عشان أفتحه، كانت سُخنة جدًا بطريقة مش طبيعية، حاولت لحد ما قدرت أفتح الباب، سبت الباب وارب ووقفت شوية وأنا حاسس بقلق، استجمعت شجاعتي وخبطت على الباب الأول:

سمعت صوت خطوات من جوا الشقة، خطوات بطيئة وثقيلة، الأرض كانت بتمهز تحتي، قلبي كان هيقف من كُتر الخوف، سمعت صوت تليفون من جوا الشقة، تليفوني رن، فتحت الخط وخطبت التليفون على ودني من غير ما أقول ولا كلمة

صون ديف كان بيقولي بنبرة مُخيفة: " أدخل "

سألت بخوف: " مين معايا؟ "

قفل التليفون، شاشة تليفوني ضلمت، بصيت لتليفوني شوية وبعدها بصيت للباب، الباب الحاجة الوحيدة الي بيبي وبين الشيء الي موجود جوا البيت، لازم أمشي من هنا... لازم أهرب حالاً!

نزلت السلم بجري بخوف، ديف وبو كانوا تحت البيت مستنبيين، ديف سألتني: " جبت التليفون؟ "

قلتلته: " لا، إنت مش قلت مش عاوزه "

أكلنا وقررت أنام عند ديف في البيت، الصُبح تليفوني كان مليان رسايل صوتية من ديف، كُلها بصوت مُخيف وعميق :

" ارجع "

" أنا، مستنيك "

" إنت، فين؟ "

" تعالي "

سبت الشقة بَكل ما فيها من لبس وأجهزة وأثاث، مش عاوز حاجة منها خالص مهما كانت وديف ساب تليفونه، حد منكم مستعد يروح يجيب لنا حاجتنا؟؟

\* \* \*

( 13 )

## الثنائي العجوز

خلوني أعرفكم بنفسي في البداية، إسمي ستيف، طبعاً ده مش إسمي الحقيقي، أنا مدير سلسلة مطاعم شهيرة مُتخصصة في طعام الإفطار، بشتغل في وردية بالليل، 5 أيام من كُل أسبوع، الشغل مش مُتعب ومش مُرهق، طبعاً ساعات بيبقى فيه ضغط شغل لكن ده مش دائماً، وساعات بنواجه مشاكل، مثلاً من كذا ليلة مجموعة من الشباب المراهقين دخلوا المطعم وهُمّا سكرانين، طلبوا كميات كبيرة من الأكل، بعد شوية بدأوا يشتبكوا جسدياً مع مجموعة كبيرة من بقية الزبائن وإضطريت أتدخل أنا وطاقم العمل بتاعي عشان نمنع تطور الموضوع.

الحاجة اللي هحكي لكم عليها النهاردة هي الثنائي العجوز اللي بيعي المطعم كُل ليلة الساعة 11:30 مساءً بالطبط، الزوج بيسلم علينا بابتسامة لطيفة كُل ليلة بمُجرد دخوله من الباب، الزوجة مش بتتكلم أبداً، بيدخلوا يقعدوا على نفس التراييزة البعيدة والزوج بيطلب نفس الوجبة كُل يوم، بيض مقلي... بطاطس مهروسة... شاي إنجليزي، الزوجة عكسه تماماً مكانتش بتطلب أي حاجة، بتقعد أدامه على التراييزة عشان تتفرج عليه وهو بياكل وعينها مليانة

حُب، في البداية فكرت إنها بتيجي معاه عشان ترضيه لكن بعد شوية الموضوع بدأ يبقى غريب شوية .

كُل ليلة في تمام الساعة 11:30 مساءً بالطبيط بيدخلوا من باب المطعم، الزوج بيسلم علينا بابتسامه لطيفة وبيقعدوا على نفس الترابيزة، بيطلب نفس الوجبة زي كُل ليلة، بياخذ رشفة من كوباية الشاي بتاعته، ويببُص في عينين زوجته وهُو ساكت، ديف كان رئيس الطُهاة في الطعم، ديف كان دايمًا يقول إن الزوج عبد لزوجته وهي بتخرج معاه برا البيت عشان تثبت سيطرتها عليه عن طريق مُعاملتها للزوج بقسوة وصمت، ديف بيشرب حشيش كثير وتقريبًا بيعاني من مشاكل عقلية فمحدثش أخذ كلامه على محمل الجد أبدًا.

الموضوع بقى شبه عادة، كُل يوم أستناهم في ميعادهم وأفضل أتفرج عليهم، الزوج بياكل والزوجة بتتفرج عليه، كُل يوم بيسيب بقشيش 20 دولار، بقشيش ضخم من زبون مُعتاد، العاملين بالمطعم كانوا بيسموه الزبون السهل، الراجل العجوز كان لطيف، قالي مرة إن اسمه إدوين لكن زوجته زي ما قتلتم مكانتش بتتكم أبدًا، حاولت أتكلم معاه أكثر من مرة لكن إدوين كان يببُصلي بصات غريبة ومالهاش معنى فاستنتجت منها إنه متضايق من كلامي مع زوجته، بطلت أتكلم معاه نهائيًا، في النهاية لو عندك زبون بيديك بقشيش 20 دولار كُل ليلة مُستحيل هتعمل حاجة تزعله .

ليلة راس السنة كان بيبقى عندنا ضغط شُغل رهيب، زحام مجنون، الشباب السكرانين كُتارو ويتصرفوا بغباء رهيب، أغلب العُمال مجوش الشُغل النهاردة، كُل اللي في المطعم كان أنا، ديف ومايكل ؛

حاولنا إحنا الـ 3 نوّفي بطلبات الزباين بأسرع ما يمكن، قصرنا مع بعض الزباين، بعض الزباين الباقيين اشتكوا منّا، شوية شتمونا، شوية مشوا وسابوا المطعم

بس إدوين لا، دخل في ميعاده، قعد على تراييزته مُنتظر أكله بصبر ومهدوء، أكله تأخر حوالى ساعة لكن وأنا بقدمه له اعتذرت له كتير أوي، ابتسم وطلع من جيبه 05 دولار وهناني براس السنة الجديدة وقالى إنه مقدر ضغط الشُّغل.

بعد شوية بدأ ضغط الشُّغل يهدى، قدرت أخذ راحة رُبّع ساعة بعد ساعات قاسية من الشُّغل، رُخت لإدوين وقررت أتكلم معاه: "إزيك يا مستر إدوين، إنت عارفني أنا ستيف مُدير المطعم، أكل حضرتك أخباره إيه؟"

ابتسم وهوّ بيقول: "طبعًا، الأكل كان لذيذ كالعادة، شُكرًا"  
ابتسمت بلُطف وأنا بقوله: "أنا عاوز أشُكر حضرتك على كرمك وذوقك البالغ، شُكرًا جدًّا على البقشيش الضخم اللي إديتهولي"

ضحك وقالى: "مش مشكلة، أنا لاحظت إنكم مُرهقين وعليكم ضغط شُغل، انتوتستحقوا إن شخص يكون لطيف معاكم"  
قلته: "أنا بشوف حضرتك بتيجي هنا كُل يوم بس دي أول مرة نتكلم مع

بعض بأريحية برا نطاق الشُّغل، حضرتك اسمك إدوين... صح؟"  
مد إيدَه وهوّ بيقول: "صح، إسمي إدوين كارل جيمس"

سلمت عليه بحرج وأنا بقوله: "عاوز أسأل حضرتك سؤال مُخرج شوية لو

تسمح ليّا، إنت ليه بتيجي كُل يوم؟"  
بان عليه الدهشة وهوّ بيقول: "مش فاهم؟"  
قررت أكرر سؤالى مُمكن مسمعنش كودس، السن له حكمُه برضه وهوّ

شكله متخطي الـ 80 سنة، كررت سؤالى: "حضرتك ليه بتيجي كُل يوم؟"  
بان عليه الحُزن وهوّ بيقول: "دي قصة طويلة مش عاوز أزعجك بيها"

سكت ثواني وبعدها قرر يحكي، قالي: " زوجتي من يوم ما إتجوزتها متعودين نيحي نتعشى هنا كل يوم، من قبل ما إنت حتي تستلم شُغلك هنا، لحد ما ماتت السنة اللي فاتت وسابتني لوحدي، قررت ما أقطعش عادتنا سوا عشان ده الوقت الوحيد اللي بحسها قاعدة معايا فيه ! "

قام وقف وأنا على وشي دهشة ورُعب وعدم تصديق لكلامه، سألتني بهدوء وهو بيستعد للرحيل: " إنت قابلت زوجتي إيثيل قبل كده؟ " كُنت عاوز أتكلم أو أقول أي حاجة، كُنت مرعوب وأنا ببُص لزوجته اللي ابتسمت بحُزن غريب وهي بتشاوري أسكُت، هزيت راسي بالرفض بدون ما أنطق

ابتسم وقالي: " كانت ست لطيفة وزوجة جميلة " خرج وهي ماشية جنبه من غير ما يحس بيها، ندهت عليه وهو على الباب: " إدوين، أنا أسف على خسارتك " خرج من الباب.

لحد النهاردة إدوين لسه بييجي المطعم وإيثيل معاه، محدش يعرف إنها معاه غير أنا وديف، محدش تاني بيشفها غيرنا، أنا مبقيتش خايف منها، أنا بقيت مُمتن لها إنها معاه ومش بتسيبه... حتى بعد ما ماتت !!

\* \* \*

( 14 )

## مارثا

طول عُمَر مارثا هي صديقتي المُفضلة، شعرها أحمر وعينها زرقا، على طول بتلبس فساتين حلوة وصُغيرة، ودايمًا فساتينها بتطير حوالها لما بتيجي نسمة هوا، علمتها إزاي تعمل شعرها ضفيرة وعلمتني إزاي أقف على إيديا بدون ما أقع، مكناش بنفترق تقريبًا لدرجة إنها تقريبًا نامت عندنا في البيت كُل يوم، مارثا مرحة ولطيفة جدًا، بتحب تتكلم وتهزر طول الوقت بس ساعات بتسكُت وتكتئب، في الساعات دي بحب أسيها لوحدها .

زيننا زي بقية الأطفال، بنحب نلعب ونجري ورا الحشرات، لعبتنا المُفضلة كانت إننا نبني قلعة صُغيرة من فروع الشجر المكسورة وورق الشجر الناشف، كُنا بنقعد جوا قلعتنا المُتهالكة دي ونتكلم عن المدرسة، كانت بتحبي أقرأ لها كُتب وروايات وقصص بصوت عالي وهي مُنتبهة وبتسمعي باهتمام؛

لعبة تانية من اللعب اللي كُنا بنحبها، كانت لعبة " مطاردة في القمامة " زي ما كُنا بنسميها، كُنا بنكتب ليستة فيها حاجات غريبة ولازم ندور عليها ونناقها، زي مثلاً زهرة برسيم بأربع وريقات أو شراب قديم فيه ثُقبين، مارثا

كانت دائماً بتلاقي أغلب الحاجات بس عُمرنا ما لقينا كل حاجة في القائمة  
أبدأ:

حاجة واحدة بس عُمرنا ما لاقيناها... صندوق خشبي قديم!

على طول كُنت بلاقي صناديق خشب وبروح بيها لمارثا أسألها: " هوّده؟ "  
كانت بتبُص للصندوق بخيبة أمل وتقول حاجة زي: " لا للأسف... دا  
صُغِير شوية... الصندوق اللي بندوّر عليه كمان له مزلاج على الجنب "

فاكرة في مرة دوّرنا في كل مكان على الصندوق بدون أمل، اقترحت عليها إننا  
ندوّر عليه في المطبخ بتاعنا، حطيت الكرسي ووقفت عليه ودورت في دواليب  
المطبخ، دورت تحت الحوض، حتى حطيت صندوقين فوق بعض وقررت أدوّر  
فوق التلاجة، بس برضه ملقيتوش!

كُنت واقفة فوق الصناديق غير متزنة وأنا بقول لمارثا بخيبة أمل: " برضه  
مش موجود هنا "

الصناديق كانت مش متزنة فقلت لها بقلق: " مُمكن تساعديني أنزل عشان  
خايفة أقع؟ "

مارثا مردتش عليّا....

صرخت فيها والصناديق بتتهز بقوة تحت رجلي: " مارثا، ساعديني عشان  
أنزل، الصناديق مش متزنة وهتوقعني! "

لسّه مارثا مبتردش عليّا....

فجأة لقيت نفسي بقع من فوق الصناديق وبخبط في الأرض بقوة:

وقعت على كوعي بقوة، صرخت من الألم وعينيًا إتملت دموع، ماما جت على صوتي بتجري هيّ خايفة، وهيّ بتسندني عشان أقوم لمحت مارثا واقفة في ركن المطبخ، واقفة بتبُص للأرض بتركيز، ماما سندتني وخرجتني من المطبخ ويومها ذراعي إتكسر؛

لمّا رجعنا من المستشفى ماما طلبت مني أطلع أوضتي، بعد شوية بابا رجع من شُغله وسمعته بيقفل الباب، ماما قالت له بصوت مليان قلق: " كريج، إحنا لازم نتكلم! "

رد عليها بهدوء: " حبييتي، أنا عارف إنتي هتقولي إيه ؟، بس دا مش وقته أبدًا، هيّ عندها 7 سنين بس، ده الوقت المناسب للتعلم والتخيل والنضج " صوتها علي وهيّ بتقول بغضب: " أذت نفسها يا كريج، أنا مش عاوزها تؤذي نفسها عشان خيال، تعالي نروح ناكل ونكمل كلامنا "

كانت ليلة طويلة وأنا كُنت مُرهقة فاستسلمت للنوم بسُرعة، بعد شوية حسيت بمارثا بتقعد جنبي وتلمس إيدي المكسورة، قلت لها بألم: " أه، إيدي لسّه بتوجعني! "

سألتي بفضول: " إنتي دورتي تحت السرير؟ "

رديت عليها بدهشة: " دورت على إيه؟ "

قالتلي: " على الصندوق "

حطيت راسي على المخدة بكسل وأنا بقولها: " مارثا، طبعًا دورت زي كُل مرة "

قالتلي بإصرار: " أنا افكرت حاجة الصُبج، الصندوق بتاعنا تحت السرير "

غمضت عينيًا وأنا بقولها: " دوري براحتك، أنا هنام "

قالتلي بخوف: " إنتي عارفة إني بخاف من الوحش اللي تحت السرير، لازم

إنتي اللي تدوري "

رميت الغطا بغضب وأنا بنزل تحت السرير ويقولها بغضب: " شفتي يا مارثا، مفيش أي حاجة تحت السرير "  
خبطتني على ضهري وهي بتقول: " إدخلي تحت السرير، دوري جوا شوية "  
قلت لها بغضب: " أنا شايفة كل حاجة من هنا، مش هدخل تحت السرير  
أنا وأوسخ كل هدومي بالتراب عشان خاطر صندوقك "  
استسلمت بحزن وهي بتقول: " طيب "

بعد شهر تقريبًا من الموقف ده بابا قرر إننا نسيب البيت ده ونشترى بيت  
تاني قريب من شُغله الجديد، عيظت كتير على مدرستي وأوضتي وأصحابي اللي  
هسيهم

لمدة 24 سنة بعدها ما شفتش ولا سمعت أي حاجة عن مارثا!  
في يوم كُنت في زيارة لصديق قديم بيته مش بعيد عن البيت القديم بتاعنا،  
بيتنا كان واحشني فقررت أزوره، أنا مجيتش هنا من لما كان عندي 7 سنين،  
قررت أخذ عربيتي وأزور البيت.  
كُنت ماشية في الطريق لما تليفوني رن، كان على الكرسي اللي جنبي، فجأة  
حاجة حمرا ظهرت أدام عربيتي، ضغطت على الفرامل بسرعة. صوت احتكاك  
العجل بالأرض عمل صوت عالي جدًا، راسي كانت هتخبط في الزجاج اللي أدام  
وسُحب التراب ملت المكان كله.

مش شايفة حاجة في المرايات بسبب التراب، خرجت من العربية، لفيت في  
دايرة كاملة حوالين العربية بدور على الحاجة اللي كُنت هخبطها أو خبطتها  
فعلًا بس ملقيتش حاجة، قررت أتأكد إن عجل العربية كويس عشان أكمل  
طريقي، مُمكن كان بيتهيالي، قبل ما أركب العربية تاني لمحت حته قماش زرقاء  
خارجة من تحت العربية، فُستان دانتييل أزرق !!

نزلت على ركبي وأنا ببُص على الأرض تحت العربية، جسم بنت صُغيرة  
لابسة فُستان فوق الركبة ووشها بعيد عني مش شايفة ملامحها؛  
جسمي كُلُه كان بيترعش، الدم نشف في عروقي، بدأت أعيط، كُنت  
خايفة... كُنت حزينة... كُنت مرعوبة؛

قلبي كان بيدق جامد، بقالي 24 سنة مشفتش مارثا لحد النهاردة شُفتها!  
صرخت فيها بلهفة: "مارثا؟! "

مردتش عليًا، جسمها بدأ يبهت وكأنه بيختمي، قالتلي بصوتها اللي أنا  
حافظاه: "دورتني تحت السرير؟"  
خلصت كلامها وجسمها اختفى تمامًا، ركبت العربية وبأقصى سُرعة  
مُمكنة رُحت ناحية البيت... البيت القديم.

وصلت البيت، نزلت من العربية وأنا بجري، حتي باب العربية سبته  
مفتوح، البيت كان قديم ومُهمل لدرجة إنه بقى مُهدّم، السقف مليان ثقوب،  
ريحة البيت عطن والأرضية كلها تُراب وقذارة، جريت ناحية ركن البيت، مكان  
أوضتي القديمة، دخلت الأوضة، الأوضة كانت فاضية تمامًا، الألواح الخشبية  
بس مغطية الأرضية  
ما عدا ....

مكان سريري كان فيه بُقعة أغمق من بقية الأرض، خرجت مفاتيحي وبدأت  
أحاول أفتح مكان بين ألواح الخشب، بعد شوية لوح من الألواح تحرك من  
مكانه

جوا الحُفرة... تحت الأرض... كان فيه صندوق خشبي قديم!

صندوق متوسط الحجم، مش كبير ومش صُغَيْرٌ، له مزلاج مصدي على الجنب، على غطا الصندوق محفور بخط طفولي اسم بنت... (مارثا)، فتحت الصندوق، جوا الصندوق كان فيه مجموعة صور، التراب مالها وخافي ملامحها، طلعت منديل وبدأت أنضف الصور وأشيل التراب من عليها، أول صورة كانت صورة جدي وهو صُغَيْرٌ بشعره الأحمر المُمَيِّز، ثاني صورة كانت صورة جدي بس معاه بنت صُغَيْرَةٌ شعرها أحمر، لما شُفَت الصورة إيدي ارتعشت والصندوق وقع على الأرض ومحتوياته وقعت منه جوا الصندوق وتحت الصور كان فيه جمجمة صُغَيْرَةٌ قديمة!

خرجت أجري من البيت وأنا خائفة، جسيمي كله بيترعش، كُنتُ بعَيْطُ، تليفوني كان لسه على الكُرسي بتاع العربية، كان بيرن، رديت وأنا بعَيْطُ، كانت ماما، قالتلي: "حبيبتى، هتتاخري؟"  
قلت لها بغضب وخوف من وسط دموعي: "مارثا... إزاي مارثا ميتة؟...  
مارثا كانت صاحبتى... سنها من سني!"  
سألتنى بدهشة حقيقية: "إيه؟"  
جسيمي كله كان بيترعش وأنا بقولها: "مارثا كانت في الصورة مع جدي...  
كانوا... كانوا أطفال!"

حاولت تهديني: "حبيبتى، اهدي بس!"  
مكُنْتش عارفة أجمع كلمة: "أهدا... أهدا... إنتي... مش قادرة... أنا... أنا..."  
قالتلي بهدوء: "إحنا مقولناش ليكي لأننا سبنا البيت وهي بطلت تظهرلك"  
سكتت شوية وبعدها كملت: "بس مارثا كان اسم أخت جدك ولما بدأتى تقولي إن ليكي صديقة اسمها مارثا، فكرنا إنك سمعتي الاسم من مكان ما واستخدمتية عشان تخلفي شخصية خيالية تكون صديقتك!، إيه اللي بيحصل؟"

التليفون وقع من إيدي وأنا بفهم كُـل حاجة !

مارثا كانت بتخاف من تحت السرير بسبب اللي موجود هناك، وبسبب اللي  
حطه هناك !

الوحش اللي تحت السرير كان وحش خاص بيها !  
كانت عاوزاني أنزل تحت السرير عشان ألاقى الصندوق وتتكشف كُـل  
حاجة !

مارثا ممشتش !

مارثا كانت هنا طول الوقت !

تحت السرير !!

\*\*\*

( 15 )

## مُحَقِّق الخوارق

( 1 )

لَمَّا آل تاييلور كلموني للمرة الأولى كُنْتُ شاكك في كلامهم، اتصلوا بيًا يوم التلات وطلبوا مني تحديد ميعاد، لكن لَمَّا دخلت بيتهم للمرة الاولى غيرت رأيي تمامًا، هناك في ركن الأوضة شُفَّتْهَا واقفة، شايفها بزاوية عيني بس مش عاوز أبص عليها، لَمَّا كُنْتُ لَسَّه صُغَيْرٍ وبتعلم، قالوا لي إن أهم حاجة إني مبُصِّش لهم بشكل مُباشر، على أي حال حتى لو بصيت مش هشوف حاجة مُهمّة غير الوجه المشوه والعينين السوداء تمامًا بدون أي لون أبيض !

آل تاييلور كلموني من كذا أسبوع أو بمعني أصح كلموا المُساعدة بتاعتي عشان يحددوا ميعاد وهيّ بلغتني بده، بلغوها بوجود حاجات غريبة بتحصل في بيتهم

حاجات غريبة على كُلّ الناس لكن مألوفة بالنسبة ليًا وحاجات بقدر أعالجهما مقابل مبلغ مادي ضخّم، هيّ دي مهنتي.

بصيت لمسترتاييلور وسألته: " من امتي وإنْت بتواجه المُشكلة دي؟ "

قالي: " الموضوع بدأ من حوالى شهرين أو 3، كارولين هي أول حد لاحظ، الموضوع بدأ بحاجات بسيطة وتكاد تكون تافهة، زي مثلاً إن أبواب دولاب المطبخ تتفتح لوحدها، الغطا يتشد من علينا وإحنا نايمين، في البداية فكرنا إن الأولاد بهزروا معنا أو بيعملوا فينا مقلب، لكن لما بدأوا يتشغلوا في دراستهم وراحوا مدارسهم والموضوع فضل زي ما هو، عرفنا إن الموضوع مالوش علاقة بهم "

بزواية عيني كنت لامحها وهي بتبتسم بسخرية!

المُساعدة بتاعتي كانت ساعات بتنسى وجودي وبتميل إنها تحقق مع الناس، سألتها: " طب مش مُمكن يكون إنتم اللي بتعملوا الحاجات دي؟، أو بتنسوا؟ "

كنت عارف إنها غلطانة ومُتأكد من وجود حاجة هنا، بس قررت أسيب الحوار يتم بينهم، مستر تايلور رد عليها: " لا، لا، مُستحيل، بعد ما الأطفال مشوا وراحوا مدارسهم الموضوع بقى أسوأ، ساعات بنصحي في نُص الليل على صوت خبط أو خدش على الحيطه، وكُل يوم بنلاقي حاجات أماكنها متغيّرة عن أماكنها الطبيعية اللي سبناها فيها الليلة اللي قبلها "

مستر تايلور خلّص كلامه وبص على كارولين مراته، مسك إيدها بقوة فبدأت تتكلم: " إحنا كلمناك يا مستر رودس لأن من حوالى 3 أسابيع، لما اتصلت بمكتبك لأول مرة، شُفت بنت واقفة في البيت، البنت دي كان فيها حاجة غلط "

بصت لجوزها بخوف وبعدين كملت: " ندهت عليها وسألتها هي مين وبتعمل إيه هنا؟، مكانتش بترد عليّنا، قررت أروح ناحيتها "

جسمها بدأ يترعش بقوة وهي بتقول: " كان فيها حاجة غلط يا مستر رودس، كان فيها حاجة غلط، مكانش عندها عيون، مكانتش بتتكلم، ولما قربت منها مسكت إيدي"

سكتت وبدأت تكشف إيدها، على إيدها كان فيه حرق على شكل إيد صُغيرة، " مهما حاولت أعالج الحرق ده مش ببختفي ولا حتى لونه بيهت، جربت كل حاجة مُمكن تتخيلها، كُل مرة بحاول أعالج الحرق كان يزداد سوءً لدرجة إن لونه بقى أسود زي ما يكون مُتفحم "

كانت واقفة جنب السيدة تايلور دلوقت، بتبص علينا وبتبتسم بسُخرية وتحدي، كان لازم أحافظ على ثباتي الانفعالي وأتجاهلها، مش لازم أبصلها بشكل مُباشر، شايفها ومراقبها بطرف عيني، شعرها الأسود وبشرتها الشاحبة الرمادية، بنت صُغيرة لابسة هدوم مقطّعة، رجلها قذرة كأنها كانت ماشية في مُستنقع، سألت نفسي عن إيه اللي حصل لها في حياتها؟، هل هي غرقت في مُستنقع؟

بصيت على إيد السيدة تايلور وأنا بقولها: " أنا فعلاً أقدر أساعدك في ده يا سيدة تايلور، بس عاوز أعرف الأول، هل شُفتها تاني من يومها؟، أخبار المياه في الحمام إيه، هل بتقابلكم مشاكل في مياه الحمام؟ "

بصوا لبعض باستغراب وخوف، سيدة تايلور قالتلي: " بنتنا كايتي لما كانت هنا كانت بتشتكي من المياه في الحمام، بتقول إنها في كُل مرة بتفتح فيها حنفية الحمام المياه بتنزّل مطينة وعكرة، وإن المياه بتبدأ تطلع من فتحات التصريف، في البداية فكرنا إن فيه مُشكلة في المواسير! "

كانت واقفة أدامي بالظبط دلوقت، بتبصلي بتحدي، كُنت بترعش وأنا  
بحاول أتماسك وأتمالك أعصابي، بتراقبني بتحدي وهي بتبتسم، همست ليًا  
بصوت مُخيف: "إنت هنا عشان تنقذهم؟"

قربت وجهها من وجهي، غمضت عينيًا، مفيش حل ثاني عشان أقدر  
أتجاهلها ومبصش عليها، حسيت بحد بيمسكني من كتفي بقوة وسمعت صوت  
المُساعدة بتاعتي بتندهلي بقلق: "مسترودس؟"  
فتحت عينيًا وبصيتها، لمحت الأوضة بطرف عيني، الأوضة كانت فاضية  
تمامًا، بصيت للسيدة تايلور وقلت لها: "ممكن تساعديني وتوريني إيه اللي  
هيحصل لو حاولنا نملى حوض الاستحمام؟"

قالتلي على طول: "طبعًا، الحمام في الدور اللي فوق، من فضلك اتبعني"

مشيت وراها وأنا بتنفس ببطء؛

كُنت عارف إنها هنا في مكان ما،

بس المُخيف أكثر إنها هي كمان عارفة إني هنا!

(2)

كُنا واقفين بتراقب حوض الاستحمام وهو بيتلمي، صمت مُربك سيطر على  
المكان كُلّه، كانوا خايفين، حاسس بيهم ومش قادر ألوهمهم، بصراحة... أنا كمان  
بدأت أخاف؛

أنا الوحيد اللي كُنت شايفها وهي واقفة جوا حوض الاستحمام وبتتلوى زي  
ما تكون بتتعذب، كانت بتبصلي ومركزة نظراتها عليًا، كانت عارفة إني شايفها  
وكانت عاوزه ترعبي وتخلي الخوف يسكن قلبي، تنفست بعمق وأنا بحاول  
أسيطر على نفسي، تجاهلتها كالعادة وأنا ببص للسيدة تايلور، سألتها: "سيدة  
تايلور، هل بنتك واجهت المُشكلة دي ثاني من يوم ما بدأت تروح المدرسة  
ثاني؟"

: " مش عارفة، هيّ في مدرسة داخلية ومش بتيجي البيت، كُنت بكلّمها من أسبوع ومذكرتش أي حاجة غريبة، أعتقد أنّها بخير هناك "

سألّها تاني: " وإنّتي أو مستر تايلور مقابلتوش أي حاجة غريبة برا البيت؟ " بصوا لبعض، كان باين عليهم القلق والحذر، مستر تايلور رد: " على حد علمي لا، محصلناش أي حاجة غريبة برا البيت، كلّ الحاجات الغريبة بتحصلنا لما نكون في البيت بس "

حتى الآن وعلى أد المعلومات اللي معايا، الشيء ده مُرتبط بالبيت بتاعهم، مش بيهم هُما شخصيًّا، مُمكن يكون عاوز البيت... مُمكن يكون عاوزهم هُما، أنا مش عارف ده، بس اللي عارفه كويس إن الشيء ده لو سبناه هيجرهم ويجرني للجحيم مُباشرة، حاولت أطمئنتهم: " طب مبدئيًّا دي أخبار حلوة، الشيء ده مش عاوزكم إنتم، هو مُرتبط بالبيت "

الشيء أو البنت بطلت تتحرك في حوض الاستحمام وبدأت تبصلي بتحدي، كعادتي معاها تجاهلتها تمامًا وكأنها مش موجودة

همستلي تاني بصوت مُخيف: " كلّمهم هيموتوا هنا "

بدأت تغطس في المية اللي بتملي حوض الاستحمام، مكنتش عارف الباقيين شايفين إيه بس من النظرات اللي على وجوههم ففي حاجة مش طبيعية بتحصل، سارة المُساعدة بتاعتي كان بتقول بخوف وهيّ بتشاور على المية: " لونها بيتغيّر للأسود !! "

مستر تايلور كان بدأ يتوتر ويتصرف بعصبية، سيدة تايلور حاولت تداري خوفها وهيّ بتقول: " مُمكن الماسورة مسدودة؟ " سارة قالت بصوت واطي: " مُمكن "

الشيء أو البنت دي بصت لسارة بحزم، أخذت خطوة لأدام ناحية حوض الاستحمام، بعدت سارة من أدامها وحاولت أتصرف بعفوية وأنا بقول: " خلوني أشوف "

تجاهلتها وحاولت مبصش لهما بشكل مباشر، المية فعلاً كانت بتتحول ببطء للون الأسود، اللون الأسود كان بيخرج من وسط جسمها وبشرتها المشققة وبيغير لون المياه، بصتلي بتحدي وهي بتقول: " تعالي، قَرَب " المياه إبتدت تطلع فقاعات كأنها بتغلي، كان لازم أحط حل للموضوع قبل ما يتفاقم ويزيد ويخرج عن السيطرة، مديت إيدي عشان أشيل السدادة وأخلي المية تنزل في فتحة التصريف.

بصيت لمستر تايلور وقُلتله بابتسامة: " تمام، أنا شُفت هنا بما فيه الكفاية، خليني أسألك، هل فيه مكان تاني في البيت حصلكم فيه حاجات غريبة؟ "

كانت بتبصلي بغضب، مستر تايلور قال بتردد: " أوضة نومنا، بنصحى بالليل أنا وكارولين على صوت باب الدولاب بيتفتح ويتقفل بقوة " بدأنا نُخرج من الحمام، كُنت شايفها بطرف عيني واقفة جنب الباب بتبصلي بغضب وهي بتقطع شعرها .

دخلت أوضة النوم بتاعتهم، أوضة بسيطة مفيش فيها أثاث كثير، مشيت ناحية الدولاب وأنا بسأله: " الموضوع بيتكرر كثير؟ "

بصيت لمستر تايلور، كانت واقفة أدامه دلوقت، رد عليا: " قبل كده مكانش بيحصل كثير، بس الاسبوع اللي فات حصل تقريبا كل يوم، حاولنا نجرب كل حاجة بس الموضوع مكانش بيبطل، مهما عملنا كان بيحصل "

مشيت بإيدي على الدولاب وأنا بسأله: " باب الدولاب مقفول بالمفتاح دلوقت؟ "

مد إيدته في جيبه وخرج المفتاح، إداهولي وهو يقول: " إحنا بنفضل قافلينه طول الوقت للاحتياط "  
أخذت منه المفتاح وقررت أفتح الدولاب وأبص بنفسي:

جوا الدولاب كانت واقفة والغضب باين على وشها، كانت ماسكة رأسها بإيديها وبتصرخ: " اخرج برا... اخرج برا... اخرج برا "

المرة دي مقدرتش أتجاهلها، عينيًا جت في عينها، فجأة بدأت آلاف المناظر المرعبة تيجي في خيالي، أهلي بيموتوا بأبشع طرق مُمكنة، أصدقائي بيموتوا بأشنع سُبُل مُمكنة، كل الناس اللي أعرفهم بيموتوا. بدأت أحس بشعور غريب، كأني مريض أروحي بتطلع، مسكت راسي بإيديها وحسيت جسمي كُله بيتنفض من الألم، مقدرتش أنحمل، وقعت على الأرض وعينيًا مليانة دموع، سارة جرت عليًا بخوف وهي بتصرخ: " مسترودس، إيه اللي حصل؟ "

سارة كانت واقفة جنبني دلوقت وسانداني بإيديها على ضهري، بصيت على الأرض وشُفت دم، مناخيري كانت بتنزف، صرخت في سارة بألم: " مهما حصل متبصيش جوا الدولاب "

خدت نفسي بألم وكملت: " غمضي عينيكي واقفلي الباب من فضلك "  
الدُنيا كانت بتلف بيًا وأنا بحاول أقف، قالتلي بخوف: " حاضر "  
سمعت صوت باب الدولاب بيتقفل وأنا لسه دايم، برغم الألم والقلق والدوار اللي عندي، كُنت عارف حاجة واحدة بس:  
أنا محتاج شنطة المُعدات بتاعتي !!

لمستي... ولمستي بقصد !

كُنَّا نَازِلِينَ عَلَى السَّلْمِ لِلدُّورِ الَّلِي تَحْتَ، مَاشِي بِصُعُوبَةٍ وَسَارَةَ مَسْنَدَانِي، قَلْتَلِهِمْ بِلَهْجَةِ أَمْرَةٍ: "مَحْتَاجٌ مِنْكُمْ كُلُّكُمْ بِلَا اسْتِثْنَاءٍ إِنَّكُمْ تَخْرُجُوا مِنَ الْبَيْتِ حَالًا"

آل تَايَلُورِ كَانَ بَايْنِ عَلِيمِ الْقَلْقِ وَالتُّوتْرِ، نَزَلَتْ لِحَدِّ شَنْطَةِ الْمُعْدَاتِ بَتَاعَتِي، قَلْتَلِهِمْ وَأَنَا بَفَتْحِهَا: "لَا زُمْ تَسْمَعُوا كَلَامِي"

فَتَحَّتْ شَنْطَةُ الْمُعْدَاتِ وَخَرَجَتْ مِنْهَا شَوِيَّةٌ حَاجَاتٍ، نَدَهَتْ لِلْسَيِّدَةِ تَايَلُورِ: "كَارُولِينِ، إِدْهِنِي دِهْ عَلَى الْحَرْقِ الَّلِي فِي إِيدِكَ وَهِيخْتَفِي تَمَامًا"

شَكَرْتَنِي وَخَرَجَتْ هَيَّ وَجُوزَهَا مِنَ الْبَيْتِ، سَابُونِي فِي الْبَيْتِ أَنَا وَسَارَةَ لُوْحَدْنَا، كُنْتُ بَطَّلَعُ مَجْمُوعَةً مُعِينَةً مِنَ الْخَوَاتِمِ وَبِلِبْسِهَا فِي صَوَابِعِي بِتَرْتِيبِ مُعِينِ، نَدَهَتْ عَلَيْهَا: "سَارَةَ، مِنْ فَضْلِكَ إِخْرَجِي وَخَلِيكِي مَعَاهُمْ، طَمْنِمِمْ إِنِّي هَجَلُ الْمَشْكَلَةِ بَتَاعَتِهِمْ تَمَامًا، لَا زُمْ تَفْضَلُوا بَرَا وَمَحْدَشْ يَدْخُلُ إِلَّا مَا أَنَا أَطَّلَعُ" كَانَتْ هُنَا فِي الْأَوْضَةِ، حَاسِسٌ بِوُجُودِهَا، نَدَهَتْ عَلَيْهَا بِصَوْتِ عَالِي: "إِنْتِي فِينِ؟"

سَارَةَ خَرَجَتْ وَقَفَلَتْ الْبَابَ وَرَاهَا، سَابَتْنِي أَنَا وَالشَّيْءُ دَا لُوْحَدْنَا تَمَامًا !!

سَمِعْتُ الصَّوْتِ الْمُرْعَبِ مِنْ وِرَايَا: "هَيَّ دِي خَطْتِكِ عِشَانِ تَنْقِذْهُمْ؟" لَفَيْتُ وَرَايَا عِشَانِ أَشُوفُ عِلَامَاتِ الْمُنْتَعَةِ عَلَى وَشْهَا، كَانَتْ بِتَضْحِكِ ضَحْكَةِ مُرْعَبَةٍ، غَمَضْتُ عَيْنِيَا عِشَانِ مَشْ عَاوُزَ أَكْرَرِ التَّجْرِبَةِ الْمُرْعَبَةِ الَّلِي خُضَّتْهَا مَعَاهَا دِي تَانِي، بَدَأَتْ اْتَمَشِي فِي الْبَيْتِ، حَيْطَانِ الْبَيْتِ كَانَتْ بِتَتَحَرَّكَ كَأَنَّهَا حَيَّةٌ!، بَدَأَتْ أَسْمَعُ صَوْتِ صَرِيرِ وَخَدَشِ مِنْ وِرَايَا، مِنَ الدُّورِ الْعُلُويِّ كُنْتُ سَامِعُ صَوْتِ الْأَبْوَابِ كُلِّهَا بِتَتَفْتَحُ وَتَتَقْفَلُ بَعْنَفِ، سَمِعْتُ صَوْتَهَا الْمُرْعَبِ بِيَقُولِي: "لَا زُمْ تَمَشِي يَا رُودُس"

غمضت عينيًا وأنا بلف ناحية الصوت، فتحت عينيًا لثواني عشان أحدد مكانها، شُفتها، واقفة أدامي بالظبط وعلى وشها أكثر ابتسامة مُرعبة مُمكن تتخيلوها؛

مسكتها من رقبتهَا بإيدي اللي فيها الخواتم وزقيتها ناحية الحيطه:  
قالتي بصوتها المُرعب تاني: "لازم تمشي حالًا"  
الخواتم اللي في إيدي بدأت تحرقها، بدأت تصرخ وتتلوى في إيدي، بصيت لها بغضب وأنا بصرخ فيها: "إنتي... لمستيني!"  
حاولت تفلت مني، كانت بتقول وهي بتقاوم، صوتها يبقي مُرعب أكثر: "إنت نسيت!!"

صوتها بقي مُرعب أكثر وهي بتقول: "إنت اللي لمستي الأول"  
في عينيها إترسنت نظرة مُرعبة وهي بتقول: "وأنا أقدر أموتك مش بس أمسك"  
بدأت تتحرق، الرماد بيقع من جسمها وجسمها بيسيب علامة محروقة في الحيطه، وقعت على ركي وأنا بتنفس بعمق؛  
تمالكت أعصابي وأنا بقف وبخرج من الباب الرئيسي للبيت؛

شاورت لهم عشان يدخلوا البيت، بدأت ألم الرماد في أنبوبة صُغيرة، هحتاج الرماد عشان شُغلي، لومفيش خوارق يبقى مش هنشتغل، والخوارق مش شيء مُعتاد في العالم، عشان كده لازم تخلق حاجة أو تحضر حاجة تخوف الناس بدرجة كفاية عشان يتصلوا بيك؛  
وظالما حضرت الشيء... فهتقدر تتغلب عليه بسهولة.

زي ما بقيتوا عارفين؛

أنا مسترودس... أنا مُحقق الخوارق.

\* \* \*

( 16 )

## عندما يطرق الجحيم الباب

انتقلت لمدينة جديدة من سنة تقريبًا، مكنتش مُستقر في حياتي لحد كبير جدًا وبتنقل كثير بين الشغل، لما جتلي الفرصة دي قبلتها خصوصًا إني كُنت متشوق أنتقل للمدينة الجديدة؛  
خلال أسبوعين تقريبًا كُنت ودعت أهلي وأصدقائي القدام وحطيت أغراضي كلها في العربية واستعدت لرحلتي الطويلة، 4 ساعات سفر وهكون في المدينة الجديدة.

اتضح بأن الشخص كُل ما بيكبر في السن يببقي أصعب عليه إنه يكون صداقات جديدة، الوظيفة كانت مُريحة وأنا استقرت فيها بسُرعة، زمايلي في الشغل مريحين والروتين اليومي بتاعي كان لطيف جدًا، لكن كُنت وحيد، كُنت محتاج أقابل أصدقاء وناس جُداد، مكنتش بروح الكنيسة، مكنتش بروح حفلات، مكنتش بروح نوادي... عمومًا مكنتش بخرج كثير.

بعد أسبوعين من الوحدة والملل أجبرت نفسي على الخروج، رُحت لحانة محلية، قررت إني مش همشي من الحانة إلا ما أقابل ناس جُداد، بصراحة أنا سعيد إني رُحت لأنني هناك قابلتها؛

قابلت ليديا، كانت قاعدة على الترابيزة اللي جنبي، ابتسمت ليًا وابتسمت ليها، كلمتني على ذوقي في اختيار اللبس فضحكت، بعد شوية مشروبات العلاقة بينا أخذت شكل لطيف أوي، قررت أستجمع شجاعتي وأطلب منها إني أعزمها على العشا

لمّا وافقت حسيت إن حياتي بقى لها معني تاني وإن الملل والوحدة أخيرًا سابوني

مُكنتش ببطل تفكير فيها، مُكنتش بزهدق مهمما قضيت معاها الوقت، كانت لطيفة، جميلة، طيبة وحنينة.

بعد شوية وقت قضيناهم سوا في بيتي، وبعد ميعاد وإثنين وتلاتة، تأكدنا من مشاعرنا تجاه بعضنا البعض.

عدى على علاقتنا شهر، علاقتنا بقت أقوى وأحسن، مفيش بينا أي مشاكل أوحى اختلاف في وجهات النظر، وبرغم إن بقالنا شهر بس سوا إلا إننا كُنّا مُتأكدين إننا لازم نكمل عمرنا مع بعض.

حاجة واحدة بس كانت غريبة ومالهاش تفسير، دايماً كُنّا ببنام ونقضي الوقت في شقتي، ممنوع علينا نروح شقتها، الموضوع كان عادي بالنسبة لي، دا بيتي وبرتاج فيه، بس من يوم ما عرفتها شُفت شقتها مرة واحدة بس، شقتها في الدور الثالث من مبنى قديم بس قوي وشكله لطيف .

طلبت منها مرة أو إثنين إننا نسهر أو نبات في شقتها بس كانت بطريقة أو  
باخرى بتلاقي مهرب من الموضوع. مضغطتش عليها في الموضوع ده لأن أعذارها  
كانت دايماً مقبولة .

طيب... كل حاجة تغيرت بعد كده:

قررنا نقضي الليل في شقتها؛

ودلوقت بتمني لو كُنت سمعت كلامها.

كُنا في حانة وسكرانين، الجو في الحانة بقى مُمل أوي، قررنا نمشي أنا  
وليديا، لما خرجنا من البار كُنت عارف إني في حالة متسمحليش أبداً إني أسوق  
العربية، قررنا نطلب أوبر عشان نقدر نروح؛  
بس قبل ما أطلب أوبر لقيت إننا قُربين من شقتها، على بُعد كذا شارع  
بس، سألتها لو ينفع نقضي الليلة في شقتها بدل ما نروح شقتي، رفضت...  
إترجيتها... فكرت... كلمتها؛  
وأخيراً وافقت بصعوبة .

كُنا ماشيين ناحية شقتها لما سألتها بقالها أد إيه عايشة في الشقة دي،  
قالتلي إنها هنا من 3 سنين تقريباً، قالتلي كمان إنها عاوزة تسيب شقتها  
وتمشي، عاوزة تروح مكان أهدى شوية ويُفضّل لو كان في الريف؛  
وصلنا البيت الضخم اللي فيه شقتها، طلّعنا على السلم لحد الدور  
التالت، دخلنا الشقة

دي تاني مرة من يوم ما عرفتها أدخل شقتها، مش عارف السبب، الشقة كانت نظيفة ومُرْتَبَة، أنصف من بيتي بكتير بصراحة، حتى الأثاث بتاعها كان لطيف وعصري، ابتسمت وقلت لها إن بيتها لطيف جدًا وإننا لازم نقضي وقت أكثر هنا، بصتلي بقلق وقالتلي: "ممكن":

بدأنا نجهز نفسنا عشان نقضي الليلة هنا لبكرة، الوقت كان متأخر عشان كده غيرنا هدومنا ودخلنا ننام، لاحظت إنها سابت الباب موارب ودي كانت حاجة غريبة، معلقتش على الموضوع، إتغطينا كويس وسبت جسمي يسترخي، كُنت مُرهق وسكران وتعبان وبسرعة جدًا نمت؛

بس دا ما إستمريش كثير!

صحيت من النوم على صوت حد بيخبط على باب شقتها، فتحت عينيًا بصعوبة وأنا ببُص حواليا وبحاول أركز، الساعة كام؟، مين بيخبط في وقت زي ده؟، مسكت تليفوني وبصيت فيه، الساعة كانت 3:30 بعد نُص الليل، الوقت متأخر على إن حد ييجي يزور حد؛

حاولت أقوم لكن حسيت بليديا بتمسكي من إيدي، إيدها كانت باردة وبتترعش، بصيتلها بدهشة، ليه مش عاوزاني أفتح؟، سألتها مين اللي على الباب؟، مردتش عليًا لكن مسكت إيدي بقوة أكثر؛

الباب خَيط تاني، 3 خبطات، بصوت أعلى المرة دي:

بصيت لها بغضب وسألتها مين اللي بيخبط، شُفت نظرة خوف في عينها، قالتلي بصوت مليان خوف: "متقومش!"

كُنت حاسس بحيرة في الوقت ده، أسئلة كتير بتدور في ذهني، رد فعلها مُحير ومُخيف؛

مين اللي على الباب ؟

هيّ مخبية إيه عني ؟

يمكن ده حبيها القديم بيحاول يرجع لها ؟

الفكرة دي حسستني بالغضب، هو مفكر نفسه مين عشان يبجي يضايقها

في بيتها في الوقت ده؟

ليديا دلوقت بتحبني أنا ولازم كل الناس يعرفوا بده.

صارحت ليديا بأفكاري، هزت راسها بخوف وهي بتقولي إنه مش حبيها القديم، مش عارف أصدقها ولا لا، نظرة عينها مليانة زُعب، صوت الخبط على مرة تانية، 3 خبطات زي المرة اللي قبلها، حطت إيدها على ودها بخوف وهي بتحاول تمنع الصوت :

قُمت من السرير وأنا مقرر أشوف مين على الباب، أيًا كان فرد فعلي معاه مش هيكون لطيف، الرُعب اللي هو مسبيه لها مش هخليه يمر مرور الكرام، نظرة الرعب والهلع زادت في عينها وهي بتترجاني: " متفتحش الباب... أرجوك "

3 خبطات بصوت عالي، المرة دي غضبي زاد بطريقة مش طبيعية!

بس لاحظت حاجة غريبة، الصمت... الصمت مسيطر على المكان كله إلا صوت الخبط، عادةً لما حد بيخبط كل ده بيعلن عن نفسه عشان الشخص اللي جوا يعرف هو مين، لحسن حظي الخبط سكت، حبست أنفاسي وأنا مُنتظر يتكرر تاني لكن ما إتكررش تاني، تهدت بصوت عالي، ليديا حضنتني، مش عارف إيه اللي حصل ده بس أنا مُتأكد إنها كانت تجربة مُرعبة لها:

حاولت أسألها إيه اللي بيحصل، خوفها ودموعها وتوسلاتها ليا إني أنام ونتكلم الصُبح خلوني أسكُت تمامًا، بسرعة جدًا هي نامت لكن أنا فضلت صاحي طول الليل باصص للسقف وبحاول أفهم إيه اللي حصل !

اليوم اللي بعده كان يوم السبت ويوم السبت كان أجازة، صحينا متأخر وُرحنا المطبخ على طول عشان نفطر ونشرب القهوة، كان نهار لطيف، قعدنا جنب بعض على الكنية وحضنتها وبدأنا نتكلم عن خطط يومنا، ما سألتهاش عن اللي حصل الليلة اللي فاتت وكُنت مُنتظرها هيّ تفتح الموضوع، لكن الواضح إنها بتتجنب تتكلم في الموضوع تمامًا، قررت أسكُت وأسيب الأمر يعدي، لما تحب تتكلم في الموضوع هنتكلم، قررت أكون حبيب جيد وما أضعطش عليها في الموضوع ده، مش هكدب عليكم كُنت هنفجر من الغضب لكن اللي هون عليا شوية هوّ إنها أكدتلي إنه مش حبيها القديم.

اليوم كان عاصف والدينا مطرت، اقترحت عليها نقضي اليوم هنا ومنزلش من البيت، نتفرج على التلفزيون ونتعشى هنا، وافقت بسرعة ودي كانت مفاجأة بالنسبة ليّنا، اليوم كان بطيء وإحنا بنقضيه سوا بنتفرج على مُسلسلنا المُفضل حلقة ورا حلقة، الليل وصل وإحنا لسّه بنتفرج على التلفزيون وبنسمع صوت المطر برا، قررنا نتعشي، كُنت جعان جدّا، وقفنا نطبخ سوا، بصراحة خبرتي في الطبخ ضعيفة بس وقفت جنبها عشان لو احتاجت مُساعدة، جهزنا الأكل وأخذناه ورجعنا على الكنية تاني، أكلنا، لما خلصنا بصتلي بابتسامه لطيفة وقالتي إن اليوم جميل جدّا وإنها مبسوطه أوي، حضنتها وأنا بوافقها الرأي جدّا، قررنا نكرر اليوم تاني، طلبت مني فجأة نزل عشان نروح ننام في شقتي، دي كانت مُفاجأة بالنسبة ليّ، سألتها بدهشة ليه منباتش في شقتها هيّ بما إننا قضينا اليوم هنا، ابتسمت بقلق وهيّ بتقول إننا قضينا اليوم هنا يبقى ننام هناك عشان نغير جو:

قلت لها إن اليوم كان جميل وأنا مبسوط وعشان اليوم يبقى أجمل هننام هنا في شقتها.

كانت عاوزه تجادلني أو تختلف معايا في الرأي لكن هيّ كانت عارفة إن موقفها ضعيف ومعندهاش حجج منطقية، كُنت حاسس بيها بتدور على أي حجة تخلينا نُخرج من هنا ونروح شقتي، في النهاية وافقت بس بعد تردد ؛  
مكنتش فاهم هيّ خايقة من إيه، لو خايقة من الشخص اللي خبط عليها بالليل فأنا موجود هنا دلوقت ومش هسمح لأي حاجة مهما كانت إنها تؤذيها مهما حصل  
بعد شوية قررنا نروح ننام عشان بُكرة عندنا شغل الصُبح.

صحيت من النوم على صوت خبط على الباب، ليديا على طول قعدت على بطني وهيّ بتكتفني عشان ما أتحرّكش، كُنت شايفها فوقّي، عينها مفتوحة بخوف وبتترعش، الباب بدأ يخبط بصوت أعلى وأعنف، كُنت مستنيها تتكلم أو تفسر لي اللي حصل لكن هيّ كانت خايقة بطريقة مش طبيعية، كُنت متضايق جدًا من اللي بيحصل  
شخص مجنون بيحاول يخوفها كُل يوم بالشكل ده وهيّ خايقة منه ومش عاوزه تفسر لي إيه اللي بيحصل !

حاولت كتير تثبتني في مكاني لكن أنا كُنت اقوى منها، قدرت أتغلب عليها، قلت لها بغضب إني هروح أفتح الباب وأحط حد للمهزلة دي، قلت لها إني هتصل بالشُرطة لو مقالتليش إيه اللي بيحصل حاليًا؛  
بدأت تعيط وجسمها كله بيترعش، صوتها مليان خوف ورُعب وهيّ بتقولي:  
" اتصالك بالشُرطة مش هيحل حاجة، الشُرطة مش هتقدر تساعدنا "  
مكنتش فاهم كلامها، حاولت أقوم لكن مسكتني تاني، صوت الخبط على الباب بيعلى بدرجة غريبة؛

هددتها بصرامة إني هروح أفتح الباب لو مفهمتنيش دلوقت حالاً إيه اللي بيحصل، الرعب بان على ملامحها وهي بتترجاني أسكت دلوقت لحد ما يمشي وهي هتشرحلي كل حاجة:

قلت لها بصوت غاضب: "مين اللي يمشي؟، لازم تفهميني!"  
الخوف بان في عينها، جسمها كله إتهز وهي بتقول بصوت ضعيف: "الشیطان!!"  
الطريقة اللي نطقت بها الكلمة، الخوف اللي في صوتها وفي عينها، كلها حاجات خلّتي متأكد إنها مُقتنعة باللي بتقوله.

3 خبطات جُداد بصوت عالي على الباب، مسكت تليفوني وبصيت في الساعة، الساعة كانت بعد 3 بعد نُص الليل:  
كُنت حيران جداً!

عاوز أفتح الباب وأحط حل للموضوع اللي مسبب لها الرُعب ده:  
في نفس الوقت خوفها ورُعبها كانوا مخوفيني من الموضوع!  
3 خبطات بصوت عالي على الباب والغضب سيطر عليّ تماماً.  
مشيت ناحية الباب ومسكت المقبض بتاعه، ليديا جرت ورايا، صرخت فيّا، ترجّنتي، زقيتها بعيد، خلاص أنا مش قادر أستحمل، فتحت الباب فعلاً، برا الباب كان ظلام دامس؛

بس في وسط الظلام ده... كان فيه شيء؛  
ليديا صرخت بخوف وهي بتشدني من أيدي وبتجرني بسرّعة ناحية باب أوضة النوم، الخوف اللي على وشها مكانش طبيعي، قفلت باب الأوضة علينا، قبل ما تقفل الباب لمحت حاجة بتدخل الشقة من وسط الظلام، حاجة مُرعبة!

قفلت باب الأوضة كوديس ووقفت ترعرش وراه، ملامح وشها والنظرة اللي في عينها والرعدة اللي في جسمها قالوا ليّا إني إتصرفت غلط، قبل ما ألاقي وقت أفهم منها إيه اللي حصل سمعنا حد بيخبط على باب الأوضة ؛  
ليديا كانت هتصرخ واطي مرعوش من الخوف، كُنت واقف ببُص عليها وأنا مش تتلو صلاة بصوت واطي مرعوش من الخوف، كُنت واقف ببُص عليها وأنا مش عارف أعمل إيه أو إيه اللي بيحصل ؟  
فيه حد دخل الشقة، أنا شُفته بعيني، ودلوقت بيخبط على باب أوضة النوم،

بلعت ريتي بصعوبة، دلوقت بدأت أحس بالخوف !  
كُنا في خطر، لازم نتصل بالشُرطة بس التليفون الأرضي والهواتف المحمولة بتاعتنا برا في الصالة، لازم أتصرف، لازم أعمل حاجة ؛  
مشيت ناحية باب الأوضة، ليديا جرت عليّا بخوف لكن طمئنت إني مش هفتح الباب

صوت الخبط تاني من على الباب وبصوت عنيف  
حطيت ودني على الخشب بتاع الباب، مش سامع أي حاجة  
مش سامع صوت حركة... مش سامع صوت تنفس... مش سامع حاجة خالص، حاولت أستجمع شجاعتي وأسأل بصوت عالي: " مين برا ؟، إنت عاوز متنا إيه ؟؟ "

الصمت سيطر على المكان تمامًا ؛  
صوت 3 خبطات اقوى من كُل المرة، الباب كان هيتكسر، بصيت لليديا بخوف، كان عندي أمل ألاقي عندها إجابة أو حل، مع كُل ثانية بتْمُر وكُل لحظة بتعدي كان خوفي بيزيد ويبقي اقوى.  
قالتلي: " الشيطان ! "

هزيت راسي بعنف، أنا رافض الفكرة دي، رافض أصدق ده، بس أنا شُفت  
الشيء اللي على الناحية الثانية من الباب وهو بيدخل، شيء شير حاسس بيه  
من ورا الخشب !

حسيت بحركة من ورا الباب، فكرت إن الشيء اللي ورا الباب بيتحرك،  
بهدوء وبدون صوت نزلت على الأرض، بصيت من تحت الباب عشان أتأكد:  
من تحت الباب شُفته، وجه أسود شكله مُخيف وعين صفرا مُرعبة كانوا  
يبصولي من الناحية الثانية، حسيت بألم مش طبيعي، خوف مش مبرر تملك  
كُل حته في جسمي، رميت جسمي على الأرض وأنا بصرخُ بألم، ليديا وقعت  
جنبي وهي بتسألني بقلق عن إيه اللي حصل ؟، حضنتني وبدأت تهديني، كُنت  
بترعش من الخوف وعينيا مدمعة، في عينها شُفتها مصدقة إن الشيء الموجود  
على الناحية الثانية من الباب .... هو الشيطان!

طاخ... طاخ... طاخ

أنا كُنت خايف وهي كانت مرعوبة، مش عارفين نعمل إيه ولا نتصرف  
إزاي؟!

ليديا بدأت تعيط بخوف وهي بتقول: " هو جاي عشاني، كُنت طفلة صُغيرة  
وجاهلة، وعدته إنه لو منحني السعادة، أهلي كانوا قاسيين وحياتي كانت  
صعبة... مكنتش عارفة أنا بعمل إيه، أنا أسفة... أنا أسفة "  
سكتت شوية وبدأت تعيط أكثر: " دعيت لربنا كتير بس مفيش حاجة  
تحققت، كنت زعلانة... كُنت حزينة... كُنت بس عاوزه أفرح وأبقى سعيدة،  
عشان كده فكرت إنني... "

مقدرتش تكمل كلامها، بدأت تعيط أكثر، مكنتش فاهم هي بتتكلم عن  
إيه؟

طاخ .. طاخ... طاخ

مع كل خبطة كان جسمي ينتفض من الخوف، بدأت تتكلم تاني، قالتلي إنها لما كانت صغيرة أهلها كانوا قاسيين عليها، كانت بتنام كل ليلة وهي بتعيّط وبتدعي ربنا، كانت بتتوسل لله عشان بيعت لها ملاك ينقذها من اللي هي فيه، ولما الدعوات ما إستجبتش لها قررت تنتقل للجهة الثانية، وعدت الشيطان إنها هتكون ملكه لو إداها السعادة.

بعد 3 أيام أهلها ماتوا في حادثة عربية بشعة وانتقلت تعيش مع أجدادها اللي حبوها فعلاً ووروها السعادة اللي كانت بتحلّم بيها. كانت بتحكيلي وإحنا محبوسين في الأوضة وسط الظلام بترعش من الخوف وعلى الباب برا واقف الشيطان مستني:

طاااخ... طاااخ .... طاااخ

المرّة دي صوت الخبط كان أعلى وأعنف، الخشب بدأ يتشقق، صوت مُرعب بدأ ييجي من ورا الباب، صوت زي صوت خدش أظافر في الخشب، الصوت كان مُرعب وبيتكرر مرة ورا الثانية بشكل مُخيف:

شدت ليديا من إيدها وقعدنا على طرف السرير، سألتها بجديّة عن إذا كان كلامها ده صحيح وحصل فعلاً، هزت راسها بالموافقة، قالتلي إن الوضع مستمر بقاله 6 شهور، كل يوم الساعة 3 بعد نص الليل الخبط بيبدأ، في البداية مكانتش فاهمة، كانت مفكرة إنه حد بيحاول يقتحم بيتها، واتصلت بالشُرطة. لما وصلوا ملقوش أي أثر أو أي دليل لوجود مُقتحم أو مُتطفل، أربع مرات تبلغ الشُرطة والأربع مرات ملقوش أي أثر، حذروها لو بلغت تاني بلاغ كاذب هيكون رد فعلهم مش ظريف، من حوالى أسبوعين تذكرت الوعد اللي وعدت بيه الشيطان وهي صُغيرة .

الصوت كان بيعلى من على الباب وهي أدامي مُهارة، الخوف كان مالي قلبي، حاولت أتنفس ببطء عشان اهدى شوية وأفهم لو كلامها فعلاً صح، إيه اللي منعه من إنه يكسر الباب ويدخل ياخذ روحها؟، بصيت لليديا وسألتها بقلق عن اللي هنعمله دلوقت، قالتلي إنها عادةً بتستنى لما يبطل خبط وبتنام، ساعات ببطل بعد دقائق وساعات بيستمر لحد شروق الشمس، كانت حاسّة بالعجز، بينها وبين الشيطان حاجز خشبي ضعيف، للمرة الأولى أكون مُمتن للباب الخشب إنه مانع دخول الشيطان لنا دلوقت إحنا في الدور الثالث، لوحدنا، مُحاصرين في أوضة مظلمة وبرا الباب واقف الشيطان، تليفوناتنا برا ومفيش أي وسيلة تواصل بيننا وبين أي حد!

فتحت الستارة وبصيت للشارع الفاضي وأنا بفكر المفروض أعمل إيه، حاولت افتح الشباك بس كان مقفول بقوة شديدة، ليديا فهمت أنا عاوز أعمل إيه وحاولت تساعدي، وبرغم مجهودنا إحنا الإثنين إلا إننا مقدرناش نفتح الشباك

كُنّا مُحاصرين هنا بدون أي أمل للنجاة على الإطلاق!

صوت الخبط كان مستمر بدون توقف، ليديا سدّت ودانها وسابت جسمها ينهار على الأرض؛

مفيش أدامنا غير إننا نستنى!

صوت الخبط لسه مُستمر، حاضن ليديا وهي بتعيط بحرقه، لسه مش عاوز يسبنا لوحدنا بس ليديا بتقول إنه مهما طول بيمشي في النهاية مع شروق الشمس، الساعة دلوقت تقريباً 5 صباحاً، هانت؛

الشمس لسه مطلعتش، ساعتى تقريبًا عطلانة لأن الساعة بتقول إنها 3 بعد نُص الليل، ده مُستحيل يكون صبح، مفيش أي شخص في الشارع، مفيش أي عربية عدت بقالها فترة، صوت الخبط لسه مُستمر... يا الله!

أنا تعبت، الصرخ في الشباك مع صوت الخبط على الباب كانوا مُرهقين نفسيًا جدًا، كمان الصرخ في الشباك مش جايب أي نتيجة، حاولت أكسر زجاج الشباك لكن مهما عملت مكانش بيتكسر، مُستحيل!  
فيه حاجة مش طبيعية، اللي بيحصل ده مش منطقي، الظلام لسه مسيطر على الشارع والشمس لسه مطلعتش، صوت الخبط توقف من شوية، اتمنى من الله يكون الكابوس ده خلص!

أنا جعان، مش عارف إحنا محبوسين هنا بقالنا أد إيه، ليديا على السرير، عيظت لحد ما النوم عليها، صوت الخبط رجع تاني، أقوى وأعلى من كُل مرة، أنا خايف جدًا، مرعوب جدًا جدًا، مش عارف أتصرف إزاي؟!

مش قادر أتحمل صوت الخبط أكثر من كده !!!!!!!

ليديا استيقظت وبتعيظ، بتقول إنها عطشانة، أنا كمان عطشان جدًا، أنا حاسس إننا هنا من أيام، حاسس إني مشفتش الشمس من أيام طويلة، كُنت بسأل نفسي لو حد هيقلق عليها ويبجي يدور علينا في الشقة، إحنا مُحاصرين هنا، بس أكيد في وسيلة للخروج من هنا .

النوم كان أقوى متي، لما صحيت ليديا كانت حاطة إيديا على مقبض الباب ومُستعدة تفتحه، صرخت فيها، مش عاوز أخسرها، مش عاوز أخسر حُب حياتي، قُمت أجري ولما سحبتها بعيد عن الباب، الشيء اللي ورا الباب غضب، صرخ بوحشية، عُمري ما حسيت كمية الشر والحقد اللي في صوته دي قبل كده، صراخه كان مُرعب لأقصى درجة!

يا رب... ساعدنا ...

ليديا مش بخير!

مش هنقدر نستحمل أكثر من كده بدون مياه، الساعة بتقول إننا 3 بعد  
نُص الليل وده مستحيل :

حاسس إننا هنموت هنا، ليديا نايمة على السرير مش بتتحرك، مش عارف  
عايشة ولا ماتت، المفروض أروح أتطمئن عليها، بس أنا تعبان ومُرهب جدًا،  
الخبيط مُستمر بقوة ؛  
أنا حاسس إني هتجنن !

لازم أحط حد للموضوع ده، ليديا محتاجة عناية طبية وإلا هتموت، لسه  
الظلام مسيطر على الجو ولسه الخبيط مُستمر على الباب بدون توقف، أنا  
هفتح الباب، مهما كان اللي مستنينا برا مش هيكون أسوأ من الحالة اللي إحنا  
فيها دلوقت، أنا هفتح الباب، سمعت الشيء بيصرخ بوحشية من ورا الباب،  
تقريبًا هو مُتحمس، أنا كتبت ده عشان تعرفوا اللي حصل لينا، أنا هفتح  
الباب ...  
إدعولي.

ملحوظة: دي ورقة لقوها في الأوضة بعد ما لقوا الإتين ميتين وعلى

وشهم اعنى علامات الرعب، حتى الآن مش عارفين السبب اللي موتهم ومفيش  
أي دليل إلا الورقة اللي هو كتبها قبل ما يفتح الباب، الشرطة فعلا لقوا باب  
الأوضة مشروخ كأن حاجة ثقيلة كانت بتضربه بقوة !

\*\*\*

( 17 )

## لم أكن وحيدة

بكره أمشي لوحدي في الظلام، في الحقيقة الظلام مش هو اللي بيخفوني، بالعكس أنا بحب السما وهي مُظلمة، بحب نور القمر الضعيف وهدوء الليل، الحاجات دي بتريحني نفسياً، الوقت الوحيد اللي بحس فيه براحة نفسية هو الشوية اللي بمشي فيهم وسط الظلام. لكن كوني إنسانة وحيدة في مدينة كبيرة بيتطلب مني أكون على أهبة الاستعداد طول الوقت، لازم أكون مُستعدة طول الوقت، خصوصاً بالليل، أنا ساكنة في الجزء الشمالي من المدينة، بعيد تماماً عن الأحياء سيئة السمعة وأماكن إطلاق النار، لكن ده مش معناه إني آمنة تماماً طول الوقت .

يوم الخميس اللي فات مثلاً في شابة من سني تقريباً إتخطفت، على بُعد حاجات بسيطة عن بيتي، لقوا جُثتها مذبوحة ومسروقة في الشارع، الموضوع مسبب ليا زُعب طول الوقت :

فاضل 10 دقائق تقريباً وأوصل بيتي، صديقتي وزميلتي في السكن كان المفروض تعدي عليا بالعربية عند الشُغل ونرّوح سوا، بس هي قابلت حبيها وسكروا سوا ونستني، دخلت على النت عشان أشوف مواعيد الأوتوبيسات

لكن لسوء حظي مفيش أي أوتوبيس قبل 45 دقيقة تقريبًا، قررت أمشي لحد البيت وأنا بقول لنفسي إن الموضوع مش كبير ولا خطير.

الجو كان برد جدًا، نفخت في إيديا عشان أدفهم شوية، مكانش لازم انسى القفازات بتاعتي النهاردة، درجة الحرارة تقريبًا 8 تحت الصفر، دورت حواليا على أي تاكسي أو عربية أتطفل عليها لكن الشارع كان فاضي تمامًا، لمدة 10 دقائق تقريبًا مفيش أي عربية من أي نوع عدًا في الشارع، كُنت وحيدة تمامًا؛ حاولت أطلع تليفوني عشان أطلب أوبر لكن افتكرت إنه فاصل شحن، لفيت حواليا بدور على أي مكان أبعد فيه عن البرد ده، مفيش أدامي غير مقبرة حزينه، تصميمها لطيف وأنا بحب شكلها جدًا، المقبرة قديمة وتقريبًا مشفتش حد بيتدفن فيها أو ييزور حد فيها من فترة كبيرة جدًا، قررت أدخل أختصر الطريق من جوا المقبرة، الجو كان برد ومش قادرة أستحمل وفعلاً المقبرة هتختصر عليًا طريق طويل جدًا.

أكثر قبر كُنت بحب شكله كان قبر هيلينا كرينشاو، شاهد القبر بتاعها على شكل شجرة رخامية منحوت عليه إنها ماتت سنة 1845، ابتسمت لما شُفت شاهد القبر بتاعها وتمنيت لو مُت يختاروا ليًا شاهد قبر باللُطف ده.

الوقت تأخر والجو برد، ليه اليوم ده تحديدًا تليفوني يفصل شحن؟، ليه اليوم ده تحديدًا أنسى القفازات بتاعتي، ليه اليوم ده تحديدًا أقرر أدخل المقبرة؟، هزيت راسي عشان أطردها كلها الأسئله دي، بدأت أسرع خطوتي شوية. وصلت لنُص الطريق، هانت نُص الطريق بس وهخرج من المقبرة وأكون أدام بيتي. خمس دقائق تقريبًا مش أكثر، خمس دقائق وهكون في البيت بشرب قهوة سُخنة تدفيني، خمس دقائق وهكون تحت الغطا مع قطتي وكتاب جديد اقرا فيه لحد ما أنام .

صوت خافت تردد من على يميني، يمكن صوت الفئران، المقابر مليانة  
فيران، أنا عادةً بكره الفئران وبخاف منهم، لكن طريق المقبرة أقصر وادفي من  
الشارع الرئيسي، بدأت أحس برقبتي دافية، بعد شوية حسيت إن إيدي  
بتسخن، حاسة إن شلال دفا بيغمُر جسي كُله، إحساس غريب أول مرة  
أحسه، فيه حاجة غريبة، ببُص على إيدي فوجئت إنها مليانة دم ...  
مليانة دم !

حسيت بألم حارق في رقبتي، حاسة إن جسي بقى أخف، حسيت بحد  
بيمسكتي، بيشدني لورا، بيشدني بعيد عن بوابة المقبرة، بيرجعني ورا ناحية قبر  
هيلينا كرينشاو، القبر اللي تمنيت لوليا قبرزه !

الدم بيزيد، إيدي بتتملي دم، حاسة بالدم بيغرق رقبتي، مش قادرة أقاوم،  
مش حاسة بإيديا، مش عارفة مين اللي بيشدني وبيخطفني ؟، مش عارفة مدى  
سوء إصابتي ؟، حسيت بعيني بتتقل، راسي ثقيلة وعاوذة أنا، عاوذة أغمض  
عيني، هو الدم بينزف من رقبتي؟ ولا من راسي ؟، وليه محستش باللي أصابني،  
ليه محستش بأي ألم ؟، إيه اللي بيحصل !

" بطلي تقاوميني يا عاهرة، هعورك تاني والمرة دي هتكون أكبر "

أنا بقاومه ؟، أنا مش حاسة إني بتحرك أصلاً، أنا فاقدة السيطرة على  
جسي ومش حاسة بأي حاجة، حسيت إني لازم أنزل رقبتي لتحت، لازم أوطي  
راسي لتحت عشان أوقف التزيف، معنى كده إني مجروحة في رقبتي، كان  
بيحاول يذبحي !؟، بس فيه دم على وشي، يبقى أكيد ضربني على راسي كمان،  
لازم أقاومه، في اللحظة دي تمنيت لو كُنت إستنيت الأوتوبيس !!

حسيت بالبرد، مش برد الموت، لا برودة لطيفة مُحببة للنفس، كان بيشدني مع اتجاه الرياح، لمدة ثواني حسيت بإيدي وحسيت إني أقدر أتحمك فيهم، مش عارفة إيه اللي بيحصلي، عيني بترمش، رجلَيَا، رجلَيَا حسيت بيها لثواني برضه، كان بيجرني على الأرض وسط القمامة والقذارة اللي في المقبرة، لمحت زجاجة مكسورة، عقلي كان بيصرُخ فيَا إني لازم أمسكها، لازم أمسكها قبل ما يفوت الأوان. كان بيشدني على الأرض وهوَ باصص الناحية الثانية. مش باصص عليًا، كان ماشي بسرعة، كان عاوز يروح المكان اللي هيقتلني فيه، مش لازم أسمح بده مهما حصل !

الزجاجة المكسورة، اللعنة، جرحت كف إيدي، مش جرح كبير بس جرح مؤلم، لحُسن حظي ما أجدش باله، كان لسه باصص الناحية الثانية. لازم أصرخ فيه عشان يبُص ناحيتي وأقدر أطعنه بيها، صرخت بأعلى صوتي، مكنتش مُتأكدة الصرخة كانت جوايا ولا برا، كان مكمل في طريقه كأنه مسمعش حاجة، أظن إني صرخت لجوا، أي حركة لفي أو لرقبتي كانت بتسبب في شلال من الدماء، لمحت عربية واقفة، فرحت، قلبي دق، اللعنة، دي عربيته هو!

اللعنة، لا... لا... لا، مش هسمح له يركبني العربية بالعافية، مش هسمح له يوديني لحد مكان موتي، مش هسمح له ياخدني لوفاتي بدون مقاومة، لازم أتحرر منه، لازم ابقى حُرّة، حاولت أحرك إيدي المجروحة وأنا ماسكة الزجاجة المكسورة، كان موطي وبيحاول يفتح العربية بإيده الشمال لما هاجمته :

جسمي كُلّه اندفع ناحيته، مش عارفة جبت القوة منين بس مُمكن كُنت مصحوبة برغبة البقاء على قيد الحياة، حسيت بالدم بينفجر من رقبتي زي الشلال بس مكنتش مُهتمة، جرحته في وشه، تقريبًا جنب عينه مُباشرةً، صرخ



بصيت على المكان اللي جاي منه الصوت، على بُعد حوالي 15 قدم مني كانت واقفة ست، كان باين عليها القلق، مكنتش قادة أكتم انفعالاتي أكثر من كده، صرحت بألم وبوحشية، مبانس عليها أي رد فعل، شكيت إني صرخت جوايا للمرة الثانية، رقبتي مفتوحة وأكيد صوتي مش طالع، الدم بينفجر من رقبتي زي الشلال مع أقل حركة، بصيت حواليا ببطء، مفيش أي حد هنا غيرنا إحنا الإثنين بس ...  
كُنا لوحدنا.

تحركت بسرعة عشان تقف جنبي، كُنت واقعة في وسط رمال الشاطئ حاسّة بألم رهيب، قالتلي بصوت خافت: " إسمحيلي أساعدك، إنتي مُصابة بشدة ولازم تروحي المستشفى حالاً، إنتي نزفتي دم كثير، هحاول أساعدك " حاولت أهزراسي بالموافقة لها، كُنت حيرانة... ضعيفة... خائفة؛  
ألف سؤال كانوا بيمروا في راسي بدون إجابات، هو يعرفني؟، يعرف بيتي؟، يعرف شكلي؟، هل أنا بأمان؟، مش قادرة أفتَح عينيًا أكثر من كده، حاسّة إن هيغى عليًا، الدنيا بتلف بيًا، سندنني بإيدها وبدأت تساعدني، كانت بتسألني: " أنا لسّه مخلصه شُغل ومتعودة بعد شُغلي بقف أدام البُحيرة شوية، برتاح نفسيًا هنا، سامعاني؟، إنتي حد هاجمك؟؟ "

بحاول أزد... بحاول أصرخ... بحاول أتكلم... مش قادرة... مش قادرة  
حست بيًا، حضنتني برفق وهيّ بتحاول تهديني: " خلاص هانت، قربنا نوصل، شقتي هناك أهي، هندخل الشقة ونطلب الإسعاف، هتكوني بخير، متقلقيش "

حاولت أبتسم لكن مقدرتش، كُنت أضعف من إني حتى أقدر أبتسم، بس أنا مش هستسلم، مش لازم أستسلم .

سمعت صوت سارينة الإسعاف، أكيد هي كلمتهم من غير ما أخذ بالي، على ضوء سارينة الإسعاف بدأت أشوف وجه المتقذبة بتاعتي بوضوح، بطلتي، كانت جميلة، وشها مُريح وملامحها هادية، كانت لابسة زي مستشفى وعليه علامة مكتوب عليه اسمها ( سارة )

قلبي كان بيدق إنما باقي جسسي كان بارد بطريقة مش طبيعية :

كُنت سامعة صوت الناس جوا عربية الإسعاف، كانت بتبصلي ومُبتسمة وهي بتقولي: " قدرنا نعملها "

حضنتي برفق، كُنت حاسّة إني بحلم، الرؤية ضبابية وحاسّة إن جسسي خفيف، حاولت أفتح فمي وأتكلم، جسسي كان بيترعش من البرد، كُنت عاوزه أشكرها بس مش قادرة، مش عارفة هتقدر تشوف نظرة الشُكروالامتنان اللي في عينيا لها

فجأة اختفت... كل حاجة اختفت... أنا مُت !!؟

حسيت بحد بيشدني تاني، جسسي إترعش من الخوف، قدر يوصلني، لمحت قفازات، قفازات بلاستيكية طبية، شايفة أطباء وسامعة أصوات خافتة مش قادرة أميزها، ارتحت... أنا هنجو... سبت الظلام يسيطر مرة ثانية .

سامعة صوت بيقول من بعيد: " احتاجت عُرز كثير، لِحُسن حظها الضربة جت بعيد عن الشُريان بجاجات بسيطة، هتحتاج علاج طبيعي وبرنامج تأهيلي، ركبنا دُعامة على رقبها وهنحتاجها تفضل موجودة لوقت طويل، كان في جرح في راسها احتاج 7 عُرز، هتكون كويسة "

حسيت بحد بيحضني، فتحت عينيا ببطء وبصعوبة، كُنت بحاول أشوف مين بيحضني، كانت ماما، ماما !!

معنى كده إني حية !!، أنا نجوت !!، أنا كويسة !!  
حسيت بدموعي، حسيت بضربات قلبي، حسيت إني على قيد الحياة،  
بصيت لماما وابتسمت بضعف، همستلي بصوت واطي: "أنا بحبك"  
باست جبيني وأنا بقولها: "أنا كمان بحبك"  
شاورت على التليفزيون الصُغَيْر اللي أدام سرير وهي بتقول: "بيتكلموا  
عنك في الأخبار"  
سندتني عشان أقدر أشوف الشاشة ورفعت درجة الصوت؛

" قسم سُرطة شيكاغو لم يعلن عن اسم الناجية لسه، بس صرحوا إنهم  
لقوا الضحية على باب قسم الطوارئ في حدود الساعة 2:30 بعد نُص الليل،  
حتى الآن السُلطات تجهل إزاي الضحية وصلت للطوارئ بمفردها، التحقيقات  
الآن بتحاول الوصول لأي معلومات أو أي شهود، المعلومات اللي عندنا بتقول  
إن الجاني هو نفس الشخص اللي خطف وذبح المُمرضة المسكينة سارة من  
يومين، قسم الشرطة أعلن إنهم بيسعوا بكل قوتهم وجهدهم من أجل تحقيق  
العدالة".

\* \* \*

(18)

## حارس الأمن الليلي

أنا بشتغل حارس أمن في مستشفى في وردية الليل، مبنى المستشفى قديم ومكون من 7 أدورا، اتبنى تقريباً سنة 1800 وكان كلية لدراسة التمريض قبل ما يتحول لمستشفى من فترة كبيرة وجنبه مبنى صُغِيرْ مهجور بنستعمله كمخزن مهجور للمستشفى.

شُغلي كحارس أمن في وردية بتبدأ بالليل بيخلي المطلوب مني سهل وبسيط، مطلوب مني التعامل مع المرضى اللي عاوزين يهربوا من المستشفى أو الناس اللي عاوزين يتسللوا لزيارة حد في وقت غير وقت الزيارات، أو حد عاوز يسرق مورفين أو أي مُخدر تاني من جوا، أنا وزميلي في الشُغل بنقعد في كُشك صُغِيرْ برا المستشفى، بصراحة المكان بالليل بيبقى موحش ومُخيف، بس مهما كان المكان برا مُظلم ومُخيف، كُنت بفضل أكون برا على إني أقضي وقتي جوا مبنى المستشفى بالليل أو الأسوأ إني أقضي وقت جوا المخزن المهجور.

بيطلب مننا ندخل مبنى المخزن المكوّن من 4 أدورا كُل ليلة عشان نفحصه ونتأكد إن محدش اقتحمه، بكون حريص جداً أخذ معايا زميلي في الشُغل ونفضل سوا لحد ما نفحص المبنى فحص سريع جداً ونُخرج ؛

المخزن ده مُخيف !

دائمًا بنسمع إشاعات إن المستشفى والمخزن مسكونين بأرواح شريرة،  
ممكن، ليه لأ؟!

على الأقل حالة وفاة واحدة بتحصل كل يوم جوا المستشفى، أنا من يوم ما  
اشتغلت هنا مشفتش أي حاجة خارجة عن المؤلف خالص، زميلي في الوردية  
بيقول إنه طول الوقت بيسمع حاجات بتتحرك وبيشوف ظلال خافتة بتظهر  
ولمّا يبص عليها بتختفي؛  
كل ده إتغير لمّا قررنا نلعب أغبي لعبة مُمكنة !

كنا قاعدين في الكُشك أنا وفرانك بنحاول نقضي وقت الوردية بأي  
طريقة، بعد شوية سمعنا حد بيقرب مننا، بصينا من الشباك، كان مايك،  
حارس أمن معانا مسؤول عن مكان تاني من المستشفى بس في الليالي المملة  
اللي زي دي ببيجي يقضي معانا الوقت، مايك مؤمن بالأشباح والأرواح  
والماورائيات عمومًا، مايك دخل قعد جنبنا وهوّ بيسأل: " إنتم عُمركم شفتوا  
حاجة غريبة جوا المخزن؟ "

هزينا راسنا سوا بالرفض أنا وفرانك، سألنا بقلق: " طبعًا إنتم عارفين إن  
المكان ده مسكون "

بان عليًا الضيق وأنا بقوله: " مايك... كفاية "  
قال بحماس: " لا دي حقيقة، المكان ده قبل ما يبقى مستشفى كان كُلية  
تمريض، بيقولوا إن الكلية كانت صعبة والدراسة شاقة وقاسية والامتحانات  
مستحيل تتحل، الطلبة عبروا عن احتجاجهم على صعوبة الكلية بالانتحار "  
قلتلته بغضب: " دي اغبي حاجة سمعتها في حياتي "

كامل كلامه بحماس وهو يحاول يقنعي: " 5 طلبة سنة 1910 أعلنوا عن احتجاجهم على صعوبة الدراسة بالانتحار الجماعي، نطوا من فوق السطح بتاع المخزن وماتوا كلهم "

بصيت له وأنا بقول: " إنت مصمم تثبتلي إنك غبي "

مايك بصلي بخوف وهو بيقول: " إنت مش مصدق "

قلته بغضب: " مفيش حد عاقل هيصدق اللي إنت بتقوله ده ! "

صوته بدأ بيان عليه الخوف وهو بيقول: " عارف الخزانة الزجاجية اللي في مدخل المخزن، اللي فيها الخمس تماثيل البورسلين اللي لابسين زي الممرضين؟ "

طبعًا كنت عارف هو بيتكلم عن إيه بالضبط، أدام المدخل في خزانة زجاجية فيها 5 تماثيل بورسلين لابسين ممرضين بس مش مكتوب عنهم أي تفاصيل، بصراحة التماثيل دول كانوا مُرعيين، كامل كلامه بخوف: " ال 5 تماثيل دول إتعملوا تكريمًا لل 5 طلبة، وبيقولوا إن أرواحهم الغاضبة سكنت في ال 5 تماثيل، بيقولوا كمان إنك لو طلعت الدور التالت ووقفك أدام باب أوضة 333 وبدأت تخبط الساعة 3:33 بعد نُص الليل، التماثيل دي هتقرر تلعب معاك إستغماية ! "

مقدرتش أمسك نفسي أكثر من كده، ضحكت بصوت عالي، بصراحة دمعت من كُتر الضحك بس رد فعل فرانك كان غريب، الخوف بان عليه وهو يببُصلي، بطلت ضحك وبصيته باستغراب وأنا بقوله: " فرانك، متقوليش إنك مصدق الهراء ده ؟! "

فرانك قال بخوف: " أنا سمعت الكلام ده قبل كده "

و كأى غيبي في الدنيا قررت أثبت لهم إن الكلام اللي هُما بيقلوه غلط تمامًا، كُنت عاوز أثبت لهم إنهم جُبناء وبيصدقوا أي إشاعات ؛

و الساعة 3:32 بعد نُص الليل كُنا واقفين أدام باب أوضة 333 اللي في الدور الثالث، وخبطت على الباب 3 خبطات !!  
بصيت لهم بسُخرية، محصلش أي حاجة، ابتسمت بشماتة وأنا بقول: " محصلش حاج... "

قبل ما أكمل الجُملة سمعت صوت باب بيتقفل بقوة من تحت، الخوف ملَى قلبي والرُعب زاد في عينهم، كُنا كُنا خايفين زي بعض ويمكن أنا أسوأهم... أنا اللي خبطت !

مسكت مايك من كتفه بقوة وأنا بهمس له بغضب: " مين اللي تحت ؟، إنت عامل فينا مقلب ؟؟ "

مايك هز راسه من غير ما يرد بس الخوف اللي ظهر في عينيه قالي إنه مُستحيل يكون مقلب، أيًا كان اللي بيحصل فهو حقيقة، مسكت الكشَّاف بتاعي وأنا بقولهم: " لازم نفتش المكان كويس، مُمكن يكون لص دخل المخزن " نزلنا للدور الأول عشان نفتش المبني من تحت لفوق، كُنا بنتحرك ببطء، بخوف، بهلع، كُنت ماشي أدامهم وفرانك ورايا ومايك ورانا، مشيت بالكشَّاف على كُل أبواب الدور الأول، كُلهم كانوا مقفولين كويس ومفيش أي إشارة إن حد فتحهم مؤخرًا، مشيت ببطء لحد الخزانة الرُجاجية ووجهت الكشَّاف ناحيتها، وآه التماثيل كانوا اختفوا !

مايك بلع ريقه بصعوبة وهو يقول: " تمام جدًا، تقريبًا إحنا كده انتبهينا "

بصيته بغضب وقبل ما أصرُخ فيه حسيت إن درجة الحرارة بتتخفض،  
كُنت بردان جدًّا وأنا بترعش من البرد، فجأة سمعنا صوت شرير بيهمس: "  
بدأت اللعبة... لازم تلاقوهم بسرعة... وإلا... حاجة سيئة هتحصل "  
بصينا لبعض بخوف، مفيش أدامنا غير إننا نلاقهم وبأقصى سرعة  
ممكنة، وجهت الكشَّاف ناحية أقرب باب لبنا وقتلتهم بصوت بترعش من  
البرد والخوف: " يلابينا"

فتشنا الدور الأول بالكامل، مفيش أي حاجة ورا الأبواب غير المُعدات  
بتاعة المستشفى، وقفنا أدام سلم الدور الثاني وقبل ما نطلع سمعنا صوت  
خافت، زي ما يكون 3 أو 4 أطفال بيجروا فوق في الدور الثاني، خطوات  
خفيفة بتجري بسرعة، مايك همس بخوف: " أنا مش هكمل معاكم "

لف وشه وكان على وشك يمشي لما مسكته من كوعه بقسوة، قتلته  
بغضب: " إنت السبب في كُل ده، وهنكمل كُل ده مع بعض "  
طلعنا السلم ببطء وكأنا طالعين لمبيرنا المجهول، خطوات مُرتعشة  
وقلوب بتدق من كتر الخوف، لما وصلنا الدور الثاني سمعنا صوت حركة  
خافتة، الصوت كان جاي من آخر الممر، بدأنا نمشي ببطء ناحية الصوت،  
وقفنا أدام باب من الأبواب، الصوت جاي من وراه، مسكت مقبض الباب  
وبدأت أفتحه ببطء :

كان باب حمام قديم مهجور وريحته عطنة، جوا حوض الاستحمام كان  
فيه 3 تماثيل، ببطء مشينا ناحيتهم والخوف مالينا، مسكناهم وبدأنا نتحرك  
واحنا مرعوبين إن أي حاجة تحصل

رجعناهم الخزانة وقفلنا عليهم، فاضل إثنين والموضوع ينتهي، فرانك ومايك مرعوبين بطريقة مش طبيعية، أنا مُتماسك شوية، فرانك قال بخوف: " إيه رأيكم لو نفترق وندور عليهم؟ "

مايك صرخ فيه بغضب: " إنت مش بتتفرج على أفلام ؟، أسوأ قرار مُمكن ياخدوه مجموعة في مواجهة حاجة مُرعبة إنهم يفترقوا وبكده بيقدر الكيان المرعب إنه ينفرد بكل واحد فيهم لوحده " مايك كان عنده حق؛

كُنّا طالعين على السلم خايفين وبنترعش، بمجرد وصولنا للدور الثالث بدأنا نفتشه ببطء وخوف، لكن لحسن حظنا ملقيناش أي حاجة، وقفنا أدام سلم الدور الرابع، آخر دور في المخزن، كُنّا بنترعش وإحنا طالعين على السلم بخوف، أول ما وصلنا للدور الرابع سمعنا صوت خطوات أقدام بتجري ولمحنا باب من الأبواب بيتقفل بعنف، الدم نشف في عروقنا، جسمي كان بيترعش من الخوف، مشينا ببطء لحد الباب اللي إتقفل، إيدي كانت بتترعش بقوة وأنا بفتح الباب، قبل ما أفتح الباب سمعنا ضحكة شريرة جمدت الدم في عروقي، استجمعت شجاعتي وقررت أفتح الباب، كانت أوضة فاضية تمامًا لكن في نُص الأوضة في سلم حديد طالع لفتحة في السقف

طبعًا، هيخففوا على السطح مكان ما انتحروا، بصينا لبعض بخوف، كان لازم حد ياخذ القرار ويطلع هو للسطح، بعد نقاش قصير قررنا إن فرانك هو اللي هيطلع الأول، أنا وراه ومايك في النهاية، أول ما طلعتنا السقف سمعت صوت فرانك بيقول بخوف: " هناك ! "

بصيت للمكان اللي بيشاور عليه، في ركن السطح وعلى السور كان واقف تمثال رابع، قتلهم بغضب: " يلا نزلها وندور على التمثال الأخير "

دورنا في كل مكان في المخزن، فتشنا كل مكان، مفيش أي أثر للتمثال الخامس، الشمس بدأت تطلع والسما بدأت تنور، قررنا نسيب الموضوع يعدي وتمينا لو إن محدش اكتشف اختفاء تمثال عشان متعرضش لمسائلة قانونية .

كل يوم في تمام الساعة 3:33 بعد نص الليل بسمع صوت خطوات بتجري جوا المخزن أو بسمع صوت ضحكة شريرة، وكل يوم أحس بنفس دافئ ورايا بهمس ليّا بصوت كله شر: "تعالى ودور عليّا... أحسنلك".

\* \* \*

( 19 )

## حديقة السيئين

في حاجات في العالم بتفضل ثابتة مهما حصل، مهما مر عليها زمن مش  
بتتغير...

حاجات زي الحروب... الفلوس... الجشع :

كُل جيل على الأرض شاف كراهية وموت غير مُبررين، كُل جيل على الأرض  
شاف مآسي، وبرغم كده الحاجات دي إحنا شايفينها أو على الأقل... فاهمينها !  
لكن فيه حاجة تانية أنا عارف ومُتأكد إنها حقيقية، حاجة فضلت ثابتة  
رغم تغيّر الزمان والمكان، لكن العالم تغافل عنها !  
بيت مدام بيكرالي في نهاية الشارع !..

عارف إن اللي أنا بقوله ده مُمكن يكون غريب جدًا بس إديني دقيقة أشرح  
لك الموضوع .

مدام بيكر أو السيدة بيكر مكانتش زيه زي أي ست عجوزة في الشارع بتاعنا، في الحقيقة إحنا مكناش بنُبص لها على إنها امرأة أصلاً، هي كانت أقرب للتاريخ، شخص موجود في الشارع من قبل أهلك ما يتولدوا، وغالبًا هتستمر في الشارع بعد ما نموت، السيدة بيكر كان عندها بيت قديم في نهاية الشارع، البيت قديم ومكسّر والطلاء بتاعه مقشرو وواقع:

الأطفال اللي من سني كانوا بيطلعوا عليها إشاعات إنها خالدة ومش بتموت، السيدة بيكر متولدتش... السيدة بيكر مش هتموت... السيدة بيكر موجودة وبس .

بس المنطق بيقول عكس كده، عشان كده الحقيقة كانت إن السيدة بيكر انتقلت من فرنسا عشان تعيش في الولايات المتحدة وخصوصًا في الشارع بتاعنا، اسمها كان كاميل بيكر، بس محدش نهائياً يجرؤ ينده لها باسم كاميل، جوزها أمريكي، جابها أمريكا وإتجوزها بعد قصة حُب ساخنة دارت أحداثها في باريس، وفي النهاية مات وسابها... وحيدة... بدون أصدقاء... بدون أطفال ؛

لوحدها تمامًا في بيتها القديم !

السيدة بيكر مش مؤذية، على العكس تمامًا هي لطيفة وودودة، هوايتها المفضلة كانت إنها تقعد على كرسيها الهزاز أدام بيتها وتتشغل في تطريز المناديل اليدوية اللي هي مشهورة بيها، عندها قطة عجوزة زيه وكسولة، دايمًا بتنام بكسل تحت رجليها، الحاجة الوحيدة المميزة في السيدة بيكر هي إن ملامحها مش بتتغير مع مرور الزمن .

بس مش ده السبب اللي مخليني أكلمكم عن السيدة بيكر دلوقت ....

السيدة بيكر مكانتش ودودة مع أطفال الحي، الإشاعات بتقول إنها مش بتحب الأطفال، هيّ وماما كانت علاقتهم كويسة ببعض، عشان كده لما كُنت بروح مع ماما عند السيدة بيكر كُنت بتكلم معاها، كانت لطيفة معايا، دايماً بتديني كوكيز وشوكولاتة، كانت كمان بتسمح ليّا ألعب مع ( فلاني ) القُط العجوز بتاعها، مكانتش بتكلم معايا كتير، يمكن عشان هيّ مش بتحب الأطفال زي ما بيقولوا عليها.

الإشاعة دي إتنتف تمامًا في صباح أبريلي غائم ...

كُنا في أجازة من المدرسة وأنا كُنت متعود أيام الأجازات اصحى بدري جدّا عشان أتمتع بأكبر قدر مُمكن من الوقت، كأني طفل مُزعج كُنت بجنن ماما لدرجة إنها كانت بتسمح ليّا ألعب برا البيت حتى لو الوقت بدري جدّا :  
كُنت بلعب أدام بيتنا لما لاحظت إن السيدة بيكر واقفة أدام بيتها وبتتفرج عليّا !

بيتها كان على بُعد 4 بيوت من بيتنا، من المسافة دي مش قادر أحدد لو كانت مركزة معايا فعلاً ولا مُجرد باصّة ناحيتي، بس أنا حاسس إنها باصّة عليّا وبتراقبني، كُنت حاسس إنها بتنده عليّا بدون صوت، ويبدو إنها نجحت لأن فضولي خلاني أمشي ناحيتها ببطء،

و عشان تشجعي رفعت إيدها وشاورت ليّا إني أقرب، كُنت صُغيرٍ وغبي على إني أكون حذر أكثر من كده، وبرضه أنا متربي في الشارع ده وعارفها من

صُغري وهي كمان صاحبة ماما، وبصراحة كُنت عاوز واحدة من الكوكيز اللذيذة بتاعتها:

وقفت على بُعد خطوات منها وسلمت عليها بصوت واطي خجول، ابتسمت ابتسامة صُغيرة وهي بتنحي عشان تقدر تبص في عينيًا، بصوت واطي سألتني: "دومينيك... إنت ولد كويس... صح؟؟"

كانت متوقعة مني إني أجاب، جاوبت بهدوء وبحرص عشان متضايقش مني: "أعتقد"

شُفت نظرة ارتياح بتبان في عينيها وهي بتسألني: "تحب تشوف حاجة سرية؟"

كُنت مُتحمس جدًا، سر... أنا بعشق الأسرار، أنا نفسي أكون جاسوس لما أكبر أصلًا، عشان كده أنا مُدرك إن الأسرار حاجة مُهمة جدًا، هزيت راسي بالموافقة، ابتسمت ومسكت إيدي، مسكت إيدها بتردد وهي أخذاني وماشية ناحية بيتها!

دخلنا البيت ولما عدينا غرفة المعيشة بدأت أقلق، دايمًا كانت بتديني الكوكيز هنا، أنا كان عندي أمل كبير يكون السر مُرتبط بالكوكيز، دخلنا أوضة السُفرة وبرضه عديناها بدون ما نُقف، دخلنا المطبخ، وفي مؤخرة أوضة المطبخ فتحت باب سري في الحيطه، كان زي باب القبو، ورا الباب فيه سلم نازل لتحت، في الظلام!

فتحت النور وبرغم الإضاءة كان الظلام مسيطر على المكان، مسكت إيدي بقوة وبدأنا ننزل السلم:

مع كل خطوة بنزلها لتحت كُنت بتأكد إنني سامع أصوات خافتة من تحت،  
كأن فيه حيوانات تحت مش قادرة تحافظ على هدونها .

أول حاجة خطرت على بالي إن القُط فلافي مُحاصر تحت في القبو وهي  
محتاجة مُساعدتي عشان ننقذه، لما نزلنا القبو مشفتش فلافي نهائياً:

القبو كان مليان أقفاص، أقفاص حديد مصدّية، المكان مُظلم تماماً لكن  
قادر أشوف حيوانات في الأقفاص، كانوا بيتحركوا ببطء وبخوف :

سألته بصوت مليان خوف: " إيه ده؟ "

قالتلي بصوت واطي: " دي حديقة حيوان "

فجأة نسيت خوفي كله وبقيت مُتحمس جداً، أنا بحب حديقة الحيوان  
وبحب الحيوانات، ماما كانت متعودة توديني حديقة الحيوان أنا وأخويا  
الصُغَيْر، دلوقت بس عرفت ليه الموضوع لازم يفضل سر....

فكرة وجود حديقة حيوانات سرية في القبو بتاع البيت كانت فكرة عبقرية،  
بس برضه مش هتقدر تدخل البيت حيوانات ضخمة وإلا سرها هيتكشف،  
حسيت بخيبة أمل، أنا بحب الزرافة، كُنت مُتحمس جداً إنني أشوف حديقة  
الحيوانات السرية بتاعتها .

هيّ كمان كانت حاسّة إنني مُتحمس جداً، سابت إيدي وابتسمت وهي  
بتقولي: " انطلق "

مكُنْتش محتاج دعوة تانية :

جريت بسرعة ناحية أقرب قفص ليًا، النور كان خافت، قربت وشي من  
القُضبان أوي عشان أقدر أشوف إيه اللي جوا القفص ...

قلي وقف تمامًا لما عرفت إيه اللي كان جوا القفص !!!!

بنت صُغَيِّرة، أصغر مني بكام سنة قُليلين، سنها ميزيدش عن 5 سنوات،  
كانت قاعدة على إيديها وركبها زي الحيوانات، كُنت بسأل نفسي ليه مش  
بتصرخ أوبتسندج، رفعت راسها عشان تبص عليًا وساعتها فهمت

فمها كان متخيِّط ببعضه بخيِّط لونه أسود

شهقت برعب ورجعت لورا كذا خطوة عشان ألاقِي نفسي بين إيديين  
السيدة بيكر؛

عرفت إن فيه حاجة غلط، بس للأسف عرفت ده بعد فوات الأوان،  
حاولت أتماسك وأداري خوفاً لكن فشلت فشل ذريع، سألتها بصوت مُرتعش  
مليان خوف: "هي بتعمل إيه هنا؟"

قالتلي مهدوء: "كانت بنت سيئة!"

رددت وراها بذهول: "سيئة!!"

السيدة بيكر مسكت إيدي بقوة وهي بتقول بفخر: "دي حديقة حيوان  
السيئين"

أمرتني بلهجة شديدة إنني أكمل مُشاهدة، مشيت وجسمي كُله بيترعش  
للقفص اللي بعد كده، كان ولد صُغَيِّر، زي ما يكون داخِش أو مش مُتزن، ببندل  
جُهد كبير عشان يسيطر على نفسه، حاولت أفهم ماله بس لما ركزت معاه شوية

فهمت، إيديه مقطوعة تمامًا من عند الكتف ويبدو إنها مقطوعة قُرْبَ لأن القفص فيه دم والولد باين عليه الألم ؛

بصيت للسيدة بيكر وعينيًا مدمعة من الخوف، كُنت عاوز أرجع البيت، نظرة عينها القاسية خلّتي بصيت أدامي وطردت الفكرة دي من دماغي، السيدة بيكر مش هتخليني أمشي من هنا، مش همشي من هنا إلا ما أشوف الأقفاص كلها .

12 قفص، مش قادر أفكر بالتفصيل إيه اللي كان جواهم، عقلي طرد الذكري دي تمامًا من قسوة الحاجات اللي شُفّتها، بس فاكر إن كلهم أطفال بأعمار مختلفة ،

خافين... مرضي... ضُعايف... مشوهين

شُفت أصابع مقطوعة... عيون مخلوعة... أسنان مكسورة... أجساد مشوهة

مش فاكر أي حاجة غير كده، أول حاجة فاكرها بعد كده هوّاني قاعد مع السيدة بيكر في غرفة المعيشة، مش فاكراني طلعت السلم بتاع القبو، كانت قاعدة على كُرسيا الهزاز وأنا قاعد أدامها باكل كوكيز سُخنة وحاسس بالذهول والدهشة والصدمة .

سألّتي بصوت واضح: " عارف أنا ليه عندي حديقة حيوان للناس السيئين يا دومينيك؟ "

هزيت راسي وأنا حاسس بالخوف ؛

صوتها كان قوي وبابن عليها الاقتناع وهي بتقول: " الناس السيئين لا يستحقوا إنهم يعيشوا معنا في العالم ده... لازم حد يحبسهم عشان تأمين باقي الناس... فاهم قصدي؟ "

هزيت راسي بالموافقة، مكنتش مُقتنع بس مكانش بإيدي حاجة تانية أقدر أعملها؛

و يبدو إني كُنت كويس وإتصرفت صح لأن بمجرد ما خلصت الكوكبز أخذتني من إيدي لحد باب البيت بتاعها.

مكنتش مصدق إني بشوف الشمس والعُشب مرة تانية، مكنتش مصدق إنها هتسيبي، قلبي كان بيدق بسرعة، قبل ما أمشي مسكت كتفي ولمأ بصيت لها قالتلي بلهجة تحذيرية: "الأولاد الجيدين مبيكشفوش الأسرار يا دومينيك... إنت ولد جيد... صح؟ "

هزيت راسي... سابتنِي وهي مُبتسمة... جريت وأنا مرعوب لحد ما وصلت البيت.

محكيثش لأي حد أنا شففت إيه جوا بيت السيدة بيكر.

دلوقت أنا كبير، بسأل نفسي ليه مقولتَش لأمي وقتها؟، بس كطفل مكانش عندي القدرة إني أوصف الفظائع اللي شُفتها في بيت السيدة بيكر، ساعات كتير بقول إن أكيد أنا بيتهَيألي وإن السيدة بيكر العجوزة الطيبة مُستحيل تعمل كده؛

بس الحقيقة أنا عارفها كويس، أنا محكيتش لحد عشان أكون ولد جيد  
والسيدة بيكرمتدخلنيش حديقة الحيوان بتاعتها؛  
كنت خايف من حديقة الحيوان.

والدتي كلمتني إمبراح عشان تقولي بصوت حزين: " السيدة بيكرماتت  
إمبراح "

سكتت ومقدرتش أرد، ماما قالتلي وصوتها باين فيه المفاجأة: " مكنتش  
أعرف إن علاقتك جيدة بالسيدة بيكريا دومينيك؟ "  
سألته بدهشة: " تقصدي إيه؟ "

قالتلي: " السيدة بيكركتبت ليك كل أملاكها بعد وفاتها، عندك فكرة هي  
عملت كده ليه؟ "

مكنتش عارف ليه عملت كده ...

ولحد دلوقت مش عارف ليه اختارتي عشان تكشف ليًا سرها ؟، مش  
عارف ليه سابت ليًا أملاكها ؟، والأسوأ من ده كله... مش عارف مصير الأطفال  
اللي كانوا في الأقفاص إيه ؟

\* \* \*

( 20 )

## كارول... كارول في كل مكان

كُنْتُ قاعِدة أدام مطعم مسْتَنِية أَكلي لَمَّا لَمحت بنت شِبه كارول بالظبط، كانت لابسة جيبية قُصيرة وده كان غريب لأننا كُنَّا في شهريناير والجو كان برد، كانت ماشية بشكل طبيعي بينما أنا كُنْتُ بتعرش من البرد، برغم البرد كُنْتُ واقفة برا المطعم مسْتَنِية دوري عشان برا محدش بيُبص عليا، بس جوا بحس إن كل الناس بتبص عليا وبتراقبني، وأنا بفضل البرد على عيون الناس .

أنا آسفة ساعات كتير بنسى أنا بتكلم في إيه، هحاول أركز شوية...

على أي حال البننت دي كانت شبه كارول بالظبط، شعرها البني وعينها الخضرا، عيون كارول كانت زرقا بس هي هي نفس العيون، أنا بعرف وبفهم في العيون كويس، أنا كُنْتُ بفكر في كارول طول اليوم، الكاشير بتاع المطعم رجعي دولار متطبق على شكل قلب، سألته لو كان يعرف كارول، لأن القلب الورقي ده من الحاجات اللي كارول بتعرف تعملها، وكارول كانت اجتماعية ولها علاقة

كوبسة بكلّ الناس في كلّ مكان، الكاشير بصلي بطريقة غريبة لما سألته، أكيد كارول قالت له حاجة عني.

كنت ببص لشبيهة كارول دي لما سمعت تليفوني بيرن، كانت والدة كارول، كانت بتعيط طول المكالمة وأنا بكره صوت العياط، سألتني لو كنت هروح لها النهاردة ولا لأ، افكرت إن ده السبب الرئيسي اللي أنا كنت رايحة المطعم عشانه، عشان الزيارة هتكون طويلة وممكن أجوع هناك فكان لازم أكل حاجة قبل ما أروح؛

أخذت شنطتي ومشيت ناحية الكنيسة اللي فيها الجنازة.

مشيت ناحيتها، التابوت كان مقفول، كان تصرف صحيح منهم لأن الطعنات شوهدت وشها تمامًا، ومش هيبقى شيء لطيف لو الناس شافتها بالمنظرده :

سلمت على والدة كارول، بصتلي باستغراب كأنها متعرفنيش، بصتلي بصة غريبة أوي، لو الظروف كانت مختلفة كان هيبقى ليّا رد فعل مختلف معاها، الموت بيخلي تصرفات الناس غريبة، غريبة لدرجة إنها ممكن تنسى أقرب صديقة لبنتها، على أي حال هيّ مش ناسياني، هيّ اتصلت بيّا من حوالى نص ساعة، يعني هيّ فاكراني كويس، هحاول أتكلم معاها بعدين، لما الأمور تستقر شوية، بس بالطريقة دي متوقعة إنها ممكن تنكر اتصالها بيّا بكلّ سهولة.

بصيت على الصور اللي محطوطة حوالين النعش وبدأت أفكر ذكريات صداقتي مع كارول، افكرت أول مرة إتقابلنا في المكتب اللي كُنّا بنشتغل فيه

سوا، كُنّا بنوصل الشُّغل بدري ونقضي وقتنا كُلّه مع بعض، رُحنا بارات سوا، أكلنا في مطاعم مع بعض، شفنا أفلام سوا، كارول مكانتش ألطف شخص في الدنيا، بس كُنّت بحبها وهيّ كانت بتحبني، وبسرعة جدًّا بقينا أصحاب ومش بنفترق أبدًا.

فضلت في الكنيسة لحد ما قفلوا الأبواب، الجنازة بُكرة الصُّبح .

أنا عارفة مين اللي قتل كارول .

لوهيّ كانت عايشة كانت هتعرف مين اللي قتلها، الموضوع بسيط وواضح جدًّا، على أيّ حال هيّ دلوقت برضه أكيد عارفة مين اللي قتلها، هيّ كانت موجودة ساعة ما ماتت وشافته، بس هيّ ماتت للأسف ومتقدرش تقولنا مين اللي قتلها، أنا أسفة... أنا بقول كلام مش مفهوم ومش منطقي ،

بس الموت تجربة صعبة عليّا، الأمور صعبة عليّا دلوقت أكثر من أيّ وقت؛

مش عارفة إزاي هيّ فاتها كلّ الأدلة ؛

لوكانت شافت الأدلة والعلامات كان زمانها موجودة هنا معاها؛

بابا هوّ اللي قتل كارول.

بابا بيكره كارول من أول مرة إتقابلنا فيها، لما كان عندها 6 سنين، كان دايماً بيتضايق لما بتيجي تلعب معايا في البيت، كان دايماً بيقول عليها وقحة وكذابة .

لا... لا... مش كارول، اللي كده كانت تامي، بابا مكانش بيحب تامي، أنا أسفة ساعات بتلخبط والأمور بتختلط عندي، بس أنا هفهمكم إتلخبطت بينهم ليه، تامي وكارول كانوا شبه بعض، أو مُمْمكن يكونوا نفس الشخص ! على العموم هو أكيد قتل كارول عشان كده، قتل كارول عشان هي شبه تامي.

أنا مشفتش بابا من 14 سنة، آخر مرة تواصلت معاه كان عندي 18 سنة، مش عارفة إيه اللي حصل بعد كده، بس من الواضح إنه تتبعني وعرف كارول وقتلها، عاوزه أكتشفه وألقيه، عاوزه أسأله ليه عمل كده ؟، ليه بوظ ليا أكثر حاجة حبيتها في حياتي، دورت في كل مكان في البيت على بابا، أنا عارفة إنه كان مستخي، ندهت عليه عشان يرد عليا وأكشف مكانه بس ملقيتش أي نتيجة.

أنا عارفة إنتم بتفكروا في إيه ؟، أنا ليه مبلغتش الشرطة، عشان ببساطة مش هيصدقوني، محدش هيصدقني، الوحيدة اللي كانت هتصدقني هي كارول، هُما كانوا بيختاروا يعملوا نفسهم مش شايفين.

الجنازة كانت مُخرجة، الجنازات عادةً بتبقى مُخرجة...

والدة كارول مش بس كانت بتتظاهر إنها مش عارفاني، لا... الموضوع تطوّر للأسوأ وبدأت تبصلي بغضب، كانت بتتجنب تتكلم معايا، الناس كانوا

بيصبولي نظرات غريبة، أكيد نشرت عني إشاعة شريرة، أكيد بتلومني على موت كارول، دا شائع بشكل ما، لما حد ييموت بطريقة مش متوقعة الناس بتدور على حد ترمي عليه اللوم، يمكن هي كمان عارفة عن بابا !!، عارفة إن هو اللي قتل كارول، عشان كده هي زعلانة مني !، كده الموضوع ممكن يبقى منطقي شوية ...

بابا إنسان شريروسبق إنه دخل السجن عشان قتل ماما، قتل ماما بنفس الطريقة اللي قتل بيها كارول، طعنها بالسكينة، عشان كده أنا متأكدة إن هو اللي قتل كارول، الموضوع مش ممكن يكون مُصادفة، مش كده ؟؟

حاولت أتكلم مع والدتها عن الموضوع ده، طبعًا مش أثناء الجنازة، أنا مش مجنونة، كلمتها عن الموضوع أثناء ما كانوا بينزلوا النعش تحت الأرض، قلت لها إني متضايقه زي ما هي متضايقه بالظبط، قلت لها إني هبلغ الشرطة إن بابا هو اللي قتلها، كُنت عاوزاها ترتاح وتشعر بشعور أفضل، برغم إني عارفة إنهم مش هيصدقوني، بس لو هي صدقتني الموضوع هيتغير للأحسن وموقفي هيبقى اقوى.

رد فعلها كان غريب جدًا، وشها احمر جدًا كأن الدم اللي في جسمها كله تجمّع في وشها، بدأت تصرخ في وشي، قالتلي كلام كتير رهيب وسيء، وقبل ما أفهم إيه اللي حصل، مجموعة من أهل كارول أجبروني إني أغادر المقابر، دا أذاني نفسيًا، مين إداها الحق تعاملني كده، قدرت أفهم ساعتها كارول كان خُلقها سيء ليه !؟

رُحِت البيت وطول الطريق وأنا مروحة كُنت بفكر في ماما، لازم أتصل بيها.

لا... لا... دا مش صح، أنا أسفة، أنا ساعات بنسى حاجات مُهمة، الموضوع  
مأثر فيًا جدًا

الشُرطة جاتلي البيت تاني يوم على طول.

دي كانت حاجة غير متوقعة، المفروض أنا اللي أبلغ الشُرطة مش العكس،  
بعد الطريقة اللي والدة كارول عاملتي بيها وصرخت عليًا بيها .... والدة كارول  
كذّابة، عظيم جدًا، كده الفرصة جت لغاية عندي عشان أبلغ الشُرطة عن  
والدي وأقولهم إنه قتل ماما، الموضوع كان مُحير لهم عشان يعرفوا العلاقة  
بين كارول وماما، في النهاية شرحت لهم كُل حاجة، حتى قُلتهم إنه قتلها بنفس  
السكينة اللي قتل بيها ماما، إزاي مش قادرين يكتشفوا ده ؟

طبعًا أول سؤال سألوه ليًا إزاي عرفت نوع السكينة اللي ماما ماتت بيها ؟،  
حاولت أفكر أنا أعرف المعلومة دي منين لكن مقدرتش أفكر نهائيًا، طلبوا  
مني أروح معاهم قسم الشُرطة، يمكن عاوزني أوصف بابا للرسام بتاع  
الشُرطة ؟، يمكن بابا عندهم وعاوزني أتعرف عليه؟

بس لما رُحِت معاهم بدأوا يحاصروني بالأسئلة، كارول كانت بتحب إيه ؟،  
قضينا وقت كتير مع بعض ؟، إيه لونها المفضل ؟، إيه أكلتها المفضلة ؟، إيه

فيلمها المفضل؟، الموضوع استمر، اللي بيحصل ده مش منطقي، إزاي عاوزين مني أعرف المعلومات دي كلها؟، بس إحنا كُنا أقرب أصحاب لبعض، فمنطقي جدًا إني أعرف الإجابات دي كلها، بس إحنا علاقتنا كانت علاقة مُميزة، بالنهار كارول كانت بتتظاهر إنها متعرفنيش، أو حتى بتتظاهر كأنها مش بتحبني، بس دا مكانش صح، أنا كُنت بسمعها وهي بتتكلم معايا طول الليل، كانت بتتسلل لشقتي أثناء الليل وتفضل تهمس في ودني طول الليل، عُمرِي ما قدرت أشوفها، كانت بتختبئ في أماكن مش عارفها، ساعات كانت بتهمس ليّيا لما كُنا بنبيقي سوا برا، زمايلنا في الشغل مقدروش يلاحظوا ده نهائيًا، كانوا فاكرين إننا مش بنشوف ولا بنقابل بعض، بس أنا عارفة إن ده مش صح :

قالولي إنهم لقوا سلاح الجريمة، كُنت سعيدة بده، أخيرًا قاتل كارول هيقابل العدالة ويواجه اللي يستحقه.

قالولي إنهم لقوها في بيتي أنا، في فتحة التصريف بتاعة المطبخ، كان معاها صابعين خاصين بكارول القاتل قطعهم قبل ما يموتها.

أكيد حد لفق اللي بيحصل ده، أنا مُستحيل أقدر أوّذي كارول، صحيح هيّ ساعات بتكون عاهرة وبتقولي لا على حاجات كثير، ساعات كانت بتجبرني أعمل حاجات مش بحبها، ساعات كثير كُنت بتمني لو أقدر أدبجها وأشوفها وهي بتنزف أدامي لحد ما تموت، ساعات ببقى عاوزة أخنقها زي ماما .

بس عمومًا أنا مقدرش أقتلها، دي كانت صديقتي المُفضلة.

احتجزوني هنا، كانوا بيكلموني عن المحاكمة والأدلة والتحقيقات، يقولوا إنهم لقوا دليل قوي، أنا مش فاهمة حاجة، إيه اللي بيحصل؟

يقولوا بابا عايش في ولاية كاليفورنيا، مدخلش السجن قبل كده أبدًا، ومش عاوز يتدخل في أي حاجة لها علاقة بيّا، قالولي كمان إنهم ملقوش قاتل ماما لحد دلوقت، بس مفيش أي دليل أبدًا إن بابا هوّ اللي عمل كده، سألوني عن سنوات طفولتي، تحديدًا عن تامي اللي اختفت فجأة بدون أي أثر، كانوا عاوزين يعرفوا مكانها، أنا هعرف إزاي؟

يقولوا إن كلّ الناس بيقولوا إن علاقتي بكارول كانت سطحية جدًا، كُنّا بنتقابل بس في الشغل وللحظات قليلة جدًا، قالولي إني مقدرش أغانر المدينة دلوقت لأنني متورطة في تحقيق وقضية، المحاكمة خلال أسابيع ولازم أحضرها وإلا العواقب هتكون وخيمة على حد تعبيرهم .

هُمَا كذايين، كُلُّهُم كذايين... كُلُّهُم!

بابا في السجن، بابا قاتل، هوّ اللي قتل ماما، ماما كانت ضحيته المسكينة، أنا معرفش تامي حصل لها إيه، أنا وكارول أصدقاء، أعز أصدقاء.

أنا مقتلتش كارول...

إزاي المُغفلين دول مش قادرين يفهموا ده، هُما فاكرين إني هكذب في حاجة زي دي ؟، إزاي يقولوا كده عني ؟، أنا عُمري ما هقتلها أبدًا، أنا فاكرة إنها كانت مربوطة وأنا كُنْتُ بقطع صابعها بالسكينة قبل ما أقت....

أوبس... !

أنا أسفة ..... !!

الموضوع كله ..... !!!

طيب إنتم أكيد فاهمين ..... !!!!

الموضوع صعب عليًا ....

ملحوظة: هي مريضة نفسيًا وهي اللي قتت كارول عشان رفضت تصاحبها

وتبقي صديقتها، كذلك هي اللي قتلت تامي وأمها

\* \* \*

(21)

## الأضواء

مالكة البيت اللي قبلي كان عندها خوف رهيب من الظلام، كانت بتقول إن فيه شيء شرير بيعيش في الظلام جوا البيت، جلوريا أكيد عرفت إنني من الناس المؤمنين بالخوارق والمُهتمين بيها فقررت إنها تحبك الكذبة دي عشان تعلي سعر البيت شوية، السمسار قالي إن سعر البيت مُمتاز والمقاول قال إنه مش محتاج أي تجديدات أو إصلاحات تقريبًا، مضيت العقود وتجاهلت كلامها تمامًا؛

حاجة من الحاجات الغريبة اللي في البيت كانت مفاتيح الكهرباء، عادةً مفتاح الكهرباء الخاص بكل أوضة بيكون جواها لكن في البيت ده كان الموضوع على العكس تمامًا، مفتاح الكهرباء الخاص بكل أوضة كان برا الأوضة، أنا فاكر جلوريا وهي بتفرجني على البيت كانت بتفتح نور الأوضة من برا وتنتظر ثواني وبعدين تفتح باب الأوضة وتسمح لنا ندخل، الموضوع كان بسيط ومش مؤثر وخلال شهر تقريبًا كُنت تعودت على إن مفاتيح الكهرباء كلها برا الأوض، وخلال الشهر الأول تقريبًا محصلش أي حاجة غريبة نهائيًا.

في ليلة قُمت من النوم عشان ادخل الحمام، بقالي هنا شهر فكُنت حفظت تفاصيل وخريطة البيت خلاص، مشيت في الظلام من غير ما أفتح أي نور، أثناء ما كُنت في الحمام سمعت من ورايا صوت " بسست " واضحة جدًا، جسسي كُلّه إترعش ولفيت ورايا بسُرعة عشان أشوف مصدر الصوت، خرجت فتحت النور من برا الحمام ومكانش فيه أي حاجة، مُمكن صوت من مواسير السباكة أو فتحات التصريف !

مرة تانية بعدها بأسبوع كُنت في الجراج وحييت أدخل الحمام فدخلت حمام الجراج، سمعت صوت باب الحمام بيتقفل عليًا بهدوء لوحده، المكان كان مُظلم تمامًا، بدأت أشم ريحة كريهة جدًا، ريحة زي ما تكون خليط بين العرق والعطن والقيء، فتحت الباب وبدأ الحمام ينور مرة تانية، فورًا الريحة اختفت لكن الحيرة والتساؤل فضلوا معايا أثناء اليوم، أكيد فيه حيوان ميت برا البيت هضطر أدور عليه وأبعده عن البيت بكرة .

بعدها بأسبوع كان الجو عاصف ومُمطر، البيت كان قديم والكهرباء بتاعته قديمة، لوحة التحكم الرئيسية توقفت عن العمل وسابتني لوحدي في البيت وسط الظلام، حسيت كأن في حاجة حيّة معايا في البيت، جسسي كان بيترعش وأنا حاسس بتواجد تقيل وكثيب بيسيطر على الأجواء كُلها في الظلام، لكن قلبي وقف لما سمعت صوت ولد وبنيت صُغيرين بيضحكوا ضحكة شريرة من ركن الأوضة، جريت بعيد عنهم، حسيت كأن حد بيجاول يمسك رجلي في الظلام عشان ما أبعده عنهم، جريت برُعب ناحية لوحة التحكم الرئيسية، كُنت شامم الريحة الكريهة وهي بتنتشر في البيت كُلّه، الظلام كان دامس، بدأت أمشي بإيدي على الحيطان وأنا بجاول أتلمس طريقي لهنالك، حسيت بقشعريرة بتجري في جسسي كُلّه وخوف رهيب بيسيطر عليًا، بدأت أسرع

خطواتي لحد ما وصلت لباب القبو، فتحت الباب وبدأت أتمس خطواتي في الظلام للسلم، نزلت القبو... أكثر مكان مُظلم في البيت كله !

السلم الخشبية القديمة كانت بتتن تحت رجلي وأنا نازل السلم ببطء وسط الظلام، أنا مشفتش مكان لوحة التحكم الرئيسية الخاصة بالبيت غير مرة واحدة بس ومكنتش مُهتم بيها بصراحة. مكنتش عارف إني هحتاجها في يوم من الأيام ، كُنت بتلمس حيلة القبو بإيدي وأنا بدور بفرع، سمعت صوت عميق وفيه شروح قد يقول بيغضب: " ناحية... الشمال "

حركت إيدي ناحية الشمال وأنا بتترعش من الخوف لحد ما لمست اللوحة :

سألت بصوت مليان خوف وبيترعش: " إنت مين؟؟... إنت فين؟؟ "

لكن مكانش فيه أي رد، بس الحضور المُقبض الكئيب بيسيطر على المكان أكثر والريحة الكريمة بتنتشر زيادة !

كُنت برفع المفاتيح بهيستيريا زي المجنون بس مفيش حاجة بتحصل، سمعت الصوت بيمس ليّا بشر في ودني الشمال: " المُفتاح... الرئيسي... تحت... شوية "

نزلت للمُفتاح الرئيسي وفتحته بإيد بتترعش من الخوف، النور رجع والمكان كله نور تاني، ولقيت نفسي واقف لوحدي في القبو، القبو كان فارغ تمامًا؛

شعر جسسي كله واقف من الخوف، فيه حاجة شريرة عايشة معايا جوا البيت، فتشت البيت كله وقلبي بيدق برُعب، فتشت الدواليب والخزانات وكل مكان مُمكن حد يختبي فيه، مفيش أي حاجة غريبة، كل حاجة طبيعية وتمام.

برغم كده مش قادر أعيش في البيت، قررت أبدأ من ثاني يوم فورًا أدور على مُشتري للبيت، حاولت أتواصل مع جلوريا، تليفونها خارج نطاق الخدمة ومش بترد على أي إيميلات، لقيت مُشتري للبيت خصوصًا مع السعر الرخيص اللي كُنت طالبه، نقلت حاجتي كلها وهسلمه البيت بُكرة وأنتقل من هنا تمامًا.

قررت بالليل أدخل آخد شاور أخير قبل ما أسيب البيت بُكرة، فجأة وأثناء الشاور نور البيت كله إتقطع، بدأت أحس بالخوف، بصيت من شباك الحمام، على كل البيوت اللي حواليا ولقيت إن بيتي هو البيت الوحيد اللي النور مقطوع فيه؛

سمعت باب الحمام بيتفتح ببطء والريحة الكريهة بتنتشر في الحمام،

في شيء شيرقفل الكهرباء من اللوحة الرئيسية للبيت،

في شيء شيرير معايا في الحمام دلوقت ،

لوحدنا .....

\* \* \*

(22)

## تفسير غير مرضي

قبل وفاة زوجي، تم تشخيص بنتنا فيرونيكا بانفصام الشخصية أثناء الطفولة، رُحنا بيها لعدد كبير جداً من الأطباء والمتخصصين، كلهم تقريباً توصلوا لنفس النتيجة، إن الحالة دي نادرة جداً، حياتنا تدمرت تماماً، بعض الأطباء اقترحوا علينا منبدأش بمرحلة العلاج على طول عشان صِغَر سنّها، كانوا خايفين إن المواد الكيميائية تأخر من نموها العقلي؛

في سن الخمس سنوات، بتكون تنمية العقل من الضرورات اللازمة، قررنا نحافظ على تطورها العقلي ونوقف الأدوية تماماً إلا في بعض حالات الهلوسة الشديدة بيضطروا يوصفوا لها مضادات للدّهان.

بول زوجي كان بيقول إننا لازم نتكلم معاها ونسمعها عشان نقدر نعرف هلاوسها ونتابع مدى تطور الهلاوس من عدمه عشان نقدر نحدد حالتها النفسية قبل ما تبدأ دراستها، مكنتش قادرة أوافق على ده غير بصعوبة، كُنت عاوزاها تبدأ دراستها الأول؛

فيرونيكا ذكية بما فيه الكفاية. قادرة إنها تشق طريقها في الحياة بشكل كافي، لكن بعد شوية انهزت نفسها واضطربت أقتنع بالحقيقة، فيرونيكا محتاجة مُعاملة خاصة ورعاية خاصة، كان لازم نتكلم معاها عشان نقدر نحدد هلاوسها ونفصلها عن خيال الأطفال الطبيعي في السن ده .

بعد شوية قدرنا نحد هلاوسها اللي بتتكرر باستمرار، واحد من الهلاوس دي كان كلب كبير بييجي يلعب معاها أثناء نومها، واحدة تانية من الهلاوس كانت سمكة صُغَيَّرَة بتمشي وراها طول اليوم وبتحب تتفرج معاها على أفلام الكارتون المُفضلة لها، لكن الحاجة الوحيدة اللي كانت مُخيفة بالنسبة لينا كانت الراجل المُظلم اللي من غير عينين ولا مناخير، اللي كان دايماً بيقنعها إنها تهرب من البيت عشان تُخرج وتلعب في الشارع، أكثر من مرة كانت بتفتح الباب وتخرج تجري عشان تلعب مع الراجل المُظلم في نُص الشارع وسط العربيات. الموضوع ده تكرر مرتين..

لما تكرر لتالت مرة بول قرر يقوم من النوم الفجر ويبني سياج حوالين الحديقة الأمامية بتاعتنا، كُنا في الصيف، أنا كُنت بحب فيرونيكا تلعب في البيت ومتخرجش برا عشان تفضل دايماً أدام عينيًا، بس أنا كُنت عارفة ومُدركة إنها محتاجة تُخرج تلعب في الهوا والشمس عشان صحتها ؛

كُل مرة بتخرج تلعب فيها برا بتقف أدام السياج وتعيّط، عشان مش قادرة تتجاوزه وتُخرج برا، فاكرة إن مرة قعدت جنبها أثناء واحدة من نوبات العياط وهي بتعيّط وبتشتكي للسمكة عن إن الراجل المُظلم شتمها وقرر يؤمر الكلب

يبقى قاسي معاها وهوّ بيلعب معاها بالليل، فجأة سكنت وبدأت تصرخ  
بجنون؛

حضنتها وحاولت أسألها إيه اللي حصل لحد ما هدت شوية وقالتلي إن  
السمة اللي بتمشي وراها كانت بتعدي الشارع وعربية خبطتها وماتت، حاولت  
أهديها وأهون عليها الموضوع على أد ما قدرت لكن كل محاولاتني باءت بالفشل.  
أنا وبول خُصنا نقاش طويل ومُرهق استمر لساعات بالليل عن ضرورة إننا  
نعطيها الدواء، بعد سنين طويلة من إننا بنحاول نمنع الدواء :

قررنا نزور الطبيب تاني يوم، وبصبر قعد معنا وسمع كل الملاحظات اللي  
قُلناها، قالنا إن الحالة للأسف بتزداد سوءً، ووصف لها دوا مُعين، طلب مننا  
نراقبها كويس جداً، الدوا مَمَكَن يسبب هلاوس أكثر وطبيعي جداً إن حدة  
الهلاوس تزيد شوية قبل ما تقل وتختفي بالتدريج.

بعد 3 أيام من بداية العلاج بدأت هلاوس فيرونيكا تبقى أسوأ، عُمرِي ما  
شُفتها خايقة بالشكل ده قبل كده، على مدى يومين كانت بتصرخ وتتعيط  
وبتقول إن السمكة بعد وفاتها تحولت لوحش شرير، الوحش دا كان بيخلي  
طعم المية اللي بتشربها مُر جداً، الكلب اللي كان بيلعب معاها بقى بيؤذيها في  
كل مرة يبروح لها فيها، الراجل المُظلم بيخربشها في بطنها بضوافره الطويلة  
بقسوة، لدرجة إنها بدأت تتعور بسببه، رفعت التيشيرت بتاعها عشان توريني  
بطنها اللي كانت فعلاً متخربشة بقوة، بصيت على ضوافرها، وتحت ضوافرها  
فيه حتت من جلدها ودم ناشف، أنا وبول كُنَّا حيرانين ومش عارفين نعمل إيه.

بسبب الضغوط اللي علينا بسبب مرض فيرونيكا بدأت العلاقة بيني وبين  
بول تتوتر، بدأ الاكتئاب يدخل بيننا، ومع ذلك بدأت أهتم ببنتي أكثر من

اهتمامي بزوجي، الدكتور قرر يوقف الدوا عنها شوية عشان يتابع تطور الحالة، بس حتى مع وجود الدوا أو عدم وجوده مكنتش بشوف أي فرق، فيرونيكا خايفة طول الوقت ودايمًا بتخربش نفسها لما بتبقى لوحدها وغالبًا دا بيحصل أثناء نومها.

قررنا أنا وبول ننظم وقتنا بحيث حد فينا يراقبها أثناء نومها وبرغم كده كانت الخرابيش بتزيد ودايمًا بلاقي دم ناشف في هدومها وتحت ضوافرها، هلاوسها بدأت تزيد وتبقى عنيفة، كانت بتشتكي إن السمكة عاوزه تعضها، الكلب بينام فوقها لحد ما نفسها بيتقطع، والراجل المظلم بيخربشها بضوافره الحادة، بدأت أفكر بجدية إن فيرونيكا محتاجة تروح مصحة نفسية عشان تبقى تحت رعاية ناس متخصصين !

بول ضرب نفسه بالنار وانتحر، يومها كُنت أنا وفيرونيكا سوا في المطبخ بنفطر مع بعض، مش هزعجكم بتفاصيل صدمتي في زوجي وإحساسي بالخيانة لأنه تخلى عني، الإحساس بالعجز ومدى ثقل العبء اللي ساهولي كان ضخيم، سابني لوحدي وأواجه الدنيا بعده وأراعي بنتي المريضة .

بعد أسبوعين من وفاته قررت أنظم البيت وأعيد تغيير بعض الحاجات، فيرونيكا كانت معايا بتحاول تساعدني، كُنت اشترت ليها قفازات جديدة عشان تنام بيهم عشان متخربش نفسها وهي كانت فرحانة بيهم وبتلبسهم طول الوقت، ولحد دلوقت القفازات ناجحة جدًا، عشان مرض فيرونيكا مخلها مزاجية جدًا قررت إنني أثناء عملية التنظيف أخفي كل الحاجات الخاصة ببول عشان ده ميؤدش فيرونيكا نفسيًا:

حالة فيرونيكا بدأت تتحسن، بتقول إن الكلب بطل يبجي لها أثناء النوم ويؤذيها وينام فوقها، السمكة رجعت تاني مُضحكة وبقت تلعب معاها وتضحكها، بطلت تتكلم خالص عن الراجل المظلم وجروح بطنها بدأت تتحسن وتبقى أفضل، كُنت سعيدة بالراحة النفسية الل هيّ فيها.

انتهينا من تنظيف البيت كُلّه وفاضل مكان واحد بس هوّ العلية، لما طلعتنا العلية فيرونيكا انطلقت تجري وتستكشف المكان، معايا صندوق فيه مُستلزمات بول عاوزة أشوف مكان أحطه فيه، كانت هيّ بتجري ناحية الشمال وبتلعب، سمعتها بتضحك وبتقول: " دلوقت أنا اللي نايمة فوقك ! "

كانت نايمة على الأرض وتحتها بدلة كلب كبيرة بتاعة بول !

9

ملحوظة: بول استغل مرض بنته وهلاوسها ولبس بدلة الكلب وكان

بيغتصبا بالليل وهيّ نايمة

و لما مات توقف الكلب عن الحضور وبالتالي حالة البنت النفسية والصحية بدأت تتحسن، وبالتالي بدأت تتخلص من المرض بتاعها.

لما البنت شافت بدلة الكلب نامت فوقها وقالت له إن دلوقت أنا اللي نايمة فوقك !

\* \* \*

(23)

## البئر

في ليلة من الليالي كُنت بحكي لبنتي قصة من قصص قبل النوم، القصة كانت من واحد من كُتبتها المفضلة والتي بتتكلّم عن الأشباح، بعد ما خلصنا بصتلي وهي بتسألني: "بس القصة دي مش حقيقية يا بابا... صح؟"

قلت لها: "لا طبعًا يا حبيبتي، لا"

قالتلي: "عشان الحاجات اللي زي الأشباح والأرواح دي حاجات مش حقيقية... صح يا بابا؟؟"

كذبت عليها وأنا بقولها: "لا طبعًا يا حبيبتي، مش حقيقية"

تأكدت إن بناتي الإنتين نايمين في سرايرهم ومرتاحتين، سبت الأوضة وخرجت ومراتي كانت لسه بتحضنهم وبتتمنى لهم ليلة سعيدة:

وقفت في شباك أوضة المعيشة بتأمل في الظلام، جسسي كان بيترعش،  
غريزتي بتقولي إن فيه حاجة سيئة هتحصل. بصيت للظلام وأنا بفتكر كل  
حاجة حصلت يوم عيد ميلادي الخامس عشر...

كُنت بشتغل أمين خزانة في صيدلية كبيرة في وسط المدينة. يدوب كُنت  
لسّه مخلص الوردية بتاعتي، البيت على بعد كيلومترات قُليلة، برغم كده  
بحب أمشي على رجليًا وأنا مروح عشان أقضي وقت مع نفسي ومع أفكارِي.  
الجو كان بدأ يبقى برد شوية، عادةً بحب أمشي في الشارع الرئيسي، بس اليوم  
ده كان الجو برد وأنا مُرهق، قررت آخذ طريق مُختصر من بين المزارع عشان  
أختصر الوقت واتلافي البرد .

بعد عدة دقائق من المشي، وصلت لحائط حجري على حدود مزرعة  
بيرسون، قررت أفز من فوق السور عشان أمر من خلال حقل مهجور واضح  
إن محدش بيهتم بيه بشكل كافي، التراب كان ناشف وبيتكسر تحت رجلي وأنا  
ماشي، ورق الشجر الجاف مالي المنطقة كُلها ومغطي الأرض، في وسط الحقل  
المهجور كُنت شايف البيت القديم الخاص بعائلة بيرسون، وطيت صوتي  
ومشيت مهدوء، معروف إن السيد بيرسون بيطارد أي حد يدخُل الحقل  
المهجور بتاعه بالبندقية.

في الناحية الثانية من الحقل ومُباشرةً قبل الحائط الحجري الآخر،  
لاحظت مجموعة صخور مرصوصين على شكل دايرة على الأرض، لو مكُنْتش  
ماشي ببطء عشان آخذ حذري من السيد بيرسون بنسبة كبيرة جدًا مكُنْتش  
هلاحتها، ولو مكُنْتش لاحظتهم مكُنْتش هحكي لَكُمْ الحكاية دي دلوقت .

كان بئر قديم، واضح إنه محفور من فترة كبيرة، حقول كثير في المنطقة دي بيحفروا آبار عشان المياه، ولما البئر بينشف بيسيبوه مفتوح وجاف ومهجور، البئر ده على عكس كل الآبار مكانش مقفول، على الحائط الحجري فيه غطاء خشبي قديم يبدو إنه خاص بيه، بس التهادرة ولسبب ما مكانش متغطي قربت منه ببطاء، دُست على ورق شجر جاف فاتكسرت تحت رجلي، سمعت صوت ضعيف جاي من البئر، صوت ضعيف مليون خوف كان بيستنجد من جوا البئر: "مرحبًا؟؟"

أنا... أنا مُتأكد إن فيه حد جوا البئر المهجورة دي!

صاحب الصوت إبتدى يعيِّط وهو يقول: "أرجوك، أرجوك ساعدني" الصوت ضعيف زي صوت الأطفال، أول شخص جه في دماغي هو روبي بيرسون، ابن عائلة بيرسون، الطفل الصُّغَيْر، ابن العائلة اللي بتمتلك الحقل والبئر، أعتقد سنه 8 أو 9 سنين، روبي وقع في البئر؟!

جريت ناحية حافة البئر، مسكت في الصخور وأنا بميل بجسمي جوا البئر، توقعت إني أشوف روبي واقع تحت في البئر وبيبصلي، بس البئر كان أعمق مما تخيلت، البئر كان عميق ومُظلم أكثر مما تخيلت، مش قادر أشوف حاجة، ندهت بصوت عالي: "روبي؟؟، إنت اللي تحت؟؟"

بدأ يعيظ بحُرقة وهو يقول: " أه أنا، أرجوك انقذني، أنا وقعت ورجلي  
إنكسرت "

قلته: " استنى "

بدأت أدور في الحقل المهجور على حبل أو أي حاجة مُمكن أنزلها لروبي  
تحت عشان يُربط نفسه بيها، بس للأسف ملقيتش أي حاجة تنفع دا غير إني  
ضعيف وقوتي الجُسمانية مش هتساعدني أسحبه من البئر لو لقيت حاجة  
تنفع، قلته بصوت عالي: " روبي، استنى شوية، أنا هروح أندة لأهلك "

كان بيحاول يخرج من البئر بأي طريقة، قالي بصوت ببترعش من الخوف: "  
لا... لا، أرجوك، أرجوك بلاش تسيبني هنا لوحدي "  
وطيت على البئر وقلته بصوت عالي: " لازم أجيب حد يساعدني، متخافش،  
اصبر شوية "

لوهلة قصيرة مكنتش قادر أتحرك، حاسس إن فيه حاجة منعتني من  
الحركة وأجبرتي أفضل باصص جوا البئر في الظلام، حست بدوخة كأني هقع  
جوا البئر، من جوا البئر سمعت صوت عميق، زي ما يكون حد بيحاول يحفر  
جوا البئر، نسمة هوا باردة ضربتني في وشي خلتي أفوق، لفيت وشي وبدأت  
أجري بأقصى سرعة ناحية بيت عائلة بيرسون، كُنت سامع صوت روبي  
بيصرُح ويبسنتجد بيًا، ببترجاني عشان أفضل جنبه؛

الشمس كانت بدأت تغرب والسما بدأت تتحول ببطء للون الرمادي، كُنت  
خايف وحاسس إني لازم أتصرف بسرعة، لازم أحاول أنقذ روبي قبل الظلام ما

يسيطر على المكان، وصلت أدام البيت ووقفت، كُنت بتتنفس بصعوبة. وصلت للباب وبدأت أخط عليه بقوة، صوت عالي جاوبني من جوا، بعدها السيدة بيرسون فتحت الباب وهي بتبصلي بدهشة وتقول: " إنت مين؟ "

نبرة صوتها ماكنتش ودودة، وراها كان واقف السيد بيرسون وباين على ملامحه الضيق وهو ماسك البندقية الخاصة بيه، كُنت متضايق منهم، دي مش الطريقة اللي يستقبلوا بيها حد عاوز يساعد ابنهم، لكن نجاة ابنهم أهم دلوقت، قلتلهم بخوف: " ابنكم روبي واقع في البئر "

بصولي بدهشة واستغراب، تنفست ببطء وقلتلهم تاني: " ابنكم روبي... واقع... في البئر "

السيد بيرسون ساب البندقية بتاعته على الأرض وهو بيطلع على السلم المؤدي للدور الثاني، السيدة بيرسون كانت بتبصلي بعد تصديق وهي بتقول: " كلامك مش منطقي، روبي نايم فوق في أوضته " السيد بيرسون وقف في نص السلم وهو بينده على ابنه بصوت عالي: " روبي! "

من فوق سمعت صوت طفل بيقول بتساؤل: " أيوه يا بابا؟ "

كان نفس الصوت اللي أنا سمعته من البئر، هو نفس الصوت، مستر بيرسون بصلي بغضب وهو بيقول لابنه: " مفيش حاجة، بتظمن عليك بس " خلص كلامه مع ابنه وهو بيقولي بنبرة مليانة غضب: " روبي فوق وبخير! "

حاولت ألاقي كلام أ قوله بسبب الصدمة وأنا بقوب: "بس... بس أنا... سمعته جوا البئر!!"

السيد بيرسون بصلي بقلق وهو يقول: "إنت بتتكلم عن أي بئر؟، البئر اللي في المنطقة الشمالية؟؟"

هزيت راسي وأنا بقول بخوف: "في حد واقع فيه، أنا سمعته"

قالي بنبرة تحذيرية: "خليك بعيد عن البئر الشمالي، البئر ده مش كويس"

حاولت أقول حاجة لكن ما إدانيش فرصة أتكلم، كمل كلامه: "خليك بعيد عنه، وتمدخلش الحقل بتاعي مرة ثانية، سامعني؟؟"

خلص كلامه وقفل الباب في وشي، سابني واقف لوحدي مصدوم ومش فاهم حاجة!

وقفت في الظلام لوحدي أدام بيتهم مش فاهم أي حاجة من اللي حصل، بس جوايا مكنتش مُقتنع بكلامه، قررت إني لازم أحقق في الموضوع.

مشيت ناحية البئر وأنا مقرر أثبت لهم إني مش مجنون وإن فيه حد واقع في البئر، قبل ما أبعد بصيت ورايا ولمحت السيدة بيرسون واقفة في الشباك، كانت بتبصلي وبتهمز راسها، جسمي كان بيترعش بس عشان مخوفش نفسي بدأت أقنع نفسي إن ده بسبب انخفاض درجة الحرارة.

لمّا وصلت للبئر الحجري، فتحة البئر كان شكلها أوسع، كُنت خايف منها، حاسس إني هقع جواها لو قربت منها، مشيت ناحية غطا البئر اللي محطوط

على الحائط الحجري، مسكته وبدأت أقفل فوهة البئر، مكانش في أي صوت  
من جوا البئر نهائيًا

ندهت بصوت واطي: "مرحبًا؟"

وَكُنْتُ سعيدًا لما مفيش أي صوت رد عليًا من تحت .

مشيت ناحية البيت وأنا بفكر في اللي حصل النهاردة، كُنْتُ خايف جدًا  
ومش فاهم أي حاجة، لما وصلت البيت قُلْتُ لأهلي على اللي حصل، بابا قالي إن  
مُمكن يكون روبي بيرسون عمل فيًا مقلب، إنه حاطط لاسلكي في البئر وكان  
بيراقبي من شباك البيت عشان يخوفني، قتلته بإصرار: "أنا مُتأكد إن مش ده  
اللي حصل"

ماما سألتني: "إنت مُتأكد إن كان في شخص جوا البئر؟"

في الحقيقة مكانش عندي أي إجابة للسؤال بتاعها، قررت ألتمز الصمت  
وَأَسْكَتْ، ابتسمت بحُزن وهي بتطبطب عليًا بشفقة، سبت العشا وقُمت  
غسلت أيديا، قررت إني لازم أحكي لحد بكرة ،  
لازم ألاقي حد يسمعني ويصدقني .

تاني يوم رحنت لبيت صديقي جاسبر وقعدت معاه وحكيت له كُل حاجة،  
جاسبر أخرق نوعًا ما، بس الميزة اللي فيه إنه بيهتم بيًا وهيسمعني مهما كانت  
قصتي سخيفة أو مش منطقية، وبرغم إنه سمعني كودس إلا إنه قضى باقي  
اليوم بيتريق عليًا وبيقولي إني لو رجعت عند البئر الشيء اللي فيه ه يخوفني،  
بدأت أتغاض منه، قتلته بغضب إنه لو شُجاع أوي بالشكل ده فليه ميروحش  
ويدشوف البئر بنفسه ؟

قالي بسرعة: " أنا هروح معاك لو إنت هتروح "

قلتلته: " لا طبعًا "

بدأ يستفزني ويقولني إني جبان وخوَّاف، بعد شوية بدأت أفنتع إن مُمكن فعلاً يكون روبي بيرسون كان عامل فيًا مقلب، وبوجود جاسبر هناك معايا، فرصة إن حاجة تحصل لواحد فينا هتكون قُليلة ؛  
أو على الأقل كُنت بتمني ده ...

بعدها بيوم لما خرجت من الشُّغل كلمت جاسبر وقابلته، اتجهنا سوا ناحية مزرعة بيرسون القديمة، كُنا راكبين العجل بتاعنا عشان جاسبر مش عاوز يمشي، بعد وقت قُليل وصلنا المزرعة، سبنا العجل برا المزرعة وبدأنا نتسلل للمزرعة، نصحت جاسبر بصوت هامس يتجنب إن أي حد من عائلة بيرسون يشوفه، أدامنا ساعة تقريبًا على الغروب، لازم نخلص قبل ما الشمس تغرب لأن الليل النهاردة هيكون مغيّم .

قربنا من السور الحجري فهمست لجاسبر بهدوء: " خُد بالك "

أدامنا بالظبط كان البئر موجود، بدأت أحس بإحساس غريب، متوتر، خايف وقلقان، كُنت حاسس إن فيه حاجة بتمنعني من إني أقرب أكثر من البئر:

أدامي كان جاسبر واقف، بدأ يمشي ناحية البئر ببطء كأن حد يبسحبه للبئر، على عكسي كان ماشي بخطوات آلية ناحية البئر، حاولت أقرب منه عشان أمسكه، بس هو كان سابقني تقريبًا بعشر خطوات، وبرغم برودة الجو إلا إن جسيمي كُله كان بيعرق بطريقة مش طبيعية

بدأت اتمنى إن مفيش حاجة تحصل ....

وقبل ما أخلص تمني بدأت أسمع صوت بكاء هيسيري جاي من جوا البئر،  
جاسبر وقف بخوف وهو يبص وراه عشان يشوفني، وشه كان شاحب وعينيه  
كانت مليانة خوف، حاول يتمالك أعصابه ويقرب أكثر من البئر؛

الصوت اللي بيعيط سأل: " حد فوق؟ "

بس الصوت المرة دي مش هو نفس الصوت اللي سمعته إمبراح، الصوت  
الهاردة كان صوت ناعم وأنتوي... كان صوت بنت؛

كنت ببص لجاسبر بخوف، عاوز أشوف هو ناوي يعمل إيه، العصبية  
والتوتر والخوف بدأوا يسيطروا عليه، كان مُتردد بين إنه يرجع لورا أو ياخذ  
خطوة لأدام ناحية البئر، الصوت تكرر تاني برجاء: " مرحباً؟ "

جاسبر بص وراه بخوف وهز راسه بتردد، لا... لا إحنا لازم نمشي حالاً!

جاسبر سأل بصوت بيترعش: " مين تحت جوا البئر؟ "

سند بإيديه على سور البئر ومال بجسمه عشان يقدر يبص جوا البئر  
كويس، صوت البننت الخائفة تردد تاني وهي بتقول: " أرجوك، أرجوك،  
ساعدني "

لو مكنتش خُضت تجربة مُخيفة مع البئر قبل كده كُنت هعمل أي حاجة  
عشان أنقذ صاحبة الصوت الجميل ده، بس برغم لطف الصوت كان فيه

حاجة مش طبيعية فيه، حاجة مغلّية جسي كله يقشعر من الخوف، سألت نفسي لو جاسبر سامع وحاسس زي ؟

بصلي وشُفت الخوف في عينيه وهوّ يسأل: " مين تحت جوا البئر؟ "

رفع إيده وشاور لي ببطاء وهوّ بيقول بصوت واطي: " تعالي هنا "

هزيت راسي بالرفض بدون تردد، مكنتش مُحرج أيين خوفي ورعي في اللحظة دي، البنّت اللي في البئر كانت بتقول برجاء: " أرجوك متسبينيش، أنا .... أنا خيفة "

جاسبر قالها بثقة وهوّ بيجاول يتغلب على خوفه: " مش هسيبك، إنتي مين ووقعتي جوا البئر إزاي؟ "

الإحساس الغريب وخوفي بدأوا يزيدوا عن المعتاد، ندهت عليه بصوت واطي مليان خوف: " جاسبر، يلا نمشي "

الجو كان بيظلم بسرعة غير مُعتادة، الشمس بتغيب ورا الغيوم والنور بيختفي، لسه نُص ساعة على الغروب تقريبًا، العالم كله كان مغيّم في اللحظة دي وقلبي مليان خوف مش طبيعي

جسي كان بيترعش، جاسبر كمان كان بيترعش، بس رفض يمشي ويبعد عن البئر، البنّت كانت لسه بتنده من جوا البئر بخوف، صوت المية بيتردد كأنها بتغرق جواها، رفع صابعه وشاور لي أسكتّ حالا وهوّ يسأل: " هسألك مرة تانية، وقعتي جوا البئر إزاي؟ "

البنبت مردتش عليه، وفجأة سمعت صوت عُمري ما هنساه طول حياتي،  
صوت ضوافر كثير حادة بتخدش جدار البئر من جوا، حاجة بتطلع على حيطه  
البئر!

الشيء اللي اتظاهر قبل كده إنه روبي ودلوقت مُتظاهر إنه بنت لطيفة كان  
بيتسلق البئروطالع لنا وبسرعة شديدة !!

لحد دلوقت بدعي من ربنا يسامحني على اللي عملته، أنا جريت... جريت  
بأقصى سرعة عندي، ما أعتقدش إن جاسبر حتى لحق يستوعب أنا عملت  
إيه، بصيت ورايا لجزء من الثانية وأنا بجري، جاسبر كان واقف على حافة  
البئر، باصص لتحت، كُنت هقع على الأرض، توازنت وأنا ببص أدامي وبجري

مبصيتش ورايا تاني !

ومن ورايا سمعت صوت صرخة مُخيفة، جاسبر كان بيصرُخ من الخوف،  
لا... التعبير الأذق هيكون جاسبر كان بيعوي من الخوف، بس صرخته إتقطعت  
في نُصها، فجأة الصمت سيطر على المكان، جريت وأنا حاسس بخوف أول مرة  
في حياتي أحس بيه؛

وصلت للعجل بتاعنا، أخذت عجلتي وجريت بيها لحد البيت بدون توقف،  
رمىت العجلة أدام البيت، دخلت البيت وقفلت الباب ورايا كويس، أهلي كانوا  
قاعدين في عُرفة المعيشة، شافوا نظرة الخوف والرعب على ملامحي، حاولت  
أفهمهم اللي حصل بس مكُنتش قادر اهدى، ماما حاولت معايا لحد ما قدرت  
تهديني بعد شوية، بس كلامي مكانش مفهوم ولا مُرتب من كُتر الخوف

لما فهموا الموضوع شوية بابا قرر يتصل بوالد جاسبر، الإثنين راحوا سوا  
لحد مزرعة بيرسون، السيد بيرسون كان واقف على باب مزرعته وماسك  
بندقيته في إيده ومكشّر

كُنت بتعرش من الخوف فماما قررت تديني مهدئ، مقدرتش أقاومه،  
غمضت عينيًا وقبل ما أفهم أي حاجة كُنت غرقان في نوم عميق...

حلمت إني كُنت في مزرعة بيرسون، واقف أدام البئر اللي كان واسع جدًا،  
سامع صوت جاسبر من جوا البئر بيصرخ وبيلومني إني سبته وكُنت السبب في  
كُل اللي حصل، كُنت عاوز أجري بعيد عن البئر بس مش قادر، واقف وجسمي  
كُله مشلول من الخوف، فجأة إيدين مُخيفة بدأت تخرج من البئر من وسط  
الظلام، شيء مُخيف خرج من البئر وبصلي بصة شريرة، صوت جاسبر بدأ  
يندمج مع صوت روبي والبنبت عشان يكونوا صوت مُخيف .

صحيت، مكنتش عارف الساعة كام بالظبط دلوقت، مش عارف بابا رجع  
من برا ولا لأ، قلبي كان بيدق بسرعة من كُتر الخوف بسبب الكابوس المُخيف  
اللي حلمت بيه، خرجت من السرير ووقفت في الأوضة وسط الظلام، خايف  
أبص على شباك الأوضة، حاسس كأن فيه حاجات مُخيفة بتراقبني ؛

بصيت ولقيت جاسبر واقف تحت الشباك، باين عليه الخوف والإرهاق،  
وشه شاحب وجسمه بيتعرش، إيديه جنبه كأنه مش قادر يرفعهم، كان بيصلي  
في عينيًا، عينيْنَا تلاقت لفترة طويلة، كُنت حاسس إن الزمن وقف تمامًا، رفع  
إيده وحرك شفائفه على شكل جُملة تعالي هنا ...

هزيت راسي بالرفض .

من بعيد سامع صوت الريح وهي بتعدي وسط الشجر وبتهز الفروع، بس جنب بيتنا مفيش شجر ودلوقت مفيش أي ريح نهائيًا، الصوت كان مُخيف:

وقفت فترة طويلة أبص لجاسبر وهوّ بيشاور ليّا إني أروح له، كُنت خايف أبص في أي حته تانية غير عينيه، خايف ألتفت لأقيه ورايا، بدأت أدخل في صراع بين خوفا من إني ألتفت حواليا وخوفا وأنا شايف جاسبر بالحالة دي، مش عاوز أحس بالخوف اللي كُنت حاسس بيه ساعتها مرة تانية:

فضلت واقف أبص لجاسبر لحد ما أغمي عليّا من التعب والإرهاق، لما فقت كان الصبح طلع والشمس نورت الدنيا، نزلت أجري للدور اللي تحت ولقيت بابا بيفطر على تراييزة المطبخ، لما لمحني ملامح وشه تبدلت وبان عليه القلق، وقفت أبصله بخوف وأنا بقوله: "بابا... جاسبر... أن...."

مقالش غير كلمتين بس: "أنا أسف"

السيد بيرسون كان في انتظارهم، وداهم عند البئر، حذاء جاسبر كان مرمي جنب البئر بإهمال، حاولوا يشوفوا لو يقدرُوا يلاقوه جوا البئر، بس البئر كان مُظلم وعميق، حتى الكشّافات مقدرتش تسبر أغوار الظلام الدامس بتاع البئر، كلموا النجدة وفورًا بعثوا ليهم فريق إنقاذ، بس اللي اكتشفوه إن مهما نزلوا لتحت في البئر، البئر مكانش بيبان له قاع، كان بيتفرع لطرق وحفر وكهوف من جوا، حاولوا لكن الموضوع كان هيستغرق منهم شهور عشان يقدرُوا يمشطوا كل الكهوف والممرات دي بحثًا عن جُثته، دا لو جثته فعلاً كانت تحت !

بعد 3 شهور تم إيقاف عملية البحث بناءً على أوامر وطلب من والد جاسبر، البئر تم إعلانه منطقة محظورة وتم إغلاقه بخرسانة، رُحِت مع بابا عشان أحضر عملية إغلاق البئر، السيد بيرسون كان واقف ولما لمحني قرب مني وبصوت واطي قالي: " قُلتك إن البئر ده تحول لحاجة مش كويسة "

بصيتله وقتله بلوم: " إنت كنت عارف إن فيه شيء شرير عايش تحت "

بص على الأرض وهوّ بيقول: " ملقوش حاجة تحت "

قتله بصوت واطي: " جاسبر تحت "

بصلي في عينيا وجوا عينيه لمحت خوف وفتح، مشي بعيد عني وهوّ بيقول:  
" متبقاش مُتأكد من كده "

وكان عنده حق، جاسبر فعلاً مكانش تحت!

أنا شفته تحت بيتي في الليلة اللي اختفي فيها، كان شاحب ومُخيف ويمكن يكون الشيء تمثّل في صورته وجالي، مش عارف حاجة..

بس مهما حصل عُمرِي ما هنسى النظرة اللي كانت في عينيه وهوّ واقف تحت شباكي.

\* \* \*

# الفهرس

5.....	إهداء
7.....	مقدمة
9.....	الأزیز
18.....	الكابينة 28
25.....	بابا... إنت بتعمل إيه؟
30.....	عقدة ذنب الناجية
38.....	لوسي
44.....	سُكان الشوارع
50.....	الراديو
54.....	تحدي أم حقيقة؟
57.....	أكل الخنزير
78.....	استحواذ شيطاني
93.....	صفير في البئر
99.....	أسوأ هدية عيد ميلاد

109.....	الثُنائي العجوز .....
113.....	مارثا .....
120.....	مُحقق الخوارق .....
129.....	عندما يطرق الجحيم الباب .....
143.....	لم أكن وحيدة .....
151.....	حارس الأمن الليلي .....
158.....	حديقة السيئين .....
167.....	كارول... كارول في كُل مكان .....
176.....	الأضواء .....
180.....	تفسير غير مُرضي .....
185.....	البئر .....
199.....	الفهرس .....

obeikandi.com

جميع حقوق الطبع والنشر محفوظة للناشر



noon\_publishing@yahoo.com  
0235860372 - 01127772007